

Revelation

Angkentye Jesus-elarle John-eke imerneke

Ayeye nhenhele ileme nthakenhe-arle-irretyenhe apmere ahelhe nhenhenge

¹ Ayenge John arritnye aneme, ayenge Jesus Christ-eke warrke-irreme. Pipe nhenhele ileme angkentye nhenge Ngkarte-arle Jesus Christ-eke imerneke. Ngkartele ikwere imerneke nhenge yanhe-ngentyele re warrkene ikwerenhe areye iletynhenge arne areye lyete ware nthakenhe-arle-irretyenhe. Christ-ele alkere-arenye ikwerenhe yerneke atyenge-werne apetyetyeke arne yanhe areye atyenge imernetyenhenge. ² Alkere-arenye yanhele arne ingkirreke anthurre atyenge imerneke. Lyete anteme the pipe-ke intelhe-ileme arne ingkirreke tharle areke aweke-arle anteye. Nhenhe kwenhe ayeye arratyete anthurre Ngkarte-kenhe aneke Jesus-elarle alkere-arenyeke imerneke. ³ Kenhe Ngkarte kwenhe akangkemele aneme nhenge tyerrtye areyele angkentye nhenhe renhe aharlperre read-eme-ilerlenghe. Ngkarte atnerte akangkemele anthurre-arlike aneme nhenge tyerrtye areyele angkentye nhenhe renhe aywerrkele awerlenghe mpwaremele. Alakenhe ikweringe anteme ar-rantherre ingkirrekele kwenhe angkentye nhenhe renhe read-eme-ilettyeke, mwantyele awemele, aywerrkele mpwaremele arne nhenhe areye-arle kwenhe, nhenge Jesus-elarle atyenge imerneke, lyete ware anetyenhenge.

⁴ Ye, the kwenhe lyete pipe nhenhe arrekantherre-werne yerneme nhenge Ngkarte-arle arratyete itelaremeke nhenge apmere yanhe-arle anemeke Asia-ele, apmere

7-elarle anemeke, pipe arrekhantherrenhe-arrpe-kenhele apurte-irrerlthe-anemele Ngkarte akertne utyernerlthe-anetyeke tnakemele.

Ngkarte kwenhe itethe akwete-ante-arle anerle-aneme. Urreke arne ingkirreke anthurre anetyenhenge, Re kwenhe itethe aneke. Arlthe lyete anteme re itethe akwete aneme, Re itethe akwete-ante anetyenhe. The kwenhe Renhe apayuthneme arrenhantherrenhe mwantye-mwantye-iletayeke, nhenge yanhe-ngentyele arrantherre apurte akwete mwerre anetyenhenge. The kwenhe utnenge 7-pele yanhe areye-inpe apayuthneme akwetethe-arle Ngkartenge arrekwele tnerlthe-anemeke, itne Renhe apayuthnetyenhenge, arrenhantherrenhe mwantye-mwantye-iletayeke anteye. ⁵ Kele the Jesus Christ apayuthneme arrenhantherrenhe mwantye-mwantye-iletayeke anteye, nhenge yanhe-ngentyele arrantherre apurte mwerre anetyenhenge. Re apmere ahelhe nhenhe-werne apetyemele ayeye arraty Ngkarte-akerte akwetethe iletarte, ikwere-iperrele anteme re ilweke. Ngkartele anteme Renhe itethe akemelhe-ilirtneke nhenge irrerlknge-arle inteke-iperrele. Kele arlthe lyete anteme re alartetye anthurre irreke-arle alartetye arrpenhe ingkirreke anthurre apmere ahelhe nhenhele-arle anemeke. Re kwenhe arrekwele-ipenhe aneme Ngkartele-arle itethe akemelhe-ilirtneke apmere ahelhe nhenhele. Urreke anwerne anteme itethe-irirtnetyenhe nhenge ilweke-arle-iperre.

Anwerne kwenhe Jesus Christ akertne utyernerlthe-aneme tnakewarremele. Re kwenhe anwerneke ahentye anthurre aneme. Re anwernenhe mwantyele arntarnte-areme nhenge Ngkartele anwernenhe atweme-ketye arne akurne areye-arle anwerne mpwarekenge. Re kwenhe yanhe renhe mpwareke allhwe ikwerenhe-arrpe thelel-

hemele nhenge re ilweke nhenge arne arntarlkweke-arlange arlpere anemele. ⁶ Re kwenhe anwernekenhe alartetye irreke-arle, re angkemele anteye anwerne kwertengerle ikwerenhe areye anetyeke Ngkarte utyernemele tnaketyeke Akngeye-arle Jesus-kenhe anemeke. Kele, anwerne renhe akwete akertne utyernerltenemele tnakewarreye, rarle kwenhe anwerneke alartetye akwete-ante anetyenhenge! Yanhe arratyeh-arle aneme!

⁷ Awerrirraye! Jesus kwenhe urreke angkulyele-arlange apetye-alpetyenhe, tyerrtye ingkirrekele renhe aretyenhenge, nhenge yanhe areyele-arlike renhe-arle nternekeke renhe-arle arne arntarlkweke-arleke arlpere arrernekeke. Nhenge tyerrtye ingkirrekele apmere ahelhe nhenhe-arle renhe aremele imerte atere arangkemele itne-arle ikwere-ketye alhule-iwenge, re-anteme itnenhe arrilyenhenge. Nhenhe kwenhe arratye aneme. Alakenhe re kwenhe anetyenhe. ⁸ Ngkarte kwenhe anwerneke alakenhe angkeme, "Ayenge kwenhe arrekwenye anthurre aneme, Ayenge-inpe kwenhe ingkernenye anthurre-arle. Arne anetyakenhenge-urrke, Ayenge kwenhe itethe aneke, arlte lyete anteme ayenge itethe akwete aneme. Urreke apmere ahelhe nhenhe-arlike alkere-arlike kwenhe uyerretyenhe, Ayenge anteme itethe akwete anetyenhe. Ayenge kwenhe Alartetye aneme, arne ingkirrekeke Alartetye anthurre."

John-ele Jesus ahirre-ahirrele areme

⁹ Ayenge kwenhe John, kake akngerrepate arrekantherrenhe, ayenge kwenhe warrkene Ngkarte-kenhe aneme arrantherre-arteke. Ngkarte kwenhe anwerne ingkirrekeke alartetye aneme. Arrpenhe areyele ayenge arlkarentye-ileme, arrenhantherrenhe arlkarentye-ileme-arteke anwerne-arle Jesus arratyeh

itelarerlenghe. Yanhe akenhe mwerre-arle aneme. Anwerne kwenhe Jesus arratye akwete itelarerlte-aneme renhe akwetethe apenterlte-anemele, nhenge untyeme-irretyakenhele, rarle kwenhe anwernenhe lterrke-ilerlenghe. Ayenge kwenhe unthetyarte ayeye mwerre Jesus-akerte ilerle-apemele. Alakenhe ikwerenge anteme itne ayenge arntwirrkeke apmere Patmos nhenhe-werne yernemele. Apmere akweke nhenhe kwatye alaye mpwepele, jail-le-arteke anteme aneme. ¹⁰ Arrule ulkere-arle, arlte Apurrkele ayenge anetyame Ngkarteke angkerle-anemele. Re Utnenge Akngerre Ikwerenhe atyenge-werne yerneke, Utnenge Akngerre atyenge-arleke irrpeke. The aweke tyerrtye angwenhe apeke re ingkerne-ngentyele atyenge angkerlenghe. Re kwenhe atyenge arnterre anthurre angketyame, angkentye akngerre nhenge trumpet-arteke. ¹¹ Re kwenhe atyenge angekeke, “John-aye! The kwenhe ngkwenge arne atningke anthurre imernetyenhe. Pipe inaye, ikwereke-arleke intelhe-ilaye arne ingkirreke unte-arle areme awemele anteye. Kele imerte pipe renhe apmere 7-pele yanhe areye-werne yernemele, atyewe Jesus-kenhe areye-werne, yanhele-arle anerlte-anemeke. Ephesus-arenye areye-werne renhe yernaye, Smyrna-arenye areye-werne, Pergamum-arenye areye-werne, Thyatira-arenye areye-werne, Sardis-arenye areye-werne, Philadelphia-arenye areye-werne, Laodicea-arenye areye-werne-arlke. Pipe nhenhe itneke ingkirreke-werne yernaye.” Alakenhe rarle re atyenge angekeke.

¹² The renhe aweke-arle-iperre arerle-alhemele, renhe aretyeke ahentye anemele, angwenhe apeke-arle atyenge alakenhe angkekenghe. Akngarte-iwelheke-arle the areke arne 7-pele gold-engentyele-arle mpwarekenghe alepe-arle atnyenetyeke yanhe ikwerenge tnerlte-anerlenghe.

¹³ Kenhe itnekenge-arleke akenhe artwe tneyame re alkere-arenye-kenhe apmere ahelhe nhenhele-arle alkn-girreke. Re kwenhe mantere arlpentye akngerreke-arle irrpeke nhenge ingke ikwerenhe-werne-atheke, arne belt-le-arteke arerre ayernerle-alheke gold-engentyele-arle mpwarekeke. ¹⁴ Alte ikwerenhe imparrkeme anthurre angkulye mperlkere-arteke alknge ikwerenhe ure alknghenthele ampeme-arteke nhenge amparrkemele. ¹⁵ Ingke ikwerenhe imparrkemele arlennge-arteke. The angkentye ikwerenhe aweke, nhenge kwatye urewe-arle aywerre akngerre-irremeke-arteke. ¹⁶ Ilye akwe-arratyale re kwerralye 7-pele arntwirrketyame. Arrakerte ikwerenhenge akenhe arrateke alyweke arlpentye akngerre-arteke-arle nhenge itere atherre-anteye ar-rirlpe anthurre. Inngerre imparrkeme anthurre, nhenge alernnge arlte mpwepele ampeme-arteke.

¹⁷ The renhe areke-iperrele, ayenge atnyetye-alpeke ingke ikwerenheke-arleke, ayenge uyarne anthurre akngelheme apeke, angkeme apeke, nhenge ilweke-arle anthurre-arteke ayenge aneke. Re akenhe ilye akwe-arratyale ayenge anpeke imerte angkemele, "Atere-irretyale anaye, arratyale akwete itelarerle-anaye. Ayenge kwenhe arrekwele-ipenhe anthurre aneme, arne anetyakenhenge-urrke, ayenge-arle itethe akwete-arle aneke, ayenge ingkernenye anthurre aneme anteye, nhenge arne ingkirreke anthurre uyerrrelenge ayenge akenhe itethe akwete-ante anetyenhe alakenhe re akwete. ¹⁸ Ayenge kwenhe akwete-ante anerle-aneme. Ayenge ilweke, lyete akenhe ayenge itethe akwete-ante aneme nhenge awethe ilwetyakenhele. Ayenge kwenhe Utnenge Ngkarte-kenhe-akerte, the kwenhe nhenge ilweke-arle areye itethe akemelhe-ilirtnentye akngerre. Yanhe-ngentyele anteme itne itethe akwete-

ante anetyenhenge. Kenhe arrpenhe areye akenhe the impetyenhe itne tyerrtye irrerlknge areyenge anerlte-anetyenhe.

¹⁹ “Ye John, unte pipe-ke-arleke intelhe-ilaye iwenhe-arle unte lyete awemeke, aremeke anteye. Intelhe-ilaye ingkirreke anthurre the ngkwenge imerneme. Ingkerreke intelhe-ilaye the kwenhe ngkwenge imerneme arlte lyete anthurre nthakenhe-arle-irremeke, ingkirreke-arlke the ngkwenge imernemeke, arlte urreke-arle anetyenhenge.

²⁰ Lyete anthurre anteme unte areme kwerralye 7-pele nhenhe areye iltye akwe-arratyte atyinhenge-arleng, unte kwenhe areme arne arlpentye 7-pele nhenhe areye-arlke gold-engentyele mpwareke-arle alkngenthe akertne-arle atnyenemenge. Arne nhenhe areyele kwenhe alakenhe akaltyele-anthemele: kwerralye 7-pele kwenhe alkere-arenye 7-pele atyewe Ngkarte-kenhe areye-arle arntarnte-aremeke, apmere 7-pele ikwere-arle anemeke. Kenhe alkngenthe arntwirrkentye akngerre tyatyte-arenye areye aneme apmere 7-pele yanhe areyenge-arle anerlte-anemeke.” Alakenhe kwenhe Jesus atyenge angketyame.

2

Angkentye Ngkarte-kenhe tyerrtye areyeke apmere Ephesus-elarle anemeke

¹ Kele Jesus atyenge awethe-anteye alakenhe angkeke, “Ayenge awaye! Angkentye nhenhe alkere-arenyeke intelhe-ilaye atyewe atyinhe areye-arle arntarnte-aremeke apmere Ephesus-elarle anemeke. ‘Ayenge arrekantherre angkeme: The kwenhe kwerralye 7-pele iltye akwe-arratytele atnyeneme, ayenge arne arlpentye 7-peleke-arleng untheme alkngenthe areye-arle akertne atnyenemeke. ² Ayenge kwenhe arrekantherre akaltye

aneme. Arrantherre kwenhe atyenge arnterre warrke-irreme, arrantherre ayenge akwetethe arratyte itelarerlte-anemele. Arrantherre kwenhe arne arratyte mpwarerlte-aneme artwe arrpenhe areyenge anyente-irretyakenhele nhenge itne arne akurne areye mpwarerlenge. Arrpenhe areye kwenhe apale angkeme, “Christ-ele kwenhe ayenge akngakeke yernemele.” Arrantherre akenhe itnenhe mwantyele awemeke-amparre, kele arrantherre anteme itelareke itne-arle urrtyrremele angketyamenge. ³ Ye, ayenge kwenhe akaltye-anteye aneme arrantherre-arle ayenge apenterlte-anemeke. Kenhe nhenge arrpenhe areyele arrenhantherrenhe arlkarentye-ilemele atwemele-anteye arrantherre-arle ayenge arratyte itelarerlenge, arrantherre ayenge impetyakenhe aneme ayenge akwete apenterlte-anemele. Alakenhe ikwerenge anteme ayenge akangkemele anthurre aneme.

⁴ ‘Kele awerrirraye! Ayenge kwenhe atnerte alhwarrpe awelheme arne anyente-ngentyele ware arrantherre-arle atyenge akweke ware ahentye-anerlenge. Nhenge arrantherre arrekwele Ngkarteke atyewe-irreke arrantherre atyenge arnterre anthurre-arle ahentye-aneke. Kenhe iwenhenge-arle anteme arrantherre atyenge ahentye-anentye akngerre impelheke?

⁵ Arrantherre ingkirrekele itelareme nhenge nthakenhe-arle arrantherre atyenge ahentye anthurre anetyarte. Arrantherre kwenhe atyenge alakenhe re-anteye awethe ahentye-anetyeke, itelaraye arrantherre atyenge arrekwele ahentye anthurre anetyarte-arteke. Kenhe arrantherre apeke akngarte-iwelhetyakenhe aneme, kele ayenge apetyemele arne yanhe areye arrekantherre-ngentyele ineme alkngenthe-arle atnyenemeke.

⁶ ‘Ayenge arrekantherre arrpenhe awethe angketyeke ahentye-aneme. Arrantherre yanhe areye itelareme

artwe Nicolaus-arle apenterlte-anemeke. Itne kwenhe apale itirreme. Arrantherre kwenhe itneke ahentye-anetyakenhe, alakenhe-anteye kwenhe ayenge itneke ahentye-anetyakenhe. Nhenge arrantherre alakenhe kwenhe itirremele, arrantherre arratyte itirreme.

⁷ ‘Ye, arrantherre kwenhe irlpe-akerte aneme! Kele mwantyele awerlte-anaye nhenge Utmenge Akngerre tyerrtye Ngkarte-kenhe areyeke angkemele! Nhenge tyerrtye apeke Satan-ketyenge lterrke tnemele, re apmere mwerre akngerre anthurre alkere akertnerne atnerrele alhetyeke. Apmere yanhe ikwerenge arne anyente tneme ingkirreke anthurre-arle itethe-ilemeke. Re kwenhe merne mwerre akngerre arne yanhe-ngentyele arlkwetyenhe, akwete-ante itethe anerle-anetyenhenge.’”

Angkentye Ngkarte-kenhe tyerrtye areyeke apmere Smyrna-le-arle anemeke

⁸ Kele re atyenge awethe-anteye angkeke, “Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Smyrna-le-arle anemeke. Ikwere alakenhe ilaye, ‘Ayenge kwenhe arrekwelenye anthurre aneme, ayenge ingkernenye anthurre aneme. Arne anetyakenhenge-urrke, ayenge aneke, lyete ayenge akwete anerle-aneme. Nhenge ahelhe uthene alkere uthene uyerrrrenge ayenge itethe akwete-arle aneme. Ayenge kwenhe aneme nhenge ilweke-arle itethe-irirtneke!

⁹ ‘The itelareme, tyerrtye arrpenhe areyele arrenhantherrenhe arlkarentye-ilemenge, arrekantherre ahele angkerlte-anemele atwerlte-anemele anteye. The itelareme, arrantherre-arle akunye areye anemenge, iltye-ante anerlte-aneme ngkweltyeke arrangkwe.

Kele akangkemele anaye Ngkartele-arle kwenhe arrenhantherrenhe Utmenge Ikwerenhele arntarnte-arerlenghe, alakenhe kwenhe mwerre anthurre, apwerte ngkweltye akngerrenge mwerre ulkere. The kwenhe itelareme, arrpenhe areye arrekantherre-akerte angkentye akurne angkerlte-anerlenghe anhelhemele anteye. Itne kwenhe tnakelhemele angkeme “Anwerne kwenhe Jew areye aneme, Ngkarte-arle arratyte apenterlte-anemeke.” Itne kwenhe urrtyrremele angkerlte-aneme, itne kwenhe arrentye Satan-kenhe aneme renhe apenterlte-anemele. ¹⁰ Kele-anteye-arle itne arrenhantherrenhe akwetethe arlkarentye-ilerlte-aneme, atwerlte-anemele, atere-irretyale anaye ayenge ware arratyte itelarerlte-anaye. Arrentye Satan-ele arrenhantherrenhe arrkerneme arrenhantherrenhe Ngkarte-ketyenge artepe untyeme-iletayeke. Re tyerrtye akurne areye ileke arrenhantherrenhe arntwirrketyeke jail-ke akwernetyeke. Kele awerrirraye! Arrantherre akenhe jail-ele aneme arlte 10-ke-atwetye ware. Ayenge impetyale anaye atyenge akwetethe itirrerlte-anaye. Itne apeke angkerreme-ketye itne-arle arrenhantherrenhe irrerlknghe atwetyenhe, arrantherre akenhe ayenge akwetethe apenterlte-anetyeke kele-anteye-arle itne apeke arrenhantherrenhe irrerlknghe atweme. Kele the arrenhantherrenhe itetheke mpwaretyenhe nhenge ilweke-arle-iperrenge nhenge yanhe-ngentyele arrantherre atyengenge akwete-ante anetyenhenge.

¹¹ ‘Arrantherre irlpe-akerte! Kele mwantyele awerrirraye, nhenge Utmenge Akngerre Ngkarte-kenhe areyeke angkerlenghe! Nhenge angwenhe apeke re lterrke akwete anerlenghe arrentye Satan-ketye, kele re ure akngerre yanhele uyarne ilweme, ure yanhe akwete-ante-arle amperle-anemeke, arrangwe-arle.’ ”

Angkentye Ngkarte-kenhe tyerrtye areyeke apmere Pergamum-elarle anemeke

¹² Kele re atyenge awethe-anteye angkeke, “Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Pergamum-elarle anemeke. Ikwere alakenhe ilaye, ‘Ayenge kwenhe aneme alyweke arlpentye akngerre-arle atnyeneme, ar-riripe kwenhe akantye atherre-anteye aneme. Ayenge kwenhe Pergamum-arenye areyeke angkeme. Arrantherre ayenge awerrirraye!

¹³ ‘Ayenge kwenhe apmere arrekantherrenhe-akerte akaltye aneme, apmere yanhele kwenhe arrentye Satan pwathe aneme, tyerrtye atningkele yanhe-arle anemeke renhe apenterlte-aneme. Kenhe arrantherre akenhe arne arratyentye mpwarerlte-aneme renhe alhule-iwerlte-aneme imerte atyenge lterrke akwete anerlte-anemele. Arrekwele ulkere-arle, apmere yanhe ikwerenge itne atyewe atyinhe Antipas irrerlknge atweke rarle kwenhe untherle-aperleng angkentye atyinhe ilerle-apetyarte. Arrantherre kwenhe atere kwenyele nhenge ayenge atnerre anthurrele akwetethe apenterlte-aneme, alakenhe ikwerenge anteme ayenge arrekantherre akangkeme anthurre.

¹⁴ ‘Ayenge kwenhe arrekantherre ahele-ahele angkeme akweke ware. Tyerrtye urrpetye arrekantherrele-arleng apale-apale aneme, itne apenterlte-aneme angkentye artwe Balaam-kenhe, nhenge apmere arrule-arle anekeke. Re kwenhe urrtirremele ileke Moab-arenye alartetyeke, Balak arritnye. Kele Balak anteme urrtirremele ileke Israel-arenye areyeke, nhenge itne iwerre apale-arle alhetyenhenge arne akurne-arlke mpwarerlte-anemele. Itne kwenhe arne akurne areye mpwaretyame nhenge arne-ngentyele,

apworte-ngentyele, imerte artepe anemele itnenhe tnaketyenhenge. Itne Ngkarteke itirretyakenhe aneke, arrangwe-arle. Balak-ele itnenhe akaltyele-antheke merne-arlike kere-arlike arlkwetyeke ngkarte urrtiyirrentye-arle anthekeke. Balak-ele Israel-arenye areyeke ileke-arlike, mwerre akwele anewe arrpenhakenhenge intetyeke. Itne kwenhe akngwelye-arteke interlte-apetyarte, mpwenye akngerre areye-arteke, Ngkarte awetyakenhele. Kele lyete anteme arrantherre arrpenhemele alakenhe-anteye mpwarerlte-aneme.

¹⁵ 'Kenhe arrpenhemele awemele arratye itelaremele iwenhe-arle artwe yanhe Nicolaus angkeke. ¹⁶ Nicolaus-ele urrtiyirremele ileme. Itneke-aketye untyeme-irraye. Itne apeke ikwere-ketyenge untyeme-irretyakenhele aneme, kele ayenge alyweke arlpentye akngerre-akerte apetyeme tharle arrakertele atnyenemeke itnenhe atwetyeke.

¹⁷ 'Arrantherre kwenhe irlpe-akerte aneme! Kele mwantyele awerrirraye, nhenge Utnenge Akngerre Ngkarte-kenhe areyeke angkerleng! Nhenge angwenhe apeke lterrke anerleng arrentye Satan-ketye, The renhe merne arrpenhe alkere-arenye anthetyenhe, merne yanhe manna ileme. Ngkartele merne yanhe renhe alengke-iweke, lyete akenhe the tyerrtye antheme ayenge-arle akwetethe apenterle-anemeke. The renhe apworte athirnte mperlkere nhenge anthetyenhenge. Apworte yanhe ikwerenge The ikwere arritnye intelhe-iletienhe, arritnye arrpenhe. Kenhe arrpenhe areye akenhe arritnye yanhe ikwere akutne aneme. Tyerrtye apworte mperlkere yanhe-akerte re-ante kwenhe ikwere akaltye anetyenhe.' "

Angkentye Ngkarte-kenhe tyerrtye areyeke apmere

Thyatira-le-arle anemeke

¹⁸ Kele re atyenge awethe-anteye angkeke, “Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Thyatira-le-arle anemeke. Ikwere alakenhe ilaye, ‘Ayenge kwenhe Alere Ngkarte-kenhe aneme. The kwenhe angkentye atyinhe ilerle-apeme. Alkng atherre kwenhe ure alkngenthe-arteke amparrkeme, ingke atherre akenhe arlenge-arteke amparrkeme.

¹⁹ ‘Kele awerre-anteme-irraye! Ayenge kwenhe akaltye aneme arne ingkirrekeke arrantherre mpwarerlenge. Ayenge kwenhe akaltye aneme arrantherre atyenge ahentye anthurre anerlenge, arrantherre arrpenhe areyeke akangkentyele arne areye mpwarerlte-aneme. Ayenge kwenhe akaltye aneme arrantherre-arle ayenge arratyewemenge, warrke atyinhe mwerrentye anthurre mpwaremunge. Ayenge kwenhe akaltye aneme, nhenge arne akurne areye arrekantherre irrerlenge, arrantherre ayenge arratyewakwete itelarerlte-aneme. Nhenge arrantherre ayenge arrekwele-iperre arratyewitelareke arrantherre arratyewanetyarte, arne mwerre areye atyenge mpwaremele. Arrekweleke-amparre arrantherre akweke ware atyenge mpwarewarretyarte. Kenhe lyete akenhe arrantherre lterrke anthurre irreke-arle arne mwerre akngerre areye mpwarerlte-anemele.

²⁰ ‘Kele awerrirraye! Ayenge kwenhe arrekantherre ahele-ahele angketyenhe akweke ware. Arrantherre kwenhe arelhe yanhe alkngetherre iletakenhe aneke, arelhe akurne-arle Jezebel-arteke anemeke, arrule anthurre-arle anekeke, nhenge re arne akurne areye akaltyele-anthetyarte pipe arrekantherrenhenge. Re kwenhe urrtyirrentye aneke rarle akwele angkentye Ngkarte-kenhe areye ilerle-anemele. Re kwenhe

arrenhantherrenhe ilerle-aneme, mwerre akwele arrpenhenge areye akngwelye-arteke intetyeke. Re arrenhantherrenhe kere yanhe arlkwetyeke ileme, ngkarte urrtyirrentye-arle anthekeke.

²¹ 'Atningke anthurre-ngare the ikwere ileke, arne akurne yanhe areye-ngentyele akngarte-iwelhemele untyeme-irretyeke. Ayenge ikwere akarelhemele akarelhemele irreke. Arrangkwe akenhe aneke, re kwenhe ayenge akwetethe untyemele awetyarte rarle kwenhe arne akurne yanhe areye akwetethe mpwaretyeke ahentye-aneke. ²² Alakenhe ikwerenge anteme the renhe rlkerte-anthurre-iletynhe, yanhe ikwerele re rlkerte interle-anetyenhe. Angwenhe areye apeke ikwerenge anyente-irretyeke ahentye-aneme nhenge arne akurne akwetethe mpwarerlte-anemele, kele imerte the itnenhe-inpe rlkerte anthurre iletynhe-anteye-arle.

²³ 'The yanhe areye irrerlkngge atwetyenhe arelhe yanhe-arle apentemeke. Kele anteme atyewe Jesus-kenhe areyele apmere yanhe ingkirreke-ngentyele itelaretyenhe Ayenge-arle kwenhe akaltye-irretyenheke nthakenhe-arle tyerrtye ingkirreke itirremenge, tharle itelaremenge nthakenhe-arle tyerrtye ingkirreke akurrknggele itirreme. Nhenge angwenhe apeke apale anerle-anemele, the renhe iwetyenhe ure yanheke-arleke akwete-ante-arle amperle-anemeke. Nhenge angwenhe apeke arraty aneme, re alhetyenhe atyengenge akwete-ante anetyeke.

²⁴ 'Awerrirraye! Tyerrtye arrpenhemele arelhe yanhe awerlte-aneme angkemele, "Nhenhe kwenhe angkentye arrentye Satan-kenhe-arteke, anwerne ayeye anyelkngge-anyelkngge ikwerenheke akaltye aneme." Itne ayeyele

ilelheme itne-arle akwele akngerre aneme, arrangkwe-arle. Kenhe Thyatira-arenye arrpenhe areye, arrantherre renhe akwenpele aweme, nhenge rarle apale-apale akaltyele-anthemenge. Alakenhe ikwerenge anteme ayenge arrekantherre akangkemele aneme. The akenhe arrenhantherrenhe akwetethe uternetyakenhele anetyenhe iwenhe apeke renhe mpwaretyeke.

²⁵ ‘Alkngwirretyale anaye, iwerre arratyte atyinhe apentetyeke, impelhetyale anaye. Akwete akarelherlte-anaye nhenge ayenge apetyalpetyeke-atwetye.

²⁶ ‘Nhenge angwenhe apeke re arrentye Satan-ketye lterrke akwete aneme, warrke atyinhe mpwaremele, impetyakenhele, the kwenhe renhe arrernetyenhe apmere ingkirreke ahelhe nhenheke alartetye anetyeke. ²⁷ Ngkarteke kwenhe ayengeke-amparre arreneke apmere ingkirrekeke alartetye anetyeke, lyete anteme the arrenhantherrenhe arrerneme alartetye areye anetyeke alakenhe-anteye. Ayenge arne ingkirreke anthurreke alartetye anthurre anetyenhe, ayenge tyerrtye ingkirreke anthurreke lterrke anetyenhe. Nhenge itne apeke mwernte-irrerlenghe imerte arrenhantherrenhe awetyakenhe anemele kele arrantherre anteme itnenhe atwetyenhe, alakenhe anteye arrantherre apanthe ultakemele-arteke renhe ngkweltye-ilemele. ²⁸ The akngakeke-iperre arrenhantherrenhe alartetye anteyeke the kwenhe arrenhantherrenhe kwerralye tyeperre anthurre yanhe anthetyenhe nhenge-arle arratemele akertne-irremeke, uternenge arrekwele, ingweleme anthurre. ²⁹ Arrantherre kwenhe irlpe-akerte aneme! Kele mwantyele awerrirraye nhenge Utmenge Akngerre Ngkarte-kenhe areyeke angkerlenghe.’ ”

3

Angkentye Ngkarte-kenhe tyerrtye areyeke apmere Sardis-ele-arle anemeke

¹ Kele re atyenge awethe-anteye alakenhe angkeke, “Ayenge awaye! Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Sardis-ele-arle anemeke, ‘Ayenge arrekantherre angkeme: The kwenhe Utmenge Ngkarte-kenhe arntirrkweme, utmenge seven-arle anemeke, the kwerralye seven-arlke arntirrkweme. Ayenge kwenhe arrekantherre akaltye aneme, arne ingkirrekeke-arlke arrantherre-arle mpwaremeke. Atningke kwenhe angkeme arrantherre-arle ayenge mwerre anthurrele apenterlte-anemeke. Kenhe arrangwe-arle, arrantherre kwenhe ayenge apenteme nhenge tyerrtye ilweke-arle areyele-arteke. Arrantherre kwenhe Atyenge utmenge lterrke anthurrele anetyarte lyete anteme akenhe arrantherre atyeppe-atyeppe anetyakenhe anteme. ² Ayenge kwenhe akaltye aneme iwenhe-arle arrantherre mpwaremeke, ayenge akaltye aneme Ngkarte-arle atnerte akangkentye anetyakenhe aneme nhenge arrantherre warrke Ikwerenhe atyeppe-atyeppele mpwaretyakenhe anerlenge, arrantherre ilwetyeke-urletye aneme-arteke. Arelhewarraye, arraty-e-ilelhaye arrantherre alyepe-alyepe-irremeketye, kele Ngkartekte warrke-irretyeke utmenge impene-impenele. ³ Itelaraye nhenge arrantherre arrekwele-arle angkentye yanhe renhe aweke. Pipe-arenye alartetye areyele kwenhe arrenhantherrenhe akaltyele-antheke, arrantherre itneke aywerrke awelheke. Aywerrke akwete renhe awerlte-anaye arne akurne areye-ketye untyeme-irraye. Arelhewarremele anaye, arraty-e-irremele nhenge yanhe-ngentyele the apeke

arrenhantherrenhe atnulkelhe-ileme-ketye nhenge ayenge apeke apetye-alperlenghe ilelhetyakenhe ware. Arrantherre kwenhe apale aneme nhenge ayenge-arle apetye-alpetyenheke. ⁴ Arrpenheme ware Sardis-ele-arle aneme, Ngkarte akwete awerlte-aneme arne iwenhe apeke renhe mpwarerlte-aneme Rarle ahentye anemenge. Arrantherre mwerre anerlte-aneme untyeme anemele nhenge arne akurne mpwaremeketye, nhenge mantere arrekantherrenhe aterngge-irretyakenhe-arteke. Alakenhenge ikwerenge anteme arrantherre atyengenge apurte alhetyeke, nhenge mantere alkarle mperlkereke irrpemele, Ngkarte-arle kwenhe arrekantherre atnerte akangkentye anemenge. ⁵ Arrantherre apeke lterrke akwete anerlte-aneme, arrentye Satan-ketyenge untyeme-irremele, kele arrantherre mantere mperlkere yanhe-arteke akwetethe atnyenerlte-aneme. The kwenhe arritnye arrekantherrenhe pipe atyinheke intelhe-ileke arrantherre itethe akwete-ante anetyenhenge. The arritnye yanhe areye urrparetyakenhe anetyenhe nhenge arrantherre apeke ayenge akwetethe apenterlte-anemenge. Ayenge kwenhe Ngkartenge arrekwele angketyenhe Alkere-arenye Ikwerenhe areyenge-arlike arrantherre-arle atyewe atyinhe areye anemenge.’ ⁶ Arrantherre kwenhe irlpe-akerte aneme! Kele mwantyele awerrirraye, nhenge Utnenge Akngerre Ngkarte-kenhe areyeke angkerlenghe!”

Angkentye Ngkarte-kenhe tyerrtye areyeke apmere Philadelphia-larle anemeke

⁷ Kele re atyenge awethe-anteye alakenhe angkeke, “Ayenge awaye! Angkentye nhenhe alkere-arenyeke intelhe-ilaye atyewe Ngkarte-kenhe areye-arle

arntarnte-aremeke apmere Philadelphia-larle anemeke. Ikwere alakenhe angkaye: 'Ayenge-ante ware kwenhe mwerre aneme, ayenge-ante ware arratye anemele. The-ante ware kwenhe key yanhe atnyeneme arrange anwerne-kenhe David-kenhe. Key yanhele kwenhe arriwe anyente altywere-ilenhe-ilenhe. Yanhe ikwerenge kwenhe iwerre altywere Akngeye atyinhe-werne atheke. Nhenge the renhe altywere-ilemele, kele angwenhele apeke renhe uyarne-arle marteme. Nhenge the renhe martemele, kele angwenhele apeke renhe uyarne altywere-ileme. Ayenge nhenhe yanhe areyeke angkeme Philadelphia-larle anemeke. Ayenge awerrirraye! ⁸ Ayenge kwenhe arne ingkirrekeke akaltye aneme arrantherre mpwaremenge, ayenge akaltye-anteye aneme arrantherre utnenge lterrke akweke ware atnyenemenge. Ayenge kwenhe akaltye aneme arrantherre-arle akwetethe angkentye atyinhe awerlte-aneme, arrantherre-arle ayenge akwetethe apenterlte-aneme ayene-ilelhetyakenhele. The kwenhe arrekantherre arriwe altywere-ileke arrantherre kweneke irrptyenenge, tyerrtye arrpenhele arriwe renhe uyarne marteme.

⁹ 'Awerrirraye! Ayenge kwenhe akaltye aneme iwenhe-arle arrpenhe yanhe areye angkerlte-aneme itneke-arrpe-akerte. Itne kwenhe urrtiyirremele angkerlte-aneme alakenhe, "Anwerne kwenhe Jew areye, Ngkarte-arle awerlte-anemeke." Kenhe yanhe arratye anetyakenhe-arle. Itne kwenhe arrentye Satan-kenhe aneme. The anteme urrtyalthe yanhe areye akngetye-alpetyenhe itnenhe ingke arrekantherrenge kwene-iletienhe. Irlpe itnekenhe altywere-irretyenhe, itne akapertenge itelaretyenhe tharle arrenhantherrenhe mwantyele arntarnte-arerle-aneme. ¹⁰ The kwenhe

arrenhantherrenhe ileke ayenge akwetethe apenterlte-anetyeke, arratyete anteme arrantherre ayenge akwete apenterlte-aneke nhenge apurrke-irretyakenhele. Kenhe arrentye Satan-ele kwenhe tyerrtye areye apmere arrpe-anenhele arnterre anthurrele uternerle-anetyeke arrkerneme ayenge apenteme-ketye impetyeke atyengenge untyeme-irretyeke. Kenhe the akenhe arrenhantherrenhe mwantyele arntarnte-areme nhenge arrantherre apeke ayenge akwete apenterlte-anerlunge, arrentye Satan-ele anteme arrenhantherrenhe uyarne akurne-ileme. ¹¹ Ayenge kwenhe urreke-ulkere apetye-alpeme. Ayenge akwetethe arratyete apenterlte-anaye. The anteme arrenhantherrenhe arne iwenhe apeke renhe arratyete mwerre akngerre antheme. Kenhe arrantherre apeke atyenge-ketye untyeme-irreme, kele-anteye-arle arrantherre arrpenhe awetyeke arrenhantherrenhe-arle ilemeke atyenge-ketye artepe untyeme-irremele anetyeke, kele the arrenhantherrenhe arne mwerre akngerre yanhe renhe anthetyakenhe, arrangkwe-arle. ¹² Ye, ayenge akwete apenterlte-anaye, the anteme arrenhantherrenhe apmere Akngeye atyinhe-kenheke arrerneme nhenge yanhenge arrantherre akwete-ante anetyehenge Renhe tnakewarremele. Arrantherre yanhe ikwerele anerlte-anetyenhe, alhetyakenhe anthurre. Nhenge arrantherre apeke ayenge akwete arratyete apenterlte-anerlunge, arrentye Satan-eke ularre-irretyakenhe anetyeke, kele the arrekatherre-arleke arritnye Akngeye atyinhe-kenhe intelhe-iletynhe. Alakenhe-anteye the arrekatherre-arleke apmere arritnye Akngeye atyinhe-kenhe intelhe-iletynhe, apmere alkarle Jerusalem-arle, arritnye atyinhe alkarle-inpe. Apmere yanhe re kwenhe urreke alkere-ngentyele kwene-akerle apetyetyenhe, Ngkarte-ngentyele.

¹³ Arrantherre kwenhe irlpe-akerte aneme! Kele mwantyele awerrirraye, nhenge Utnenge Akngerre Ngkarte-kenhe areyeke angkerlengle!’ ”

Angkentye Ngkarte-kenhe tyerrtye areyeke apmere Laodicea-le-arle anemeke

¹⁴ Kele re atyenge awethe-anteye alakenhe angkeke, “Angkentye nhenhe alkere-arenyeke intelhe-ilaye atyewe Ngkarte-kenhe areye-arle arntarnte-aremeke apmere Laodicea-elarle anemeke. Ikwere alakenhe angkaye: ‘The apele nhenge angkentye Ngkarte-kenhe-arle ar-ratyeye ilerle-aneme. Arlte arrekwele anthurrenge Akng-eye ilerne apmere ahelhe nhenhe uthene alkere uthene mpwarerle-anerke. Re kwenhe ayenge arrerneme arne ingkirreke anthurreke alartetye anetyeke Rarle mp-warekeke.

¹⁵ ‘Ayenge kwenhe arrekkantherre akaltye aneme, arne ingkirrekeke nhenge arrantherre-arle mpwaremeke. Arrantherre kwenhe ayenge irrpelthe-irrpelthele apentetyakenhe, arrantherre akenhe anerlte-aneme ankwe intetyeke-urletye-arteke. Ayenge kwenhe arrekkantherre ahentye aneme ayenge irrpelthe-irrpelthe anthurrele apenterlte-anetyeke. Ayenge kwenhe arrekkantherre ahentye aneme akarre anthurre anerlte-anetyeke nhenge arrantherre ayenge apentemele. Kenhe arrantherre apeke ayenge ipmentye impeme, kele mwerre-arle, ayenge-arle arrekkantherre ahentye anetyakenhenge ayenge ankwe-ankwe ware apentetyeke.

¹⁶ Mwantye arelhewarraye! Nhenge arrantherre apeke alakenhe akwete apenterlte-anerlengle, the apeke arrenhantherrenhe iweme-ketye, nhenge tyerrtyele merne mpenge akweke ware arlkweme imerte pelhe-iwemele, alakenhe-anteye the arrenhantherrenhe ipmentye-iweme.

¹⁷ ‘Arrantherre itirreme, arrantherre-arle akwele ayenge arratye apentemeke-athene. Arrantherre anteme angkerreme, “Anwerne kwenhe apwerte ngkweltye akngerre-akerte. Anwerne kwenhe arne arrpe-anenhe ingkirreke anthurre-akerte.” Yanhe kwenhe arratye anetyakenhe, arrantherre kwenhe apale angkerlte-aneme. Akunye areye. Arratye kwenhe arrantherre arrangwe anthurre atnyeneme. Arrantherre kwenhe mantere kwenye aneme-arteke, alknge pwenge-arteke. Apurenge apelaye!

¹⁸ ‘Kele ayenge awerrirraye. Atyenge-werne utepe-irraye, arrantherre anteme gold arratye anthurre inetyenhe gold yanhe apwerte ngkweltye akngerrenge mwerre anthurre ulkere. Nhenge arrantherre apetyemele the arrenhantherrenhe mantere mperlkere irrptyeke anthetyenhenge, arrantherre anteme tyerrtye akethe alheme-ketye apure-irremele. The arrenhantherrenhe merrethene antheme alknge pwengeke, arrantherre anteme apernelheme mwerre aretyeke. ¹⁹ The kwenhe arrekantherre nhenhe ileme ayenge-arle kwenhe arrekantherre atnerte ahentye anthurre anemenge. Tyerrtye yanhe areyeke ayenge-arle ahentye anemeke, the kwenhe itnenhe mwantye-mwantye-ileme itneke ahele-ahele angkemele, nhenge yanhe-ngentyele itne akaltye-irretyenhenge atyenge mwerrentye iwerre arratyele anetyenhenge. Alakenhe ikwerenge anteme the arrenhantherrenhe alkngetherre ileme, nhenge arrantherre atyenge-werne atheke akngarte-iwelhetyenhenge arne akurne mpwarerlte-aneme-ketye. ²⁰ Awerrirraye! Ayenge kwenhe arriwele tnerle-aneme ltare atwemele, arrekantherre arlkerle-anemele. Kele angwenhele apeke ayenge aweme arlkerle-anerlenge arriwe-arlke altywere-ilemele kele ayenge

irrpenehemele imerte ikwerele-arlenge anemele merne ikwerenge arlkwemele, itne atyengenge arlkwerlengenge.

²¹ 'Ayenge arratyete akwete apenterlthe-anaye nhenge utnenge lterreke anemele, the anteme arrenhantherrenhe atyenge itweke arrernetyenhenge, arrantherre alartetye-anteye atyengenge anetyenhenge tyerrtye areye arntarnte-aremele. The kwenhe arne ingkirreke mpwareke Ngkarte ahentye anekenge, ayenge kwenhe arrentye Satan-eke ularre-irretyakenhe. Nhenge ayenge ilweke-arle-iperrele awethe itethe-irritneke, ayenge Ngkartenge itepeke aneke chair mwerre akngerre anthurre ikwerenge. Ilerne apmere ahelhe nhenhe renhe ingkirreke anthurre apurtele arntarnte-arerle-anerreme. Alakenhe renhe-anteye arrantherre atyengenge anetyenhe apmere ahelhe nhenhe ingkirreke arntarnte-aretyenhenge.

²² 'Arrantherre kwenhe irlpe-akerte aneme. Kele mwantyele anteme awerrirraye arrantherre akaperte-werne ilettyenhenge nhenge Utmenge Akngerre Ngkarte-kenhe areyenge angkerlengenge!' "

4

Alkere akertnenge-arle itne Ngkarte utyernemele tnaketyame

¹ The arne ingkirreke yanhe areye areke-arle-iperrele, the arne arppenhe anthurre areke. The alkere akertnele areke arriwe arppenhe altywere-irrerlengenge. The angkentye renhe-anteye aweke, arnterre anthurre angkerlengenge arne nhenge trumpet-arteke. Atyenge re angkeke, "Akertne-werne apetyaye! The kwenhe ngkwenge arne arppenhe areye imernetyekehentye

aneme urreke-arle irretyenheke.” ² Iparrpe anthurre-arle Utmenge Ngkarte-kenhe atyengenge apurte-irreke atyenge anteme imerneke. The chair mwerre akngerre anthurre areke alartetye anentye akngerre alkere akertnenge tnerle-anerlenghe. Arrpenhe chair yanhe ikwerenge anetyame. ³ Inngerre ikwerenhe imparrkeke, nhenge apwerte mwerre akngerre areye-arteke uternenge imparrkemele, mwerre akngerre intelhentye akngerre anteye, jasper uthene carnelian uthene akerlenghe. Kenhe mpwelarre mwerre akngerre anthurre aneke chair ikwerenge itepe arrpe-anenhe, re pwarthyeme anteye. ⁴ Kenhe yanhe ikwerele aneke chair arrpenhe 24 aneke, itne chair akngerre yanhe ikwerenge itepe arrpe-anenhele. Chair yanhe ikwere areyenge aneke alartetye 24 ingkirreke mantere mperlkereke irrpekele, akaperte itnekenhenge aneke arne nhenge akaperte-kenhe tyellarre-arteke tyerrtyele-arle gold-engentyele mpwarekeke. ⁵ Chair yanhe ikwerengentyele aneke nhenge mpepe anthurrenge arne iwenhe apeke re alharrketyeme nhenge kwatye-ngentyele alharrkeme-arteke nhenge kwatye angkeme-arteke, aywerre akngerre-irrerlenghe. Chair-nge arrekwele aneke, ure alkngenthe alepe seven ampetyame, itne kwenhe aneke utmenge Ngkarte-kenhe seven-pele. ⁶ Kenhe chair yanhe ikwerenge arrekwele aneke ahelhe anetyakenhenge-arteke re akenhe arne arrpenhe kwenhe kelathe-arteke aneke nhenge mwerre akngerre anthurre, nhenge kwatye alkarle-arteke.

Mpwepenge chair ikwere itwele aneke, arne four-pele atnunthe-arteke tnerlenghe. Itne alknge atningke anthurre-akerte arerreke-arleke artepeke-arleke-arlike, arunthe anthurre. Itne chair ikwere-arlenghe itepe arrpe-anenhele aneke. ⁷ Kenhe arne itethe yanhe ar-

eye alknge atningke-akerte inngerre arrpenhe anthurre-akerte. Anyente kwenhe lion-arteke aneke, arrpenhe pweleke-arteke aneke, arrpenhe tyerrtye-arteke aneke, kenhe arrpenhe akenhe irretye-arteke alkere akertneke-irreme. ⁸ Itne kwenhe irlpelhe atherre-akerte-ante ware anetyakenhe aneke, re akenhe irlpelhe six-pele arrpenhe anthurre-akerte kwenhe aneke, alknge-ante tyerrtye itne-kenheke-arlenge aneke, irlpelhe lhenpele aneke alknge atningke anteye-arle. Atnunthe yanhe areye arltele uthene ingwele uthene alakenhe akwetethe alyelhpepeltome:

“Ngkarte, Alartetye anthurre kwenhe tyeperre ameke-ameke anthurre aneme.

Re kwenhe arlte arrekwele anthurrele anentye akngerre, lyete anteme aneme,
Re akwete-ante anerle-anetyenhe uyerretyakenhele.”

⁹ Alakenhe rarle, itne akwete alyelheke tnakemele anyente yanhe renhe chair mwerre akngerrele-arle anemeke, akwete-ante-arle itethe anerle-anetyenheke. Nhenge itne alyelherlte-anemele, ¹⁰ alartetye 24 kwenhe artepe kwene-irretyame chair-nge arrekwele Renhe tnakemele, akwete-ante-arle anerle-anemeke. Itne tyellarre gold ilywelheke itnenhe atheneme chair-nge arrekwele, alakenhe anteme angkemele: ¹¹ “Ngkarte Akngeyaye! Unte kwenhe alartetye anthurre anwerne-kenhe aneme, Ngkwenge mwerre kwenhe aneme, Unte anwernenhe ingkirreke aretyeke Ngenhe tnakewarrrenge,

Unte-arle kwenhe Utmenge Ngkwihinhe arne ingkirreke anthurre aknganekenge.

Unte-arrpe kwenhe itirreke arne ingkirreke mpwaretyeke, ingkirreke apmere ahelhe nhenheke

alkereke-arlke arrernetyeke nhenge itethe ane-tyeke.”

5

Itne Yepe-Yepe Akwerrke tnaketyame

¹ The kwenhe renhe areke nhenge chair mwerre akngerre anthurre-arle anemeke pipe imarteye-iweke-arle iltje akwe-arratyete arntwirrkerlengje. Arrpenhele angkentje areje intelhe-ileke-arle arrekweleke ingkerneke-arlke pipe yanhe ikwere. Arrpenhele angkentje yanhe areje read-eme-iletjakenhe aneke arrpenhele-arle kwenhe ankere apurte-arteke 7 pipe-ke-arleke arrernerlengje itnenhe ayernemele nhenge altywere-irreme-ketye. ² The anteme alkere-arenje lterrke anthurre areke arnterre angkerlengje. Alakenhe kwenhe re angkeke, “Angwenhe-ame aneme Ngkartele-arle akngakekeke ankere nhenge ularte-iwetyeke pipe renhe altywere-iletjeye? Artwe mwerre anthurrele-ante kwenhe renhe altywere-iletjeye.” ³ Kele itne apmere arrpe-anenhe areke imerte arrpenheke uyarne untheke nhenge ankere renhe-arle ularte-iwetyeke pipe renhe altywere-iletjeye renhe aretyeke, itne-arle alkerenge uthene ahelhenge uthene kwenhe apale-untheke artwe mwerre anthurre anyenteke-ante, nhenge ahelhe kwenenge-arlke kwenhe itne uyarne untheke, arrangwe-akwete-arle aneke. ⁴ Nhenge the nhenhe renhe aremele ayenge arnterre anthurre artneke itne-arle artwe mwerre anyenteke uyarne anthurre unthekenge pipe renhe altywere-iletjeye renhe aretyeke. ⁵ Kele alartetye anyente anteme atyenge angkeke, “Artnetyale anaye! Araye, lterrke akngerre anyente-arle lion-arteke-arle nhakwe tnerlengje Judah-ekje artweje areje-ngentyele. Re kwenhe arratyete mwerre anthurre

aneme, Re kwenhe alartetye David-kenheke artweyengentyele aneme, re ilyenpenye anthurre; atwentye arrpenhe anthurre. Re kwenhe ameke-arle-areye aneke. Alakenhe ikwerenge anteme rarle thewe pipe renhe-arle inetyeke ankere renhe ularte-iwemele altywere-iletuyenhe imerte renhe aremele.”

⁶ Ikwere-iperrele anteme the areke yepe-yepe urreye akweke * tnerle-anerleng chair mwerre akngerre ikwere itwele nhenge atnunthe arlpelhe-akerte 4-pele mpwepele alartetye 24 areyele-arlike. Nhenge the Yepe-Yepe Akwerrke areke imerte ayenge itirremele, “Renhe apeke arrpenhele akwele irrerlkng atweke, re akenhe awethe itethe-anteme-irrirtneke.” The areke rarle rulye-rulye seven-akerte alknge seven-akerte anerleng. Alknge seven yanhe areye aneke utnenge seven Ngkartele-arle apmere ahelhe nhenhe itepe arrpe-anenhe-werne yernekeke. ⁷ Yepe-Yepe Akwerrke yanhe alheke pipe imarteye-iweke-arle renhe arrpenhe-ngentyele inemele chair anyente-arle anekeke renhe iltye akwe-arraty ikwerenhele arntwirrkemele. ⁸ Nhenge re pipe ineke-arle, atnunthe arlpelhe-akerte four-pele uthene alartetye twenty-four uthene Yepe-Yepe Akwerrke ikwerenge arrekwele ulperre inteke inngerre kwene-akerle renhe tnaketyeke. Itne arrpe-anenhele arne guitar-arteke atnyeneke, apanthe-arlike gold-engentyele-arle mpwarekeke. Apanthe areyengentyele kwerte ntyentye mwerre akngerre Ngkarteke akertne-atheke urnteme, nhenge re kwerte mwerre akngerre ntyernemele Re atnerte akangkentye anthurre aneke. Kwerte nhenhe kwenhe alakenhe-arteke aneke nhenge atyewe Ngkarte-kenhe areye ikwere angkeme.

* 5:6 Yepe-yepe urreye akweke nhenhe kwenhe Jesus Christ-arle aneme.

Re itnenhe aweke akangkemele anteme aneme, nhenge alakenhe-arteke re kwerte ntyentye mwerre akngerre ntyernemele. ⁹ Kele imerte atnunthe four-pele uthene alartetye twenty-four uthene Yepe-Yepe Akwerrke ikwere alyelhentye arrpenhe alakenhe alyelhemele:

“Unte anyente ware kwenhe arraty mwerre anthurre-ulkere aneme pipe imarteye-iweke-arle inetyeke renhe altywere-ilettyeke.

Unte-ante ware kwenhe ankere ularte-iwetyeke renhe altywere-ilettyeke,

unte-arle kwenhe anwerneke piwelhemele ilweke, arrule anthurre-arle,

alhwe ngkwihwe tyerrtye ingkirreke apmere arrpe-anenhe-arenye areyke thelelhomele.

Unte tyerrtye areye itetheke mpwareke angkentye arrpenhe-arle angkemeke, tyerrtye areye yenpe arlkenye arrpenhe-akerte-arle, tyerrtye areye apmere arrpe-anenhe-arenye areye-arle.

Unte itnenhe Ngkarte-werne akngetye-alpeke, nhenge yanhe-ngentyele itne Ikwerenhe anetyenhenge.

¹⁰ Kele itnekenhe alartetye irreke-arle unte itnenhe kwertengerle tyatye-kenhe areye anetyeke arrerneke warrke Ngkarte-kenhe aywerrkele mpwarerlte-anetyeke,

arlte urreke-arle anteme itne tyerrtye ingkirreke anthurre arntarnte-areme anteme apmere ahelhe nhenhele-arle anemeke.”

¹¹ Nhenge the akwete aretyame the alkere-arenye atningke anthurre areke, arunthe anthurre itne aneke, yerre areye-arteke. Itne kwenhe chair mwerre akngerre yanhele itepe arrpe-anenhe tnytyame, atnunthe four-pele areye-arlke alartetye twenty-four areye-arlke. ¹² The

itnenhe ingkirreke anthurre alyelherlenge aweke, arnterre anthurre alakenhe arlkemele:

“Anwerne Yepe-Yepe Akwerrke yanhe renhe akwetethe akertne utyernerlte-aneyel! Renhe-arle itne irrerlknge atweke, kenhe re akenhe awethe-arle itethe-irrirtnerlenge, re mwerre akngerre anthurre aneme.

Yepe-Yepe Akwerrke yanhe re alartetye anthurre anwerne-kenhe aneme Utnenge Ngkarte-kenhe-akerte,
nhenge arne ingkirreke atnyenemele, re itnenhe akwetethe mwantyele antherle-aneme.

Re kwenhe akaperte altywere anthurre aneme, araty akwetethe itirrerle-aneme,
re arne areye ilyernpenye mpwarerle-aneme.

Kele anwerne renhe akwetethe akertne utyernerlte-anemele tnakewarreye.”

¹³ Ikwere iperrele anteme the arne ingkirreke alyelherlenge aweke Ngkartele-arle mpwarekeke, tyerrtye-arlke, atnunthe-arlke, thipe-arlke, irrpennge-arlke, arne ingkirreke apmere ahelhele-arle anemeke, alkerere-arlke, kwatye kwenele-arlke. Itne ingkirreke alakenhe alyelheke:

“Tyerrtye ingkirrekele kwenhe yanhe renhe akertne utyernerlte-anemele tnaketyeke, renhe chair mwerre akngerrele-arle anerle-anemeke! Itne Yepe-Yepe Akwerrke akwetethe akertne utyernerlte-anemele tnaketyeke!

Yanhe atherre kwenhe arraty mwerre akngerre aneme, nhenge arne ingkirreke ilyernpenye anthurre mpwaretyeke, Ratherre apmere arrpe-anenheke alartetye anerle-anerremele.

Kele anwerne ikwere-atherre akangkemele artepe kwene-irremele, akwetethe alyelhemele, tnakemele anteye, akwetethenhe-akwetethe!”

¹⁴ Nhenge itne alyelhentye uyerremele, atnunthe four-pele chair akngerre-apenhe yanhe ikwere-arle itwele tnetyameke, alakenhe angkemele, “Yewe, yanhe kwenhe mwerre anthurre-arle!” Alartetye 24 areye artepe kwene-irremele anteye Renhe akertne utyernemele tnakeke.

6

Rarle thewe, Yepe-Yepe Akwerrke-arteke-arle anemeke, ankere pipe imarteye-iweke-arle-nge ularte-iweme

¹ The anteme Yepe-Yepe Akwerrke-arteke areke pipe imarteye-iweke-arle renhe ankere arlware seven-akerte akwete arntwirrkerlenge. Nhenge the aretyamele re ankere arlware anyente-urrke pipe-ngentyele ularte-iwerlenge. The anteme aweke four-pele atnunthe-ngentyele anyente angkerlenge, angkentye kwatye angkemele-arteke, “Apetyaye.” * ² Nhenge re arlkeke, the areke nanthe mperlkere arraterlenge-arle. Artwe irrtuarte-akerte nanthe artepele, arrpenhele renhe tyelarre mwerre akngerre anthekenge nhenge imernetyeke rarle alartetye atyeperre anemenge. Re nanthe artepele alheke, tyerrtye yanhe areye irrerlkngge atwetyeke ikwere-arle ahentye anetyakenhe anekeke. Rarle kwenhe atwerretyeye ilyernpenye anthurre aneke.

Rarle thewe, Yepe-Yepe Akwerrke-arteke-arle anemeke, ankere arrpenhe anteme, ularte-iwetyeke

* 6:1 Ankere nhenhe kwenhe anwerne-kenhe-arteke anetyakenhe arpenhe kwenhe aneme, nhenge arne iwenhe apeke ikwereke-arleke arrrnerlenge re mwerre ularte-iwerlenge.

³ Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularite-iweke. Kele imerte the aweke atnunthe arrpenhe arrpenheke arlkerlunge, "Apetyaye!" ⁴ Kele anteme artwe arrpenhe nanthe athethekeke-arlunge arrateke. Ngkartele artwe renhe alyweke arlpentye akngerre antheke-arle renhe ileke alhetyeke tyerrtye areye apmere ahelhe arrpenenhe-arenye uternetyeke ingkirreke atwerretyeke, irrerlunge atwerretyeke nhenge yanhenge itne mwerre awethe anetyakenhe anetyenhenge.

Rarle thewe, Yepe-Yepe Akwerrke-arteke-arle anemeke, ankere arrpenhe anteme, ularite-iweme

⁵ Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularite-iweke. Kele imerte the aweke atnunthe arrpenhe arrpenheke arlkerlunge, "Apetyaye!" The iparrpe anthurre areke artwe arrpenhe nanthe urrperleke-arlunge arrateke. Artwe yanhele iwenhe apeke renhe atnyenemele merne ulthentye apeke aretyeke. ⁶ The anteme iwenhe apeke renhe ahentye-arteke aweke atnunthe four-pele areyengentyele arraterlunge. Re kwenhe artweke alakenhe angketyame nantheke-arlungeke, "Arlite lyete ulkere, artwe kwenhe ingweke-atwetye warrke-irreme, kele anteme apwerte ngkweltye ikwerenhe inemele imerte ngkweltye renhe uyerrelhe-ilemele merne akweke ware inetyeke. Re ngkweltye ikwerenhele tyampite anng wheat-akerte anyente-ante ware inetyeke, tyampite barley-akerte urrpetye-arlike apeke. Kele mwantyele awerrirraye, arne olive-akerte areye-arlike, arne kripethe areye-arlike mwantyele arntarnte-araye, itnenhe ultaketyale anteme anaye."

Rarle thewe, Yepe-Yepe Akwerrke-arteke-arle anemeke ankere arrpenhe anteme ularte-iweme

⁷ Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularte-iweke. Kele imerte the aweke atnunthe arrpenhe arlkerleng, “Apetyaye!” ⁸ Kele anteme the areke nanthe arrerlkere arraterleng, nanthe yanheke-arleng artwe arritnye-arle “Atwenhe-atwenhe-arle” ilemeke. Artwe arrpenhe nantheke-arleng ingkernele apetyemele, arritnye-arle “Ahelhe Irrare” ilemeke. Arrpenhe ikwere-atherre angkeke, “The kwenhe mpwelenhe yerneme apmere arrpe-anenhe-werne alhetyeke, tyerrtye arrpenhe areye ilyernpenyele irrerlkng atwetyeke. Kenhe arrpenheme ilwetyenhe nternenheke-arle iperreng, arrpenheme ilwetyenhe angayakwe akngerre-irreke-arle iperreng ahurratye akngerre-arle anerleng, kenhe arrpenheme akenhe ilwetyenhe rlkerte akngerre-arle ipenhele, kenhe arrpenheme akenhe ilwetyenhe nhege atnunthe ahe akngerrele itnenhe arlkweme. Alherraye, alakenhe renhe mpwarerle-anerraye, kenhe tyerrtye ingkirreke atwemeketye, nhege arrpenheme ware itne ilwetyeke. Nhege ratherre apeke tyerrtye anyente irrerlkng atweme, arrpenhe urrpetye itethe akwete anemele impetyeke, alakenhe re.”

Rarle thewe, Yepe-Yepe Akwerrke-arteke-arle anemeke ankere arrpenhe anteme ularte-iweme

⁹ Kele rarle thewe, Yepe-Yepe Akwerrke-arteke-arle anemeke, ankere arrpenhe anteme ularte-iweke. Kenhe the kwerrre atningke areke arrpenhe areyele-arle irrerlkng atwekeke. Itne ure rerrkng kwenele nhege tyerrtye areyele-arle arne areye akngetyetyarte imerte itnenhe Ngkarteke itemele. Tyerrtye areyele

itnenhe irrerlknge atweke-arle, itne-arle Ngkarte arratyte itelarekenge, itne-arle akwetethe unthetyarte arrpenhe areyeke ayeye mwerre Jesus-akerte ilerlte-apemele. ¹⁰ Kwerrrene yanhe areye kwenhe irntherre angkemele, “Ngkarte Alartetye-aye, Unte apele lterreke akngerre anthurre aneme, Unte kwenhe arratyte mwerre anthurre aneme, Unte kwenhe arratyte angkerle-aneme. Ilengare-ame Unte tyerrtye ingkirreke apmere ahelhe nhenhe-arenye court-eke ngkernetyenhe itnenhe akalkelhe-ilemele imerte irrerlknge atwemele itne-arle anwernenhe irrerlknge atwenge?” ¹¹ Kele Ngkartele itnenhe ingkirreke mantere mperlkere irrpetyeke antheke itneke angkemele, “Akarelhemele anaye, The kwenhe arrpenhe areye akngakeke, nhenge alakenhe-anteye-arle ilwetyenheke arrantherre-arle ilwekeke-arteke itne-arle Jesus apenterlte-ankenge ikwere warrke-irrerlte-anemele. Ikwere-iperrele anteme The itnenhe arrekantherrenge apurtelhe-iletienhe-anteye. Ikwere-ante ware anteme The arrpenhe areye akalkelhe-iletienhe arrenhantherrenhe-arle irrerlknge atwekeke.”

Rarle thewe, Yepe-Yepe Akwerrke-arteke-arle anemeke ankere arrpenhe anteme ularte-iweme

¹² The kwenhe renhe areke, rarle thewe Yepe-Yepe Akwerrke-arteke-arle anemeke, ankere arrpenhe anteme ularte-iweke. Kele ahelhe-anteme akngelhetyeke-irreke akiltye-irremele. Arlennge pwarotyetyakenhe aneke ingwemerte-anteme-irreke, kenhe atnyentye-arlike akenhe alhwe-arteke athetheke-irreke. ¹³ Kenhe kwerralye atningke alkere-ngentyele ahelhe-werne-atheke atnyeke. Arrantherre itelareme nhenge nthakenhe-arle rlke akngerrele antethe areye atnyetyeke uyerretyeke anteme mpwareke, alakenhe-arteke.

¹⁴ Kenhe alkere uyerreke, nhenge tyerrtyele pipe imarteye-iweme-arteke. Apworte antherrtye ingkirreke akngelhetyame, akeme-irremele anteme apmere arrpenheke-arleke arrrnelhemele. Apmere akweke areye nhenge kwatye mpwepele-arle anemeke, itne-arlke kwenhe akngelhetyame alakenhe re-anteye. Itne ingkirreke anthurre-arle akngelheme apmere anyentengentyele apmere arrpenhe-werne. ¹⁵ Ikwere-ipperrele anteme, tyerrtye ingkirrekele Ngkarte-arle arratye itelaretyakenhe anekeke, inteye areyeke irrpemele itne-arle kwenhe atere-arlpe-irremenge. Kenhe alartetye anthurre ingkirreke apmere ahelhe nhenhe-arenye areye, atwerrentye akngerre areyeke-arlke alartetye, tyerrtye apworte ngkweltye akngerre-akerte areye-arlke, arrpenhe areye-arlke alartetyeke-arle warrke-irremeke, arrpenhe areye-arlke itneke-arrpe-arle warrke-irremeke, ingkirreke aterele alwirreme. Arrpenheme inteye kwenele alengke-iwelheke, kenhe arrpenhe areye akenhe apworte akngerre-apenhe areyele-arleng alengke-iwelheke. ¹⁶ Itne apworte areyeke arlketyame, “Anwerneke-arleke atnyerrirraye, anwernenhe Ikwere-ketye alengke-iwemele, Ikwere-ketye thewe chair mwerre akngerrele-arle anemeke anwernenhe areme-ketye. Kele-anteye-arle Yepe-Yepe Akwerrke-arteke apeke anwerneke ahele-irreme-ketye imerte anwernenhe irrerlknge atwemele. ¹⁷ Arlte anwerne-kenhe kele-arle aneke nhenge ratherre imernetyeke ratherre-arle anwerneke ahele anthurre anemele. Lyete kwenhe ratherre anwernenhe ureke iwetyeke-urletye, anwerne apatemele anthurre anetyenhenge anwerne-arle renhe-atherrenhe uyarne ayakemenge.”

7

Alkere-arenye Ngkarte-kenhe areyele tyerrtye Israel-arenye 144,000-eke-arleke imperre arrerneme

¹ Nhenge ikwere-iperrele the areke alkere-arenye four-pele tnerlte-anerlenge, anyente kwenhe Ikngerrele tnerle-anetyame, anyente akenhe Alturlele, anyente akenhe Ayerrerele, anyente akenhe Antekerrele. Itne kwenhe aperretyame rlkele werneme-ketye, re wernetyakenhe anetyeke apmere ahelhe nhenhe akethe-ante arrerneme-ketye, kwatye alaye-arlke, arne areye-arlke.

² The anteme areke alkere-arenye arrpenhe Ikngerrengentyele atyenge-werne-atheke apetyerlenge. Kenhe re akenhe iltye ikwerenhele atnyeneke arne nhenge imperre arrernetyeke, nhenge re tyerrtye areyeke-arleke imperre arrernetyehenge Ngkarte-kenhe areye-arle atyene anemeke. Re alkere-arenye four-peleke arnterre anthurre angkemele rlkele-arle aperretyameke werneme-ketye, ³ “Akwete akarelhaye, ahelhe-arlke, kwatye alaye-arlke, arne areye-arlke akwete akethe-ante arrernetyale anaye. Anwerne kwenhe urlle itne-kenheke-arleke imperre arrernetyeke Ngkarte-arle arratye itelaremeke, warrke Ikwerenhe-arle aywerrkele mpwarerlte-anemeke.” Re kele urleke-arleke intelhe-ilettyeke irreke yanhe areyeke warrke Ngkarte-kenhe-arle aywerrkele mpwarerlte-anemeke. ⁴ Alkere-arenyele anteme atyenge ileke, “Tyerrtye nhenhe areye kwenhe alere 12-pele artwe ampwe Israel-kenhe-ngentyele arrateke, yanhe kwenhe yerre anthurre aneme, 144,000. Arrule anthurre-arle Israel-ele alere twelve-pele atnyeneke-arle, alere itnekenhe arritnye aneke Judah, Reuben, Gad, Asher, Naph-tali, Manasseh, Simeon, Levi, Issachar, Zebulun, Joseph,

Benjamin uthene. Itneke-ngentyele aneke nhenge atyemeye areye ikwerenge-ntyeye akwerrke-ipenhe atningke-ame-atningke-irreke. ⁵ Kele itne urlle itne-kenheke-arleke imperre arrerneke:

atyemeye 12,000 peleke Judah-kenhe areye-ngentyele,
 atyemeye 12,000 peleke Reuben-kenhe areye-
 ngentyele,

atyemeye 12,000 peleke Gad-kenhe areye-ngentyele,

⁶ atyemeye 12,000 peleke Asher-kenhe areye-
 ngentyele,

atyemeye 12,000 peleke Naphtali-kenhe areye-
 ngentyele,

atyemeye 12,000 peleke Manasseh-kenhe areye-
 ngentyele,

⁷ atyemeye 12,000 peleke Simeon-kenhe areye-
 ngentyele,

atyemeye 12,000 peleke Levi-kenhe areye-ngentyele,

atyemeye 12,000 peleke Issachar-kenhe areye-
 ngentyele,

⁸ atyemeye 12,000 peleke Zebulun-kenhe areye-
 ngentyele,

atyemeye 12,000 peleke Joseph-kenhe areye-ngentyele,

atyemeye 12,000 peleke Benjamin-kenhe areye-
 ngentyele-arlike.

Itne urlle itneke-kenheke-arleke imperre arrerneke nhenge imernetyeke Ngkartele-arle itnenhe ingkirreke anthurre akayake-ileme.”

*Tyerrtye atningke anthurre chair mwerre akngerre anthur-
 rene arrekwelele tnerrirreme*

⁹ Ikwere-iperrele anteme the tyerrtye atningke anthurre areke tnerlte-anerlenghe, yanhe ikwerele atningke anthurre aneke, nthakentye apeke uyarne

itelareme. Itne kwenhe apmere arrpe-anenhe-ngentyele apetyeke, angkentye arrpe-anenhe itne angkeke, apmere ahelhe arrpe-anenhe-ngentyele, ayenpe arkenye arrpe-anenhe-ngentyele. Itne chair mwerre akngerre anthurrenge arrekwele tnerirretyame, Yepe-Yepe Akwerrke-artekenge-arlke, itne ingkirreke mantere mperlkereke irrpeke. Ilyte itnekenhele itne arlpelhe arlpentye akngerre atnyeneke nhenge arne date-ngentyele-arteke. ¹⁰ Itne anteme arlkeke alakenhe angkemele, “Ngkarte, chair-elarle anemeke uthene Yepe-Yepe Akwerrke-arteke uthenele anwernenhe akayake-ileke-arle, anwernenhe mwantyele arntarnte-aremele ilweme-ketye. Anwerne anteme renhe-atherrenhe akwetethe akertne utyernerlte-anemele tnaketyenhe.” ¹¹ Kenhe alkere-arenye ingkirreke akenhe chair yanhe ikwerele tnerirreke, alartetye 24 areye-arlke, atnunthe 4-pele-arlke. Itne ingkirreke anthurre artepe kwene-irremele, ulperre interirremele, Ngkarte akertne utyernemele tnakewarreke, ¹² alakenhe angkemele, “Yewe, Unte Ngkarte anwerne-kenhe kwenhe arratye mwerre anthurre aneme, Unte kwenhe ingkirreke anthurre ilyernpenye anthurrele akwetethe mpwareme, akaperte altywerele mpwarerle-anemele. Anwerne kwenhe Ngkwenge akwetethe akangkemele aneme Ngenhe akwetethe tnakewarremele. Unte kwenhe Ngkarte anwerne-kenhe itethe akwete-ante anerle-aneme. Ye, yanhe kwenhe mwerre aneme.”

¹³ Kenhe alartetye anyentele akenhe ayenge apayuth-neke, “Angwenhe apeke-ame tyerrtye nhenhe areye mantere mperlkere-akerte? Nthenhe-ngentyele-ame itne apetyeke?” ¹⁴ Ayenge anteme ikwere angkeke, “Yekwe, ayenge akutne. Unte apeke-arle itelareme.”

Re-anteme atyenge angkirtnerlenge, “Arrpenhe

areyele kwenhe itnenhe arlkarentye-iletyarte, itnenhene atwemele, rllkerte anthurre ilemele. Kele anteye-arle re apeke itneke akurne anthurre irreke, itne Ngkarte-ngentyele akwete untyeme-irretyakenhe. Itne kwenhe arrekwele arne akurne areye mpwaretyarte, itne akenhe itelareke Yepe-Yepe Akwerrke-arteke-arle itneke ilwekenge, alhwe ikwerenhe itneke thelelheke. Itne anteme mantere itnekenhe alhwe Yepe-Yepe Akwerrke-kenhenge alheweke itnenhe mperlkere-ilemele. ¹⁵ Alakenhe ikwerenge anteme itne kwenhe chair mwerre akngerre Ngkarte-kenhenge arrekwele tnerlte-aneme, ingwartentyele arltele-akake tyatye Ikwerenhele Ikwere akwetethe warrke-irremele. Rarle thewe, chair-elarle anerle-anemeke, itnenhe arntarnte-aremele, re itnekenge akwetethe anerle-aneme. ¹⁶ Itne kwenhe awethe angayakwe-irretyakenhe anetyenhe nhenge kwatyeke angkethakwe-irretyakenhe anetyenhe. Kenhe arlengele apeke urele apeke itnenhe awethe ampetyakenhe anetyenhe. ¹⁷ Kele Yepe-Yepe Akwerrke, chair mwerre akngerrele-arle anemeke, re itnenhe akayake-iletyenhe mwantyele arntarnte-aremele, yepe-yepe arntarnte-arentye akngerrele yepe-yepe ikwerenhe areye-arrpe arntarnte-areme-arteke. Arrantherre itelareme nthakenhe-arle yepe-yepe arntarnte-arentye akngerrele yepe-yepe ikwerenhe areye kwatye-werne antywetyeke akngeme. Nhenge itne apeke kwatye yanhe-arteke antywerlenghe itne itethe akwete-ante anetyenhe. Ngkarte kwenhe alknultye itnekenhe urrparyenhe, nhenge itne awethe artnetyakenhe anetyenhenge.”

8

Rarle Yepe-Yepe Akwerrke-arteke-arle anemeke, ankere ar-rpenhe, 7-arle, ularte-iweme

¹ The anteme Yepe-Yepe Akwerrke-arteke areke pipe imarteye-iweke-arle renhe akwete arntwirrkerlenge. Nhenge the aretyame re ankere arlware ingkernenye, 7-arle, pipe-ngentyele ularle-iwerlenge, kele imerte alkere akertne ikwerele nterte anthurre aneke nhenge angketye-arlke-akenhe anthurre aneke akweke ware.

² The anteme areke alkere-arenye seven-pele Ngkartenge arrekwele tnerlenge, Ngkartele anteme itnenhe-arrpe trumpat atnyenetyeke antheke.

³⁻⁴ Alkere-arenye arrpenhele panthe arntwirrkeke gold-engentyele-arle mpwarekeke. Panthele-arlenge tyerrtye areyele arne nhenge ankere-arteke akwernetyarte imerte renhe itemele nhenge yanhe-ngentyele kwerte ntyentye mwerre akngerre anthurre antyetyenhenge. Chair mwerre akngerrenge arrekwele arne arrpenhe tneke ankere itetyeke arne akertneke-arleke itne-arle arne areye Ngkarteke akwetethe itetyarte. Alkere-arenye yanhe apetyemele ure itwele tnetye-alheke ankere-arle ampetyameke. Alkere-arenye arrpenhele anteme renhe ankere akngerre-apenhe anthurre antheke ure yanhe ikwere-arleke arrernetyeke Ngkarteke ampetyeke. Nhenge re arne renhe ureke arrernemele ampetyeke. Ngkartele ure kwerte ntyentye mwerre akngerre anthurre ntyernemele Re akangkemele anthurre aneke. Alakenhe-anteye-arle, nhenge Ngkartekene areye Ikwere angkemele, angkentye itnekenhele Ikwere-werne antyemele nhenge Ikwere akangkemele anetyeke. ⁵ Kele imerte alkere-arenye yanhele tyampite inemele kwerte-kwarte-arle ntyentye mwerre akngerre ilemeke. Re aperrke ure rerrke-ngentyele ineke tyampite ikwere-arleke arrerneke. Re-anteme arne renhe apmere ahelhe nhenhe-werne iweke. Nhenge re iweke-iperrele kwatye angkerlenge, kwatye alarrkeme, apmere ahelhe nhenhe

akngelheke tyarrpe-irremele.

Alkere-arenye areyele pewe-ileke trumpet itnekenhele aywerre akngerre-anteme-irrerlenge

⁶ Kele alkere-arenye seven-pele pewe-iletayeke-urletaye aneke trumpet seven-pele itnekenhele aywerre akngerre iletayeke. ⁷ Kenhe alkere-arenye arrekwele-iperrele pewe-ileke trumpet ikwerenhele aywerre akngerre irrerlenge, iparrpe anthurre kwatye apweteke-arlike ure-arlike alhwe-arlike alkere-ngentyele thelelheke ahelheke-arlike itnyeke. Kenhe apmere arrpenheme urele ampeke, arne arrpenheme-arlike name ingkirreke-arlike. Kenhe ahelhe arrpenhe akenhe mwerre akwete-arle aneke.

⁸ Alkere-arenye arrpenhele anteme, pewe-ileke trumpet ikwerenhele aywerre akngerre-irrerlenge. Iparrpe anthurrele apwete akngerre anthurre akenhe akwele-arle ampekeke alkere-ngentyele kwatye alayeke atnyeke. Itere arrpenhenge akenhe kwatye alaye re alhwe-irrerlenge. ⁹ Kenhe arne arrpenheme-arlike kwatye kwene-arenye yanhe ikwerenge ilweke, boat arrpenheme akngelhetyamele kwatye alaye ikwerenge ultakelheke kwatyeke irrpeke.

¹⁰ Alkere-arenye arrpenhele anteme, pewe-ileke trumpet ikwerenhele aywerre akngerre-anteme-irrerlenge. Iparrpe anthurrele kwerralye purlle anyente alkere-ngentyele atnyeke ure alkngenthe-akerte ingkirreke. Re kwatye arrpenhemeke-arlike, lhereke-arlike, kwatye pintyeke-arlike, kwatye antywentye akngerreke-arlike-arlike atnyeke. ¹¹ Kwerralye arritnye aneke “Kwatye Irrkerteye-ilentye akngerre.” Nhenge re kwatye pintye arrpenhemeke-arlike atnyeke re itnenhe irrkerteye-ileke, kele nhenge tyerrtye areyele kwatye pintye-ngentyele antyweke itne ilwerrirreke anteme. Tyerrtye

atningke anthurre ilwerrirreke kwatye yanhe-arle anty-werrirrekenge.

¹² Alkere-arenye arrpenhele anteme, pewe-ilemele trumpet ikwerenhele aywerre akngerre-irrerlenge. Iparrpe anthurre-arle, arne iwenhe apeke re alkngenthe arlenge renhe itepe arrpenhe arrkngerte-ileme, atnyentye renhe itepe arrpenhe-arlke, apmere ahelhe nhenhe re-anteme ingwemerte-irrekenge. Kenhe kwerralye arrpenheme alkngenthe pwarthyetyakenhe aneke. Alakenhe ikweringe anteme arlenge kwenhe ampetyakenhe aneke arlte mpwepeke-atwetye, ingwele atnyentye uthene kwerralye uthene ampeke akweke wareke-atwetye.

¹³ The anteme alkere arnareme imerte aremele irretye nhenge akertne anthurre alkereke-irrerlenge. The renhe aweke arnterre angkerlenge alakenhe, “Araye, Ayenge kwenhe tyerrtye areyke alhwarrpe anthurre awalheme apmere ahelhe nhenhe-arle anemeke, itneke akurne akngerre anthurre-arle irretyehenge nhenge alkere-arenye urrpetye ingkerne-ipenhele pewe-ilerlenge trumpet itnekenhe areyele aywerre akngerre-irrerlenge. Tyerrtye akunye areye! Urrpetye-ngare kwenhe itneke arne akurne-anthurre-irretyehenge. Arne akurne akngerre nhenhe areyele itnenhe alhwarrpe anthurrele anthetyenhe.” Alakenhe renhe the aweke irretye angkerlenge.

9

¹ Alkere-arenye arrpenhele anteme pewe-ileke trumpet ikwerenhele aywerre akngerre anthurre ilemele. Iparrpe anthurrele the areke alkere-arenye akurne anthurre anerlenge. Re kwenhe kwerralye-arteke aneke alkere-ngentyele-arle ahelhe-werne-atheke atnyeke. Arrpenhele renhe key antheke iperte

akngerre anthurre altywere-iletyeke ahelhe kwene-
 werne-atheke-arle irreke. * ² Kwerralye yanhele arne
 nhenge akngeke iperte anthurre altywere-anteme-
 ileke, ure kwerte antyure akngerre altywere akngerre
 yanhe ikwerenge-ntyete akeme-irreme ure akngerre-arle
 ampeke-arteke. Kele imerte ingwemerte-irrerleng
 ure kwerte antyure akngerre-arle iperte anthurre-
 ngentyete akeme-irrerleng, alknngenthe arlengge-
 ketye arrkngerte-ilemele. ³ Kele inteltye atningke
 anthurre ure kwerte-ngentyete arrateke, ahelhe-werne
 kwene-akerle apetyemele. Kenhe Ngkartele itnenhe
 akngarte-iweke itne atnethakertele-arteke atanthetyeke.
⁴ Re anteme itneke angkeke, “Atherrke arlkwetyale
 anetyeke arne apeke arne atherrke arrpenhe-arlike
 apeke, tyerrtye atanthetyale anetyeke imperre Ngkarte-
 kenhe-arle urlele anemeke-akerte. Tyerrtye arrpenhe
 areye-ante ware atanthaye. ⁵ Nhenge arrantherre
 itnenhe atanthemele itnenhe irrerlkng uthnetyalaye,
 kele itnenhe rlkerte akngerre anthurre ilemele ware
 nhenge atnyentye five-peleke-atwetye ware, itnenhe
 akwetethe kwarnerlte-anetyenhe atnethakerte yanhele-
 arle itnenhe atantheke. ⁶ Arlte yanhe ikwerele-ureke
 tyerrtye areyele ilwetyeke ahentye anetyenhe alakenhe
 itirremele, ‘Ayenge kwenhe iparrpe-iparrpe ilwetyeke
 ahentye-aneme, ayenge kwenhe uyarne anthurre
 itirreme rlkerte akngerre nhenhenge ularre.’ Itne
 akenhe ilwetyakenhe anetyenhe, itne kwenhe rlkerte
 akngerre anthurre yanhe ikwere-akerte akwete anerlte-
 anetyenhe.”

⁷ Kele the anteme areke inteltye nanthe areye-

* ^{9:1} Iperte nhenhe ikwere kwene-werne Ngkartele-arle arrentye areye
 arrerneke martemele nhenge urreke arlte ingkernenge Re itnenhe ureke-ar-
 leke iwetyenhenge.

arteke angkarre-angkarre tnerrirrerlenghe atwerretyeke alhetyeke-urletye. Itne inngerre artwe areye-arteke, mwekarte akaperteke irrpeke, arrantherre itelareme tyelarre nhenge alartetye areye-arle irrpeme gold-engentyele-arle mpwarekeke. ⁸ Itne alte arlpentye-akerte marle-arteke, artitye itnekenhe arrirlpe anthurre lion-kenhe-arteke-arle. ⁹ Arerreke-arleke itne arne alkwerte iron-artekeke irrpeke, ilpelhentye akngerre. Nhenge itne ingkirreke arlpelhe akngelhekenghe the aweke aywerre akngerre anthurre irrerlenghe, nhenge nanthe wagon-akerte atningkele aywerre unteme-arteke aheke akngerre atwerretyeke nhenge aywerre akngerre irremele. ¹⁰ Itne tile-akerte nhenge atnethakerte-arteke tyerrtye areye atanthetyeke itnenhe rlkerte-akngerre-ilettyeke, itne tile-le tyerrtye areye rlkerte anthurre ilettyenhe atnyentye five-ke-atwetye. ¹¹ Alkere-arenye anyente aneke inteltye nhenhe areyeke alartetye-arle, re iperte akngerre kwerte-akerte yanhe renhe arntarnte-aretyarte. Nhenge angkentye Hebrew-ele arritnye ikwerenhe Abaddon aneke, nhenge angkentye Greek-ele akenhe arritnye ikwerenhe Apollyon aneke. Arritnye nhenhe atherrele kwenhe ileme, "Nhenhe kwenhe Akethe-ante Arrernentye Akngerre-arle anekeke."

¹² Yewe, yanhe re-arteke kwenhe aneke, arne akurne anthurre arrekwenye alakenhe re-anteme urreke ulkere-arle aneme uyerretyenhenge anteme, ikwere-iperrele anteme arne akurne akngerre arrpenhe atherre irretyenhe.

¹³ Alkere-arenye arrpenhele anteme pewe-ileke trumpet ikwerenhele aywerre akngerre-ilemele, the anteme aweke angkentye apwerte athirnte yanhe-ngentyele apetyerlenghe nthenhele-arle itne arne areye Ngkarteke ampeke. Apwerte athirnte yanhe re kwenhe

aneke gold-elarle artekeke nhenge Ngkartenge arrekwele
 tneme. Apwerte athirnte akertneke-arleke itne arne
 ankere-arteke ampeme ure kwerte-ilemele nhenge
 ntyentye mwerre akngerre anthurre. Apwerte athirnte
 re itepe 4-pele-akerte, angkentye apetyeke itepe arrpe-
 anenhe-ngentyele. ¹⁴ Re alkere-arenye trumpet-akerteke,
 alakenhe angkeke, “Lhere Euphrates-werne alhaye
 alkere-arenye four-pele irlwemele aywepetyeke unte-arle
 yanhe ikwerenge ayerneke-arle aretyenhenge.” ¹⁵ Kele re
 alhemele alkere-arenye four-pele irlwemele aywepeke.
 Kenhe Ngkartele kwenhe itnenhe atnyenyame
 nhenge arlte arratyeke-ante Ngkartele-ante ware-arle
 itelaremeke. Kele nhenge arlte yanhe re apetyerlunge
 arrpenhele apeke imerte itnenhe irlwemele aywepetyeke,
 itne anteme alheme tyerrye arrpenheme irrerlknge
 atwetyenhenge apmere ahelhe arrpe-anenhele-arle
 anemeke. ¹⁶ Kenhe arrpenhele atyenge ileke artwe
 atwerrentye akngerre atningke anthurre anerlunge
 nanthe artepele, atningke akngerre anthurre 200
 million-arle. ¹⁷ Artwe atwerrentye akngerre nhenhe
 areyele atnyeneke arne alkwerte-arteke iron-ngentyele-
 arle mpwarekeke arlkenye areye-akerte nhenge arerre
 ilpelhetyeke. Arrpenheme athetheke aneke nhenge ure
 alkngenthe-arteke, arrpenheme alkere-alkere aneke,
 arrpenheme untarne-untarne aneke nhenge antethe-
 arteke. Kenhe nanthe areye akaperte lion-kenhe-akerte
 aneke, ure alkngenthe akngerre arrakerte itnekenhe-
 ngentyele arrateke, ure antyure-arteke akeme-irreme
 ntyenge irntirte-akerte. ¹⁸ Ure alkngenthe-arlke ure
 antyure-arlke nanthe arrakerte-ngentyele arrateme
 tyerrye atningke anthurre irrerlkngenge atwerlunge
 apmere ahelhe arrpe-anenhele. Kenhe tyerrye arrpenhe
 atningke akenhe itethe akwete aneke. ¹⁹ Nanthe areyele

itnenhe irrerlknge atweke nhenge arrakerte-ngentyele tile areyele-arlike, tile itnekenhe akaperte apmwe-kenhe-arteke-akerte, itne tyerrtye areye irrerlknge atweke nhenge apmwe ahe-akngerre areyele-arle uthnemele irrerlknge atweme-arteke.

²⁰ Ahe nhenhe ikwerenge-ntyale tyerrtye atningke anthurre ilwerrirreke. Kenhe tyerrtye arrpenhe areye akenhe itethe akwete aneke itne akenhe arne akurne arrpenheke-arrpenhe akwete mpwarerlte-anemele. Itne-arle kwenhe arne akurne nhenhe areke itne ikwere-iperre atere awelhetyakenhele aneke Ngkarte-werne perte-irremele, arrangwe-arle. Itne arrentye areye-ketye untyemurle-irretyakenhe itne akenhe akwete-arle itnenhe tnaketyarte. Arne ingkirreke anthurre itne arne-ngentyele apwerte-ngentyele mpwareke-arle itne arne nhenhe areyeke akwete anthurrele ahentye anemele itnenhe akwetethe tnakemele. Itne arne yanhe areye tnaketyarte gold-engentyele-arle silver-ngentyele mpwarekeke tyerrtye-arteke-arle anekeke. Itne akwetethe tnakeme arne yanhe areye uyarne-arle areme, uyarne-arle aweme, uyarne-arle untheme.

²¹ Tyerrtye areyele akurne akwete mpwarerlte-anemele perte-irretyakenhele, apure awelhetyakenhele. Itne arrpenhe areye irrerlknge atwetyarte, arrpenhe areye artenge-iweme itnenhe rlkerte-ilettyeke, itnenhe arne arrengkwelthele uthnemele, itne kwenhe anyelkngel interreme, arne arrpenhe-kenhe areye anyelkngel inemele-arlike. Itne kwenhe apure irretyakenhe aneke, alhwarrpe awelhemele angketyakenhe, itne Ngkarte-werne utepe-irretyakenhe, arrangwe-arle.

10

Alkere-arenyele pipe akweke imarteye-iweke-arle atnyen-

eme

¹ The anteme alkere-arenye akngerre-apenhe arrpenhe areke alkere-ngentyele atnarnpe-intyerlenghe. Re kwenhe tnetyame angkulyele artelheke nhenge mantere-arteke, mpwelarre akaperte itepe arrpe-anenhele aneke. Inngerre ikwerenhe imparrkeye anthurre aneke nhenge uternele ampeme-arteke, ngkwerne ikwerenhe imparkeke ure alkngenthe ngkwerne-arteke. ² Re kwenhe pipe akweke atnyenemele arrpenhele-arle kele altywere-ilekenge. Ingke akwe-arratyale re kwatye alaye akngerrele tneke, ingke akwangenyale re apmere ahelhele tneleme. ³ Re arnterre anthurre arlkeke nhenge lion akngerre-arle arlkeme-arteke. Nhenge re arlkeke-arle-iperre arne iwenhe apeke re kwatyele arnwangkemele-arteke alkere-ngentyele seven-ngare arrware angkemele. ⁴ Nhenge tharle arrware awemele ayenge alhetyeke itirreke intelhe-iletayeke iwenhe-arle angkekenge. Kenhe urreke the iwenhe apeke renhe intelhe-iletienhenge, the aweke angkentye arrpenhe alkere-ngentyele angkerlenghe, “Impaye! Intelhe-iletialaye angkentye kwatye-arle seven-ngare angkekeke! Itnenhe alengke-iweme, arrpenhe areyeke iletiale anaye!” Kele the impeke intelhe-iletiyakenhe aneke.

⁵ Kele alkere-arenye yanhe ingke ikwerenhe-arle ahelhe uthene kwatye alaye utheneke-arleke arrernekeke iltye akwe-arratyale imerte akertne-ilelhememele alkere-werne-atheke. ⁶⁻⁷ Re-anteme angkeke, “Tyerrtye areye awerrirraye! Ngkarte kwenhe itethe akwete-ante aneme. Re kwenhe aneme apmere ahelhe nhenhe-arle mpwarekeke, alkere-arlke, kwatye-arlke, arne arrpenhe ingkirreke-arlke. Ikwerenge arrekwele kwenhe ayenge arrekantherre angkeme, ‘Arrantherre itelareme arrule anthurre Ngkartele-arle alengke-

Revelation 10:8 45 Revelation 10:11

iwemele atnyeneke nhenge iwenhe apeke renhe-arle Re itirretyeke mpwaretyeke, Re yanhe areyeke-ante ware ileke angkentye Ikwerenhe-arle arrpenhe areyeke ilerlthe-apekeke. Lyete kwenhe angkentye Ngkarte-kenhe nhenhe akethe-irretyenhenge. Re renhe arrattelhe-iletienhe nhenge alkere-arenye ingkernenyeye pewe-ilerlenghe trumpet ikwerenhele angkentye akngerre-anthurre-iletieye.’”

Alakenhe re alkere-arenye akngerre-apenhe yanhe angkeke.

⁸ The anteme awethe aweke angkentye re-anteye alkere-ngentyeye angkerlenghe, “Alkere-arenye alartetye yanhe-werne alhaye, kwatye alayeke uthene ahelhele uthene tnerle-anemeke. Pipe yanhe renhe inetyeke alhaye rarle atnyenemeke, pipe apelaye kele-arle altywere-ilekeke.”

⁹ Kele the anteme alkere-arenye apayuthnetyeke alheke ayenge pipe anthetyeke. Re-anteme atyenge angkeke, “Me, inaye renhe arlkwaye! Arrakerte kwenele renhe ngkwarle ikwemeye-arteke arrkernetyenhe, arlkwemele iperrele anteme unte awelhetyenhe atnerte ngkwinhe atnerte irrkerteye-irrerlenghe.”

¹⁰ Kele the anteme pipe akweke renhe alkere-arenye iltie-ngentyeye akngeke renhe arlkwemele. Arrakerte kwenge the arlkwemele arrkerneme ngkwarle-arteke, nhenge the arne renhe akwerneke-iperrele, re atnerte irrkerteye-ilerlenghe.

¹¹ Kele re-anteme atyenge angkeke, “Tyerrtye ingkirrekeke angkentye Ngkarte-kenhe awethe ilerle-apetyeke alhaye nthakenhe-arle itneke irretyenhe. Itneke apmere arrpe-anenhele ilerle-apaye, tyerrtye angkentye arrpe-anenhe areyeke, tyerrtye yenpe

arlkentye arrpenheke-arrpenheke, imerte tyerrtye alartetye areyеke-arlke ilemele.”

11

Yanhe atherre-akerte Ayeye Ngkarte-kenhe-arle ilerle-apekeke

¹ Kele arrpenhele ayenge arne arlpentye arratyе antheke. Ngkarte anteme angkeke, “Arne nhenhe inaye imerte tyatyе akngerre-werne alhemele nthenhele-arle tyerrtye areyele Ayenge tnakewarremeke. Arne yanhe akwetethe kwene arrernaye akwetethe anthurre arrkernemele nhenge yanhe-ngentyele anteme unte akaltye anetyenhenge, apmere yanhe akngerre apeke-arle anemenge. Arlpentye akngerre apeke-arle apmere yanhe re anemeke, urtekeke apeke. Alakenhe anteye apwerte athirnte akngerre yanheke arrkernaye, arne areye-arle Atyenge itentye akngerre. Tyerrtye arpenhe atningke apmere yanhe kwene ikwerenge tnerlte-aneme, Atyenge angkerlte-anemele. Tyerrtye nthakentyeke araye, atningke anthurre apeke, urrpetye apeke.

² Kele ahelhe tyatyе aketheke arrkernetyale, re akngerre apeke ithwenge apeke, tyatyе kwenele-ante ware mwantyele arrkernaye. Alakenhe mpwaraye, Tharle ahelhe akethe tyerrtye apmere arrpenhe-arenye areyеke anthemenge, Ayenge-arle arratyе itelaretyakenheke, itne anteme ahelhe renhe ingkele ulthetyenhe renhe akurne-ilemele, apmere Atyeperre anthurre Jerusalem anteye. Itne ahelhe renhe akwetethe ultherlte-anetyenhe atnyentye 42-еke-atwetye. ³ The anteme artwe ayeye ilentye akngerre atherre yernetyenhe angkentye Christkenhe ilerle-apetyeke, itne Atyenge akwetethe angkerlte-anetyenhe atnyentye 42-еke-atwetye. Itne mantere

iltelheye ntheke-nthekeke irrpetyenhe alte nanikute-
ngentyele mpwareke imernelhetyeke ratherre alhwarrpe
awelhemele tyerrtye areyele-arle akurne mpwarekeke.”
Alakenhe Re atyenge angkeke.

⁴ Ngkarte atyenge akwete angkeke, “Kenhe artwe
nhenhe atherre arne olive atherre-arteke, alkngenthe
atherre-arteke-arlke imparrkerle-anerreme. Arrantherre
itelareme arne olive yanhe atherre, alkngenthe
atherrame-arlke Atyenge arrekwele tneke, ahelhe
nhenheke alartetye anthurre-arle. ⁵ Tyerrtye arrpenhe
areye ikwere-atherre ahentye anthurre anetyakenhe
anetyenhe. Kenhe nhenge angwenhele apeke renhe-
atherrenhe irrerlkng atwetyeke arrkernerleng, kele
urele ikwere-atherrenge arrakertenge arratemele
itnenhe uyerrelhe-ileme. Tyerrtye areyele renhe-
atherrenhe uyarne atweme.

⁶ “The renhe-atherrenhe Utmenge Atyinhe
anthetyenhe kwatye alkere-ngentyele arrkngerte-
iletyeke, kele anteme kwatyeke arrangkwe anetyenhe
nhenge ratherre angkentye Atyinhe ilerle-aperrrleng
atnyentye 42-eke-atwetye. The renhe-atherrenhe
Utnenge Atyinhe anthetyenhe kwatye ingkirreke
akurne-iletyeke tyerrtye areyele-arle antywerlte-
anemeke nhenge yanhe-ngentyele kwatye akngarte-
iwelhetyenhenge alhwe-anteme-irretyenhenge. Awethe-
anteye The Utmenge Atyinhe renhe-atherrenhe
anthetyenhe nhenge ratherre arne akurne arrpenheke-
arrpenhe iletyeke apmere ahelhe nhenhe ingkirreke
ikwerele. Kele nhenge ratherre ahentye anemele,
ratherre arne akurne arrpenheke-arrpenhe atningke-
ngare arratelhe-iletyenhe, apmere ahelhe nhenhe
ikwerele.

⁷ “Kele ratherre angkentye Atyinhe apmere arrpe-
 anenhe ikwerele ilerle-aperretyenhe atnyentye 42-ke-
 atwetye. Ratherre angkentye yanhe ilerle-apeke-arle
 uyerrelhe-ileme, arrentye akngerre-apenhe anthurre
 kwenhe iperte akngerre yanhe-ngentyele arratetyenhe
 renhe-atherrenhe arlkarentye-iletienhe. Re arlengen-
 arlentye ikwere-atherrenge atwerremele unthetyenhe,
 renhe-atherrenhe irrerlknge atwetyeke-atwetye. ⁸ Kele
 atyalangke ikwere-atherrenhe iwerre mpwepele inte-
 tyenhe apmere akngerre Jerusalem ikwerele, apmere
 yanhe nhenge itne-arle alartetye ikwere-atherrenhe Je-
 sus arne arntarlkweke-arleke arlpare arrernekenge. Ap-
 mere Jerusalem re apmere Sodom uthene Egypt uthene-
 arle aneke-arteke. Itelaraye, apmere yanhe atherreke-
 arlke tyerrtye areyele arne akurne mpwarewarartyarte
 anteye.

⁹ “Ye, atyalangke yanhe atherre kwenhe yanhe
 ikwerele intetyenhe arlte urrpetyeke-atwetye. Kenhe
 tyerrtye areye akenhe apmere arrpe-anenhe-ngentyele
 apetyetyenhe, angkentye arrpe-anenhe angkemele,
 tyerrtye yenpe arlkenye arpenhe areye-arlke. Itne
 atyalangke yanhe atherre akwetethe arerlte-anetyenhe,
 arrkngerte-ilemele arpenhe areye apetyeme-ketye
 atyalangke atherre iperteke arteme-ketye. ¹⁰ Kenhe
 nhenge tyerrtye areye Atyenge-werne-arle utepe-
 irretyakenhe anemeke, atyalangke atherre aremele,
 itne akangkemele anthurre anetyenhe warrkene
 Atyinhe nhenhe atherre-arle kwenhe ilwekenge. Itne
 kwenhe akangkemele alakenhe angkerretyenhe, ‘Kele
 mwerre anthurre-arle! Yanhe atherre-arle ilweke!
 Ratherre kwenhe anwerneke ahe akngerre anthurre
 anetyarte, anwernenhe akwetethe alkngetherre
 iletartye, kele lyete anteme ratherre anwerneke arne

akurne areye uyarne mpwareme awethe.’ Itne anteme apurte-irretyenhe, arne arrpenheke-arrpenhe areye akangkemele antherretyenhe.” Alakenhe renhe Ngkarte atyenge angkeke.

¹¹ Nhenge the aremele arne nhenhe areye mpwareke-arle iperre, kele anteme arlte urrpetye uyerreke-iperrele Ngkartele renhe-atherrenhe aheye antheke, renhe-atherrenhe akarrelhe-ilemele, ratherre anteme ilweke-arle-iperre akeme-irreme, tnerle-anerreke ware kweye. Nhenge tyerrtye ingkirreke anthurrele renhe-atherrenhe arerrirremele itne apatemele anthurre atere anthurre awelheke.

¹² Kele yanhe atherrele aweke angkentye alkere akertne-ngentyele arnterre anthurre alakenhe arlkerlenghe, “Mpwele-aye, nhenhe-werne apetye-alherrye!” Kenhe yanhe areyele ikwere-atherre-arle atnerte ahentye anetyakenhe anemeke, renhe-atherrenhe areke alkere-werne atheke alherlenghe angkulyele-ureke.

¹³ Arlte ikwerele-anteye ahelhe arnterre anthurre akngernelheke apanpe akiltye-irremele, apmere arrpenheme-arlike atakelheke, tyerrtye atningke anthurre ilweke 7,000 anthurre. Kenhe tyerrtye areye, itethe-arle akwete anekeke, atere anthurre irreke imerte angkerremele, “Arraty kwenhe Ngkarte alkerele aneme, Re lterrke anthurre anemele.”

¹⁴ Ahelhe akngelheke-arle iperre apanpe akiltye-irreke-arle anteye, ahele atherre-ngare re aneke, kele uyerremele anteme. Awethe anteme ahele arrpenhe re lyete aneme, urrpetye-ngare anteme irretyenhe.

Alkere-arenye ingkernenyele anteme trumpet pewe-ileme aywerre-ilemele

¹⁵ Kele alkere-arenye ingkernenyele anteme trumpet pewe-ileke aywerre-ilemele, alkere akertnele arpenhe atningke arnterre anthurre angkeme, itne alak-

enhe angkeke, “Lyete Ngkarte Alartetye anwerne-kenhe uthene Alere Ikwerenhe Jesus Christ uthene, lterrke akngerre-arle anerle-anerremeke, alartetye irretyenhe apmere ahelhe nhenhe ikwerele, Ratherre alartetye akwete-ante anerle-annerretyenhe.”¹⁶⁻¹⁷ Nhenge artwe akngerrepate 24-ele, chair areyenge-arle Ngkartenge arrekwele anerlte-aneme, trumpet yanhe awerrirremele, itne artepe kwene-irreke ulperre interrirremele Ngkarte akertne utyernemele tnakewarreke. Itne alakenhe angkemele,

“Ngkarte Alartetye-aye, Unte kwenhe arrekwelenye aneme, Unte apele itethe akwete-ante anerle-aneme. Unte kwenhe arrpenhe ingkirrekenge mwerre akngerre-ulkere.

Anwerne kwenhe Ngenhe akangkemele anthurre tnake-warreme Unte-arle kwenhe ilyernpenye anthurre anerlenghe, Unte-arle apmere ahelhe nhenhe ingkirreke renhe arntarnte-aremenge.

Kenhe yanhe areyele, Ngkwenge-arle ahentye anetyakenhe anemeke, Ngenhe uyarne akurne-ileme.

¹⁸ Unte tyerrtye ilweke-arle areye Ngkwengenge arrekwele ngkernetyenhe Unte itnenhe akalkelhe-ilettyeke, yanhe areyele-arle Ngenhe awekeke, kenhe arrpenhe areyele-arle Ngenhe alhule-iwekeke.

Unte anteme yanhe areyeke ahele-irretyenhe Ngenhe-arle alhule-iwekeke.

Unte kwenhe itnenhe ureke-arleke iwetyenhe.

Kenhe tyerrtye mwerre areye-arle anemeke Unte arne mwerre areye anthirtnetyenhe.

Unte kwenhe warrkene Ngkwinhe areye anthetyenhe,

yanhe areyeke angkentye Ngkwinhe-arle awemele
 anteme ilerlte-apemeke,
 yanhe areyeke Ngenhe-arle tnakewarremeke,
 artwe areyeke-arlke, arelhe areyeke-arle, ampe
 areyeke-arlke Ngkwinhe-arle anemeke.
 Unte akenhe tyerrtye akurne areye irrerlkngge atwirtne-
 tyenhe,
 nhenge yanhe areye tyerrtye Ngkwinhe areye-arle
 irrerlkngge atwekeke apmere ahelhe nhenhe ikw-
 erenge.”

Alakenhe rarle akngerrepate areye angkeke.

¹⁹ Ikwere iperrele anteme arrpenhele tyatye akngerre
 arriwe altywere-ileke alkere akertnele-arle tnameke. Ar-
 riwe ikwerenge-ureke the arne box ameke-ameke areke
 angkentye Ngkarte-kenhe 10-akerte kwenele. Kwatye
 akngerre anthurre angkeke, nhenge kwatyele anhekenge-
 arteke. Apweteke akngerre-apenhe alkere-ngentyele
 atnyerrirreme. Ahelhe-arlke ngkernelheke, apanpele
 ahelhe akiltye-irremele.

12

Kwatye kwelayele arelhe uyarne anthurre arntwirrkeme

¹ Kele arne iwenhe apeke re-anteme ilyernpenye an-
 thurre, arrpenhe anthurre-arle apeke, alkere akertnenge
 arrateke. The akertne-atheke apatemele anthurre areke
 arelhe alkere akertnenge anerlengge, mantere ikwerenhe
 arlenngge-arteke aneke, ingke atnyentye akertnele aneke,
 tyellarre mwerre akngerre kwerralye 12-akerte akaperte
 ikwerenhele aneke. ² Arelhe kwenhe atnerte-atnerte
 aneke, re arnterre anthurre ampwangketyame ampe
 akweke-arle arratetyeke anemenge.

³ The anteme areke arne arrpenhe anthurre alk-
 erenge arraterlengge, apmwe kwatye-arenye athetheke

akngerre-apenhe anthurre-arle aneke akaperte 7-akerte, rulye-rulye 10-akerte, akaperte arrpe-anenheke aneke tyelarre mwerre akngerre anthurre-arle. ⁴ Tile ikw-erenhele apmwe kwatye-arenye yanhele kwerralye atningke akngernelhe-ileke itnenhe alkere-ngentyele apmere ahelhe-werne-atheke iweke. Ikwere iperrele anteme re arelhe yanhenge arrekwele tnetyeke alheke re arlkwetyeke ampe akweke yanhe renhe arraterleng arteke. ⁵ Kele arelhele anteme ampe urreye akweke atnyeneke, urreke-arle amangketyenhenge alartetye irretenhe, tyerrtye atningke uternetyenhe arne areye mpwaretyeke. Kenhe tyerrtye areye apmere arrpe-anenhe-arenyele renhe uyarne mwernte-ileme. Kenhe nhenge ampe akweke re intemele arrpenhele renhe iparrpe rakerleng apmwe kwatye-arenye yanhele renhe iparrpe ineme-ketye, renhe Ngkarte-werne akngemele chair mwerre akngerre yanhe ikwerele-arle anemeke. ⁶ Tyerrtye yanhele ampe akweke renhe rakeke-arle iperre, arelhe apmere ahurratye ikwere-werne uyerrlerle-alheke Ngkartele-arle ikwere akwetante mpwaretyeke, nhenge yanhe-ngentyele alkere-arenye ikwerenhe areyele renhe arntarnte-aretyenhenge arlte 1,260-eke-atwetye.

⁷ Kele imerte atwerrentye akngerre anthurre alkere akertnele aneke. Alkere-arenye Michael, alkere-arenye ikwerenhe areyele-akerte apmwe kwatye-arenyenge atwerretyame, alkere-arenye akurne ikwerenhe areyenge-arlike. Kele apmwe kwatye-arenyele-arlike alkere-arenye akurne ikwerenhe areyele-arlike itnenhe atwirtnetyame anteye. ⁸⁻⁹ Itne akwete anthurre atwerretyame, kele Michael-kenhe areyele anteme itnenhe arleng anthurre aywepeke. Itne itnenhe alkere-ngentyele kwene-akerle iweke itne alkerele aneme-ketye. Itne apmwe kwatye-arenye renhe-arlike alkere-ngentyele

uweke, rarle thewe arrule anthurre-arle apmere ahelhe nhenhele ampwe-arteke anekeke. Apmwe kwatye-arenye yanhe thewe, re kwenhe arrentye Satan arritnye aneme, tyerrtye ahelhe nhenhe-arenye areyeke urrtiyirremele-arle itne arne akurne mpwarerlte-anetyenhenge. Kenhe Michael akenhe alkere-arenye ikwerenhe areyele-arlike apmwe kwatye-arenye renhe ahelhe nhenhe-werne kwene-akerle iweke, alkere-arenye akurne itnenhe-arlike.

¹⁰ The anteme aweke arrpenhe alkere akertnele angkentye akngerrele arlkerlenghe, alakenhe angkemele, “Lyete-arle Ngkartele kwenhe tyerrtye areye itetheke mpwareke Rarle kwenhe arrentye Satan renhe alkere-ngentyele iwerne, yanhe athewe, atyewe anwerne-kenhe areye-arle ilpernetyarteke Re itnenhe Ngkartenge arrekwele akwetethe ilpernetyarte arltele-akake, ingwele-akake. Kele lyete anteme Ngkarte Utmenge Ikw-erenhele renhe arlenghe arlentye-werne iweke. Ye, Ngkarte kwenhe alartetye anthurre aneme, Alere Ikw-erenhe anwernenhe-arle itetheke mpwaremeke, imerte arne ingkirreke anthurreke akngerre anthurre irreke-arle. ¹¹ Atyewe anwerne-kenhe, Ngkarte-kenhe-arle anemeke, itne kwenhe arrentye Satan anathe-ileke renhe aywepemele. Iwengenge-arle-ame arrantherre itirreme arrentyele itnenhe uyarne akurne-ileke Jesus-ketyenge untyeme-irretyeke? Itne renhe anathe-ileke Yepe-yepe Akwerrkele-arle kwenhe alhwe ikwerenhe itneke thelekenghe, itne anteme renhe arratye itelareme. Itne renhe anathe-ileke itne kwenhe angkentye arratye ilerlte-apetyarte anteye, alakenhe ikweringe anteme itne renhe ingkwe irrerlknghe atweke. Kele anteye-arle itne akenhe nhenhe itelareke, itne atere-irretyakenhele aneke itne anthelhetyeke ilwetyeke, arratye anthurre anteme itne ilweke. ¹² Alakenhe ikweringe anteme arrantherre

Revelation 12:13 54 Revelation 12:18

alkerele-arle anerle-anemeke kwenhe akangkemele ane-tyeke. Kenhe ingkirreke apmere ahelhe nhenhe-arenye areyeke akurne anthurre irretyenhe, kwatyele-arle anemeke anteye, arrentye Satan-arle ahele anthurre ir-rerleng arrekanttherre-werne kwene-akerle apetyeke re itelareme arlthe ikwerenhe-arle urteke ware anemeke nhenge tyerrtye areyeke arne akurne areye mpware-tyeke.”

¹³ Nhenge apmwele itelaremele, Michael-elarle renhe apmere ahelheke-werne iweke, re itirreke, “Yewe! Lyete, the kwenhe arelthe yanhe alwerneme, ampe urreye akweke-arle atnyenekeke.” ¹⁴ Kenhe arpenhele akenhe arelthe renhe arlpelhe irretye akngerre-kenhe antheke-arle, re alkereke-irretyeke apmwe kwatye-arenye yanhe ikweringe-ntyete nhenge apmere arrangkethe-werne Ngkartele-arle ikwere akwetante mpwarekenge. Nhenge re yanhe ikwere irretye-alhemele itne renhe merne antheke, renhe mwantyele arntarnte-aremele uterne 4-peleke-atwetye apmwe kwatye-arenye-ketye. ¹⁵ Kele apmwe kwatye-arenye re-anteme kwatye urewe-arteke antewe-irreke arrakerte ikwerenhe-ngentyete arelthe yanhe ikwere-werne-atheke, re apeke renhe kwatye urewele akngetyeke. ¹⁶ Kenhe Ngkartele akenhe ahelhe altywere-ileke nhenge kwatye yanhe re kwene ikwere-werne atheke thelelhetyenhenge renhe akngetyakenhe anteme aneme. Kele arelthe re-anteme mwantye alkereke-irreke. ¹⁷ Kele apmwe kwatye-arenye re-anteme ahele-anthurre-irreke re unthetyeke alheke ampe arpenhe arelthe-kenhe areyenge atwerretyeke, yanhe areyenge-arle Ngkarte-kenhe anemeke. Itne kwenhe aneme Ngkarte-arle aywerrke awerlthe-anemeke, angkentye Jesus-akerte arraty-arle ilemeke. ¹⁸ Kenhe apmwe kwatye-arenye re-anteme apetyemele kwatye alaye

akngerre iterele tnetye-alheke.

13

Arrentye atherrame-akerte kwatye alayenge-ntyeye-arle ar-ratekeke

¹ The anteme areke arrentye kwatye alaye ikwerenge-ntyeye akeme-irremele arraterlengge akaperte 7-akerte rulye-rulye 10-akerte. Rulye-rulye-arrpeke-arlengge akenhe arne akweke tyellarre-arteke-arle re atnyeneke alartetye irrpentye akngerre-arteke, akaperte-arrpeke-arleke angkentye akurne intelhe-ileke-arle Ngkarteke-arle anyurre-irremeke. ² Arrentye tyerrtye alkngge atherrke akngerre-apenhe-arteke atnyeneke nhenge leopard-arteke, ingke ikwerenhe tywepmare arlpentye akngerre-akerte nhenge bear-arteke, arrakerte ikwerenhe aneke lion-kenhe-arteke. Apmwe kwatye-arenyele arrentye renhe ngangkere ikwerenhe-arrpe antheke nhenge re-artekele arne arrpenheke-arrpenhe mpwaretyenhenge ilyernpenye anthurrele. Re arrentye ileke chair ikwerenheke-arleke arrernelhetyeke arne ingkirreke anthurreke alartetye anetyeke apmere ahelhe nhenhele-arle anemeke. ³ Nhenge the arrentye yanhe renhe akaperte 7-akerte aretyamele, the areke akaperte anyente impepe anerlengge re irrerlkngge atwetyeke aneke! Nhenge tyerrtye apmere ahelhe nhenhe-arenye areyele renhe aremele itne apatemele anthurre, alakenhe ikwerenge anteme itne renhe apenteke nhenge rarle alartetye irrekengge. ⁴ Itne apmwe kwatye-arenye renhe tnakeme rarle arrentye ngangkere ikwerenhe-arrpe anthekege tyerrtye ingkirreke apmere ahelhe nhenhe-arenyeke alartetye anetyeke. Itne arrentye-inpe tnakewarreke alakenhe angkemele, “Tyerrtye arrpenhe arrentye nhenhe-arteke kwenhe anetyakenhe aneme.

Arrpenhele renhe uyarne atweme. Re atwentye arrpenhe anthurre, arrpenhe ingkirrekenge ilyenpenye anthurre-ulkere.”

⁵ Kele apmwe kwatye-arenyele arrentye tyerrtye leopard-akerte-arteke ileke ayeyele ilelhetyeke Ngkarteke akengentye angketyeke, tyerrtye ingkirrekeke alartetye anetyeke atnyentye 42-eke-atwetye. ⁶ Re anteme Ngkarte arrenkwelthele akurne-ileme arratyte Renhe iltemele anteye, apmerekere-arlike akengentye angkemele Rarle anemeke, yanhe areye-arlike Ikwerenge-arlike alkerere anemeke. ⁷ Apmwe kwatye-arenyele arrentye awethe ileke atyewe Ngkarte-kenhe areyenge atwerretyeke itnenhe aterele-anthemele. Re anteme itnenhe atweke arratyte, itnenhe rilkerere-anthurre-ilettyeke. Re awethe angkeke apmerekere arrpe-anenheke alartetye anetyeke, tyerrtye ingkirrekeke-arlike, tyerrtye areyekerere-arlike angkentye arrpe-anenhele-arlike angkemeke, tyerrtye areyekerere-arlike yenpe arlkenye arrpe-anenhe-akerte-arlike anemeke.

⁸ Kenhe tyerrtye atningke apmerekere nhenhele-arlike anemeke artepe anemele kwene-irreke arrentye yanhe renhe tnakemele, kenhe tyerrtye arrpenhe areyekerere akenhe renhe tnaketyakenhe aneke. Tyerrtye nhenhe areyekerere-kenhe arritnye Yepe-Yepe Akwerrkerere pipe-nge intelhe-ileke-arlike itne itethe akwete-ante anetyenhenge. Urreke ahelhe nhenhe mpwaretyenhenge Re arritnye itnekenhe intelhe-ileke-arlike. Yepe-yepe Akwerrkerere nhenhe athewe, itne irrerlknge atwerrirreke-arlike. Kenhe atyewe Yepe-Yepe Akwerrkerere-kenhe areyekerere arrentye renhe tnakewarretyakenhe aneke.

⁹ Tyerrtye ingkirrekele kwenhe mwantye anthurrele awetyeke nhenge irlpe-werne ilemele angkentye nhenhe renhe Ngkarte-ngentyele: ¹⁰ Ngkarte kwenhe

arrekantherre akaltye aneme, Re itelareme yanhe areyele arrekantherre-arle ahentye anetyakenhe anemeke arrenhantherrenhe arrpenheme arntwirrkemele jailke akwernetyenhe. Re itelareme anteye yanhe areyele arrekantherre-arle ahentye anetyakenhe anemeke, arrenhantherrenhe arrpenheme alyweke akngerrele aketyenhe irrerlkngge atwemele. Alakenhe ikwerenge anteme Ngkarte-kenhe areyele Renhe akwetethe awerlte-anetyeke, Renhe arratyepenterlte-anetyeke.

Arrentye arrpenhe arrateme

¹¹ Yanhe ikwere-ipperrele the areke arrentye arrpenhe ahelhe kwene-ngentyele arraterlenge. Arrentye nhenhe re rulye-rulye atherre-akerte nhenge yepe-yepe akwerrke-arteke re angkentye angkeke apmwe kwatye-arenye-arteke. ¹² Arrentye arrekwelenyele arrentye intertenye ileke alartetye anetyeke ngangkere akngerre-akertele tyerrtye ingkirreke anthurre uternetyeke iwenhe apeke renhe mpwaretyeke rarle ilemeke. Kele re-anteme tyerrtye ingkirreke anthurre uterneke apmere ahelhe nhenhele-arle anemeke arrentye arrekwelenyele kwene-irremele renhe tnaketyeke, atweke-arle yanhe thewe akaperte anyente utylene akngerre-akerte mwerre-anteye-arle irrirtnekeke. ¹³ Kenhe arrentye intertenyele akenhe arne atningke ilyernpenye anthurre mpwareke tyerrtye ingkirrekele aretyeke, itne anteme apatemele anthurre aneke. Re ure alkere-ngentyele ahelhe-werne atnyetyeke ileke nhenge tyerrtye ingkirrekele alkngele arerlenge anthurre. ¹⁴ Re arne akngerre anthurre areye mpwareke nhenge arrentye arrekwelenyele arerlenge, tyerrtye areyele apmere arrpe-anenhe-ngentyele renhe aremele arratyepenterlte-itelareke, itne itirreke rarle akwele alartetye anthurre anekeke-athene. Kele imerte

arrentye yanhele itnenhe uterneke arne mpwaretyeke arrentye arrekwelenye ahirre-arteke-arle anemeke, yanhe athewe akaperte anyente-akerte utyene akngerre yanhe-akerte alyweke akngerre-apenhe-ngentyele itethe-arle awethe-irritnekeke, renhe-arteke. ¹⁵ Kele itne yanhe renhe-arteke anthurre mpwareke. ¹⁵ Kenhe arrentye intertenyele arne yanhe aheye antheke itne-arle mpwarekeke, re anteme angketyeke. Re imerte tyerrtye atningke irrerlkngye atwetyeke alhemele itne kwenhe ikwere artepe kwene-irretyakenhe aneke renhe tnakewarreyeke. ¹⁶ Kele anteme arrentye intertenye re akenhe arrpenhe uterneke tyerrtye areyeke-arleke imperre arrernetyeke, nhenge intelhe-ileke-arle-arteke. Tyerrtye arrpenhemele imperre yanhe akwe-arratyeke-arleke atnyeneke, kenhe arrpenhemele akenhe imperre yanhe urleke-arleke atnyeneke. Ingkerreke anthurrele imperre atnyeneke, tyerrtye akweke areyele, tyerrtye ampwe areyele, tyerrtye apwerte mane akngerre-akerte areyele, alhengkeye areyele, yanhe areyele alartetyeke-arle warrke-irremeke, arrpenhe areyele itneke-arrpe-arle warrke-irremeke, ingkirreke anthurre imperre yanhe itneke-arleke-arrpe atnyeneke. ¹⁷ Imperre yanhe thewe aneke arritnye arrentye-kenhe, number ikwerenhe-arlke. Kenhe tyerrtye angwenhele apeke re imperre renhe-arle atnyenetyakenhe anekeke, re merne uyarne ineme, mantere-arlke, arne iwenhe apeke arrpenhe renhe uyarne ineme, itne arne iwenhe apeke renhe apwerte maneke uyarne antherreme.

¹⁸ Angwenhele-ame imperre arrentye-kenhe itelareme? Nhenge arrpenhele apeke iterle-ame-iterle aneme re anteme imperre renhe count-eme-ilaye, ikwere-akerte akaltye-irretyeke, imperre nhenhele-arle kwenhe arritnye artwe-kenhe ilerlengye, imperre 666.

14

Ayeye Yepe-Yepe Akwerrke-akerte ikwerenhe areye-arlke

¹ Kele the anteme Yepe-Yepe Akwerrke apwerte akertnele tnerlenghe areke, apwerte yanhe Zion arritnye aneke Jerusalem-ele. Yanhe ikwerele tyerrtye atningke ikweringe apurte tnerlte-aneke, 144,000 anthurre. Urle itnekenhe-arrpeke-arlenghe arrpenhele arritnye Yepe-yepe Akwerrke-kenhe intelhe-ileke, arritnye Ngkarte-kenhe-arlke. ² The aweke angwenhe apeke re alkere akertne-ngentyele angkerlenghe. Re arnierre anthurre angkeke nhenge kwatye aywerre angkeme-arteke nhenge apwerte akertnenge thelelhomele, nhenge kwatye angkeme-arteke. Nhenge the aywerre awemele re kwenhe angkentye mwerre akngerre anthurre-arteke nhenge aywerre tyerrtye areye-arle guitar apeke arrkene-irreme-arteke. ³ Kenhe tyerrtye 144,000-anthurre akenhe chair Ngkarte-kenhenge arrekwele tnetyame, atnunthe 4-pele-arlke akngerrepate 24-arlke. Itne yanhe ikwerele tnetyame alyelhentye alkarle alyelhemele itne-ante ware-arle itelarekeke. Arrpenhe-ante alyelhentye alkarle yanhe ikwere uyarne akaltye-irreme. Nhenhe areye kwenhe Ngkarte-arlke itetheke mpwarekeke nhenge itne apmere ahelhe nhenhele anetyartenge, itne-ante ware kwenhe alyelhentye alkarle nhenhe ikwere akaltye-irreme. ⁴ Tyerrtye 144,000 nhenhe areye kwenhe Ngkarte-ante ware akwetethe arratye mwerre anerlte-aneme. Nhenhe areye kwenhe aneke arelhenge-arlke intetyakenhe anekeke, itne urlerte akwete anetyarte angwarelhomele. Itne akwetethe yanhe renhe apentetyarte Yepe-Yepe Akwerrke-arteke-arlke anemeke, nhenge nthenhe-werne apeke re alherlenghe. Artwe nhenhe areye kwenhe aneke Ngkarte-kenhe,

Yepe-Yepe Akwerrke-kenhe anteye. Artwe nhenhe areye kwenhe arrekwelenye areye-arteke aneme Yepe-Yepe Akwerrkele-arle itetheke mpwarekeke Ngkartewerne akngemele anteye. ⁵ Itne kwenhe urrtiyirremele iletayakanhe aneke, arrpenhe ilpernetyakenhe aneke, iwerre akurnele anetyakenhe aneke, arrangwe-arle.

Alkere-arenye urrpetye-akerte

⁶ Yanhe ikwere-iperrele the areke alkere-arenye arrpenhe alkere akertne anthurrele alkereke-irrerlenghe. Re kwenhe apmere arrpe-anenhe-werne alhetyame tyerrtye ingkirrekeke angkentye mwerre-akerte iletayeke, tyerrtye areyeke angkentye arrpenhe areyele-arle angkemeke, tyerrtye arrpenhe areyeke yenpe arkenye arrpenhe areye-arle anemeke anteye. ⁷ Alkere-arenye re anteme arlkemele angkeke, “Ngkarte akertne utyernerlte-anemele tnakewarraye arlte-arle angathe-irremenge Rarle nhenge tyerrtye ingkirreke court-eke ngkernetyeke itnenhe akalkelhe-iletayeke. Renhe tnakewarraye Rarle alkere, ahelhe, kwatye alaye, kwatye pintye, ingkirreke anthurre aknganekenge.”

⁸ Alkere-arenye arrpenhe anteme ikweringe intertele apetyeke imerte angkemele, “Awerrirraye! Apmere yanhe Babylon arritnye aneme tyerrtye atningkele-arle tnakewarremeke, kele lyete anteme atakelheke arltwe anteme intemele, tyerrtye areye apmere yanhe-arenye uyerrekenge anteye. Arrantherre itelareme tyerrtye areye apmere yanhe ikwerele-arle anerrirretyarte kwenhe akurne anthurre anetyarte. Kenhe tyerrtye arrpenhe areye apmere arrpe-anenhe-ngentyele apetyetyarte itnekenge apurte-irreke-arle itne-arlke akurne-irrekeke tyerrtye areyele apmere yanhe-ngentyele-arle itnenhe uternetyarteke. Arrantherre itelareme, nthakenhe-arle

nhenge tyerrtye anyentele apeke arrpenhe ngkwarle antywetyeke uternemele re anteme antyweme arerte-irremele, imerte arrpenhe areyenge apale interremele. Yanhe alakenhe re-arteke kwenhe itne akurne-irreke itne anteme Ngkarteke alkngwirreke anthurre.”

⁹⁻¹⁰ Awethe-anteye alkere-arenye arrpenhe alkereke-irremele apetyeke, arrpenhe yanhe atherre alheke-arle iperre, re-anteme arnterre anthurre alakenhe angkeke, “Ngkarte kwenhe ahele akwete aneme tyerrtye areyeke-arle artepe kwene-irremeke arrentye yanhe tnakewarremeke arrentye yanhe renhe, tyerrtye areyeke-arle arne arrpenhe-arle mpwarekeke arrentye-arteke-arle renhe-arle tnakewarremeke. Re tyerrtye yanhe areyeke ahele anthurre aneme anteye imperre-arle atnyenemeke iltie akwe-arratyete apeke nhenge urlele apeke. Ikwere-arle itne mpwarekenge Re itnenhe ure kweneke-arleke iwetyenhe nhenge kwerte arntirte-arle ntyemeke. Itne arnterre anthurre ampangketyenhe, nhenge Yepe-Yepe Akwerrke-artekele uthene alkere-arenye Ngkarte-kenhe areyele kwenhe arerlengen.¹¹ Kwerte ure-ngentyete itnenhe-arle ampemeke, re akwete-ante akertne antyerle-anemele. Arlte uthene ingwe uthenele itne akwetethe ampangkerlte-anetyenhe. Alakenhe nhenhe re kwenhe tyerrtye areyeke irretyenhe arrentye yanhe renhe-arle tnakewarremeke arne yanhe re-arteke-arle anemeke, nhenge yanhe areye ingkirrekeke arrentye yanhe ikwere-arle anthelherlte-anemeke imperre ikwerenhe itne-arrpeke-arleke intelhe-ilekenge.” Alakenhe-arle alkere-arenye ingkerne-iperre angkeke.

¹² Alakenhe ikwerenge anteme tyerrtye Ngkarte-kenhe areyele, Ngkarte-arle awerlte-anemeke imerte mpwarerlte-anemele iwenhe-arle Re itneke ilemeke,

Jesus-arle itelarerlte-anemeke, akwetethe awemele renhe arratye itelarerlte-anetyeke anaye.

¹³ The anteme aweke arrpenhe atyenge alkere-ngentyele angkerlenghe, “Pipe-ke alakenhe intelhe-ilaye! ‘Lyete-ngentyele yanhe areyele Jesus-arle apenterlte-anetyarteke nhenge itne apmere ahelhe nhenhele itethe anemele, kele itne alkere akertnele akangkemele anthurre-arle anetyenhe.’ ”

Nhenge Utmenge Akngerrele nhenhe renhe awemele, re angkeke, “Arratye apelaye! Ilweke-arle iperre itne akwete warrke-irretyakenhe anetyenhe. Kele-anteye-arle itne ltyerreyeke, Ngkarte-arle kwenhe yanhe areyeke akangkentye anthurre anerlenghe iwenhe apeke renhe-arle mpwaretyarteke, Re itnenhe mpwaretyeke ileke.”

Arrpenhele tyerrtye akurne areye irrerlknghe atweme

¹⁴ Yanhe ikwere-iperrele anteme the alkere arnareke, the anteme areke artwe-arteke angkulye mperlkerele alkere akertne anthurrenge anerle-anerlenghe. Re mwekarte-akerte gold-engentyele-arle mpwarekeke alartetye areye irrpentye akngerre, ilye ikwerenhenge re alyweke arnkwerte-arnkwerte arlpentye akngerre atnyenemele yanhe rarle kwenhe arrirlpe akngerre anthurre anekeke. ¹⁵ Alkere-arenye arrpenhe tyatye akngerre Ngkarte-kenhe-ngentyele arrateme artwe yanhe ikwere arlkeke angkulye mperlkerenghe-arle anetyameke ikwere angkemele “Alyweke arnkwerte-arnkwerte ngkwinhe inaye! Merne wheat ingkirreke kwenhe apmere ahelhe antekele mpenge-anteme-irreke. Ingkerreke anthurre aketyeke alhaye, apurtelhe-ilemele imerte!” ¹⁶ Kele re mpwareke iwenhe-arle renhe alkere-arenyele mpwaretyeke ileke. Re merne wheat alyweke

arnkwerte-arnkwerte arlpentye akngerrele aketye-alheke apmere ahelhe antekele-arle lyapemeke imerte ingkirreke apurtelhe-ilemele.

¹⁷ The anteme areke alkere-arenye arrpenhe tyatye akngerre Ngkarte-kenhe-ngentyele arraterlenge, re-inpe alyweke arnkwerte-arnkwerte arlpentye akngerre atnyenemele arrpenhe nhenge-arteke.

¹⁸ Yanhe ikwere-iperrele anteme the alkere-arenye arrpenhe areke, alkere-arenyele-arle ure arntarnte-arentye akngerre anemeke akwetethe-arle amperle-anemeke apwerte athirnte ikwerenge nhenge kwerte ntyentye mwerre akngerre-akerte. Re alkere-arenyeke arlkeke alyweke ankwerte-ankwete-arle atnyenetyameke angkemele, “Merne kripethe areye kwenhe kele mpenge-irreke apmere ahelhe ikwerenge. Itnenhe ingkirreke anthurre arne altyeye-altyeye-ngentyele alyweke yanhe-akertele aketyeke alhaye imerte itnenhe apurtelhe-ilemele!” ¹⁹ Kele re alhemele mpwareke nhenge iwenhe renhe alkere-arenyele mpwaretyeke ileke-arle, merne renhe alyweke ikwerele akemele. Itnenhe apurtelhe-ilemele re itnenhe akngemele arne akngerreke-arleke akwernemele, tyerrtye areyele-arle merne kripethe itnenhe ulthetyarteke akarrwe rlputnetyeke. Ayeye nhenhe kripethe-akerte kwenhe angkeme tyerrtye areye-akerte akurne-arle mpwaremeke. Alakenhe kwenhe angkeme Ngkarte-arle itneke ahele-irretyenhe itnenhe ulthemele atwemele anthurre-ante. ²⁰ Kenhe apmere akethenge Ngkartele kripethe areye ultheke akarrwe rlputnemele yanhe-ngentyele alhwe akngerre arne tyampite ikwerenge-ntyeye athelelherlenge nhenge Re kripethe itnenhe rlputneke-iperrele. Re kwatye urewe akngerre-arteke apetyeme, alhwe yanhe re iperte

akngerre aneke untwe-kenheke-atwetye, re kwenhe arlunge-arlentye anthurre kwatye urewe re irntwarre-akerle-irremele kilometre 300-eke-atwetye.

15

Ayeye alkere-arenye seven-akerte rlkerte-ilemeke-arle

¹ Yanhe ikwere-iperrele the areke iwenhe apeke arrpenhe renhe alkere-akertnenge arraterlunge arne iwenhe apeke re akngerre-apenhe anthurre renhe nhenge the renhe areke-iperrele apatemele anthurre. Alkere-arenye 7 aneke, Ngkartele itnenhe ileke rlkerte arrpenhe 7-pele tyerrtye akurne areye anthetyeke alhetyeke. Ngkarte kwenhe tyerrtye akurne areyeke ahe akngerre anthurre irreke-arle Re alkere-arenye nhenhe 7-pele yerneke itnenhene rlkerte-ilemele atwetyeke apeke apmere ahelhe nhenhe-arlke kwatye alaye-arlke akurne-ilettyeke. Nhenge itne tyerrtye areye rlkerte-ileke-arle atwemele anteye uyerrelhe-ileke-iperrele, kele itne impetyenhe anteme. Ngkarte anteme ahele-irretyakenhe anetyenhe. ² The awethe-anteye areke kwatye alaye akngerre kelathe-arteke areke anteme, re kwenhe ure uthene kelathe uthene anyente-irreke-arle-arteke. The areke tyerrtye atningke anthurre kwatye alaye iterele tnerlunge kelathe-arteke-arle anemeke. Nhenge apmere ahelhe nhenhe ikwerele anemele, nhenhe areyele arrentye-ketye ayene-ilelheke-arle, re itnenhe uyarne uterneke ikwere artepe kwene-irretyeke renhe tnaketyeke nhenge arne renhe apeke re-arteke-arle anekeke tyerrtye areyele-arle mpwarekeke. Itne imperre 666-kwenye aneke, imperre nhenge arrentye-kenhe anemeke. Itne ingkirrekele arne guitar-arteke atnyeneke Ngkartele-arle itnenhe anthekeke. ³ Itne yanhe ikwerele tnerrireke alyelhentye Moses-kenhe

alyelhemele, arrantherre itelareme nhenge Moses-arle Ngkarteke warrke-irretyarte. Itne Jesus-eke alyelheme anteye, Yepe-Yepe Akwerrke-arteke-arle anemeke. Itne kwenhe alakenhe alyelheme:

“Ngkarte, Unte anyente-ante ware kwenhe arne ingkirreke anthurreke alartetye aneme,
Unte anyentele ingkirreke anthurre mpwareme ilyernpenye anthurre.

Nhenge anwerne arne ingkirreke aremele Unte-arle mpwarekeke, anwerne apateme anthurre.

Unte apele tyerrtye areyeke apmere ingkirreke anthurrengentyele alartetye anthurre aneme,
Unte itneke arratyete anthurre angkeme itnenhe mwantyele arntarnte-arerle-anemele.

⁴ Tyerrtye ingkirreke kwenhe Ngkwenge atere ware itirreme
artepe anemele kwene-irremele Ngenhe tnakeme,
itne ingkirrekele-arle itelarerrirreme Unte-arle Alartetye aneme.

Unte anyente ware kwenhe mwerre anthurre aneme.

Tyerrtye ingkirreke anthurre kwenhe apmere arrpeanenhe-ngentyele apetyetyenhe Ngenhe akertne utyernetyeke tnakewarremele,

Unte-arle arratyete mwerre itirrerlenge akwetethe arne ingkirreke arratyete mwerre mpwarerle-aneme.”

⁵ Ikwere-iperrele anteme the awethe arnareke tyatyete akngerre Ngkarte-kenhe alkere-akertnenge aremele, arriwe altywere anekenge. Kwenenge ilthe ameke-ameke atyeporre Ikwerenhe tneke, apmere nhenge itne angkentye ameke-ameke Ngkarte-kenhe areye atnyenyartye. ⁶ Kenhe alkere-arenye 7-pele areyele, arne

akurne seven-arle yernekeke, tyerrtye areye arlkarentye-iletaye tyatye akngerrenge-ntyeye arrateke. Itne mantere mperlkere anthurreke irrpetyame amparrkerlengearle. Itne antayeke irrpeke gold-engentyele-arle mpwarekeke arerre ayernelheke. ⁷ Kenhe atnunthe 4-pele yanhe ikwerele tnerrirretyame, anyentele alkere-arenye 7-arrpe apanthe antheke gold-engentyele-arle mpwarekeke. Ngkarteke anteme ngkwarle-arteke apanthe seven-eke-arleke theleke imernetyeke Rarle ahele anthurre aneke. Rarle thewe akwete-ante-arle anemeke, Re kwenhe tyerrtye areyeke ahele anthurre aneme arne akurne-arle mpwaremeke. ⁸ Nhenge Ngkarte apmere ameke-ameke yanhe ikwerenge anemele angkulye kwerte akngerrele renhe arrkngerte-ileme areme-ketye, Rarle ilyernpenye anthurre anerlengye, rlterrke anthurre-arle anemele. Nhenhe ikwerele ureke tyerrtye areye apmere ameke-ameke yanheke uyarne irrpeme. Alkere-arenye 7-areyele rlkerte yanhe areye thelemele uyerrelhe-ileke-arle iperrenge, tyerrtye areye anteme awethe kwene-werne irrpetyeke.

16

Alkere-arenye seven-akerte

¹ Yanhe ikwere-iperrele the aweke arrpenhe tyatye akngerre ikwerenge-ntyeye arnterre anthurre arlkerlengye alkere-arenye areyeke apanthe 7-arle atnyenetyameke, “Nhenhe-ngentyele alherlte-iwaye arne kwatye athetheke-arteke apmere ahelheke apanthe 7-ngentyele thelaye. Nhenhele kwenhe imernetyenhe Ngkarte-arle tyerrtye areyeke ahele anthurre aneme ikwere-ketye-arle artepe untyeme-irrekeke Rarle itnenhe atwetyenhenge anteye.”

² Kele alkere-arenye arrekwele-iperrele apanthe ikwerenhe-ngentyele ahelheke theleke, kenhe tyerrtye ingkirreke anthurrele arrentye tnakewarremeke utyene akurne anthurre-akerte aneke, itne uyarne itirremele. Tyerrtye yanhe areye imperre arrentye-kenhe-akerte, itne kwenhe arne nhenge arrentye-arteke tnakewarremele tyerrtye areyele-arle mpwarekeke. Nhenhe areye thewe utyene akurne anthurre-akerte aneke nhenge alkere-arenye arne renhe apanthe-ngentyele thelekenge.

³ Kele alkere-arenye arrpenhele anteme apanthe ikwerenhe-ngentyele kwatye alayeke theleke, alakenhenge anteme kwatye ingkirreke akurne-irremele athetheke-irreke nhenge alhwe tyerrtye ilweke-arle-arteke akngarte-iwelheke. Atnunthe arrpenheke-arrpenhe ingkirreke kwatye-arenye, ilweke anteme.

⁴ Kele alkere-arenye arrpenhele anteme apanthe ikwerenhe-ngentyele kwatye lhere uthene kwatye pintye utheneke theleke. Alakenhenge anteme kwatye lhere-nge uthene kwatye pintye-nge ingkirreke anthurre re alhwe-werne akngarte-iwelheke. ⁵ Kenhe the alkere-arenye aweke kwatye ingkirreke anthurre-arle arntarnte-aremeke Ngkarteke angkerlenge, "Unte kwenhe arratye anthurre Ngkarte aneme, Unte-ante arratye mwerre aneme. Unte apele Ngkarte lyete-arle anemeke itethe akwete-arle aneke! Arne akurne nhenhe areye Unte-arle apmere ahelhe nhenhe-werne yerneme kwenhe mwerre anemenge Unte-arle kwenhe tyerrtye ingkirrekeke arratye itirreme. ⁶ Tyerrtye areyele, akurne-arle mpwarerlte-anemeke, atyewe Ngkwinhe areye irrerlknge atwemele nhenge yanhe areye angkentye Ngkwinhe-arle ilerlte-apemeke. Itne tyerrtye Ngkwinhe areye atweke alhwe itnekenhe thelelheke itne anteme itnenhe irrerlknge

atweke. Alakenhe ikwerenge anteme Unte kwatye alhwe-werne akngarte-iwemele itnenhe antywetyeke antheke.” ⁷ The anteme arrpenhe aweke apwerte athirntengentyele angkerlengere ure kwerte ntyentye mwerre akngerre-arle antyeme-ngentyele, “Ye, Ngkarte Alartetye, Unte kwenhe arratye akngerre anthurre aneme, ilyernpenye anthurre. Unte arratye-arle itirreke itnenhe rllkerte-ilemele.”

⁸ Kele alkere-arenye arrpenhele anteme apanthe ikwerenhe-ngentyele arlengeke theleke. Arlenge anteme urinpe anthurre irreke, tyerrtye areye arnterre ampetyeke. ⁹ Kele arlengele tyerrtye areye ampeke anthurre, kenhe itne anteme Ngkarteke ahele-anthurre-irreke renhe iltemele Rarle itnenhe arlengele arnterre anthurre ampemenge. Itne akwele utepe-irretyakenhe-arle irreke Ngkarte awetyeke Renhe tnakewarreyeke anteye, arrangwe-arle akenhe itne aneke. Itne kwenhe mwernte-irreke akwetethe anthurre akurne mpwarerlthe-anemele.

¹⁰ Kele alkere-arenye arrpenhele anteme apanthe ikwerenhe-ngentyele apmerekere theleke arrentye akngerre-arle anentye akngerre ikwerele, alakenhe ikwerenge anteme ingwemerte anthurre irreke apmerekere arrentye-kenhele, yanhe areyele arrentye renhe-arle awerlte-anemeke uyarne anthurre itirreme, itne ampwangkemele artneke alenye akakwelhemele itne-arle uyarne anthurre itirrekenge. ¹¹ Itne Ngkarteke ahele akengentye angkemele Renhe ilteke, Alartetye-arle alkere akertnele anemeke, itne-arle utylene akngerre-akerte uyarne anthurre itirrekenge. Itne akenhe akwete anthurre-arle arne akurne areye akwenpele mpwarerlthe-aneke itne Ikwere-werne utepe-irritnetyeke itirretyakenhe aneke.

¹² Kele alkere-arenye arrpenhele anteme apanthe ikwerenhe-ngentyele lhere Euphrates-ke theleke. Kele kwatye yanhe re uyerreke ahelhe-anteme areritye-irreke. Ngkartele kwenhe nhenhe mpwareke nhenge yanhe-ngentyele alartetye areye artwe irraweye anthurre itnekenhe areye-akerte urreke ikngerre-ngentyele apetyetyenhenge ahelhe arlenye ikwerele tyanenhetyeke. ¹³ The anteme areke utnenge akurne urrpetye arraterlenghe antyetyerre-arteke-arle anemeke. Anyente apmwe kwatye-arenye arrakerte-ngentyele arrateke, arrpenhe arrentye nhenge arrakerte-ngentyele arrateke, arrpenhe ayeye ilantheke-arle arrakerte-ngentyele arrateke urrtiyirremele ilemeke-arle. ¹⁴ Utnenge nhenhe areye kwenhe akurne anthurre aneke, itne arne akurne arrpe-anenhe ilyernpenye anthurre mpwaretyame. Itne alartetye ingkirreke apmere ahelhe anteke nhenhe-arenye areye-werne alheke itnenhe apurtelhe-ilemele atwerretyeke-urletye. Kenhe Ngkartele akenhe, Alartetye Impene-arle anemeke, itnenhe ileme nhenge arlte iwenhe anthurrenge arratyehale atwerretyeke.

¹⁵ The Alartetye Jesus angkerlenghe aweke, “Tyerrtye areye-aye, ayenge mwantyele awerrirraye. Ayenge kwenhe anyelkngge-anyelkngge apetyetyenhe, nhenge anyelkngalthelhe ingwele apetyeme-arteke. Nhenge ayenge apetyemele ayenge yanhe areyeke akangkemele anetyenhe akarre akwete-arle anerlte-anemeke, atyenge arelhemele, mwerre akwete-arle anerlte-anemeke nhenge yanhe-ngentyele itne apure awalhetyakenhe anetyenhenge. Nhenge tyerrtye-arteke-arle mantereke akwete-arle irrpemeke, re apure-irreme-ketye nhenge tyerrtye areyele renhe arerlenghe akethe untherlenghe.”

¹⁶ Kele arrentye urrpetyele antyetyerre-arteke-arle

anekeke alartetye areye artwe irrawe ye itnekenhe areye-akerteke antangkeke, itnenhe ingkirreke apmere Armageddon arritnyenge apurtelhe-ilemele akngetyetye. Kenhe yanhe areye akenhe angkentye Hebrew-ele angkeme arritnye yanhe renhe alakenhe ileme.

¹⁷ Kele alkere-arenye ingkernenyele anteme apanthe ikwerenhe-ngentye le alkereke theleke. Iparrpe anthurre angkentye chair mwerre akngerre Ngkartekenhe-ngentye le pipe kwenele-arle anemele arnterre anthurre alakenhe angkeme, “Kele kwenhe, kele uyerreke.”

¹⁸ Kenhe kwatye alarrkeke, kwatye arnterre anthurre unernenge angkeke, ahelhe arnterre anthurre akngelheke, apmere ahelhe ingkirreke anthurre anteme akiltye-irreke. Ahelhe awethe-anteye akngelheke akngerre-ulkere, tyerrtye le kwenhe aretyakenhe aneke alakenhe re arrekwelenge akngelherlenge.

¹⁹ Kele anteme apmere akngerre Babylon arritnye akalke-irreke apmere urrpetye anteme aneke. Apmere akngerre arrpenhe ingkirreke anthurre atakelheke, nhenge ahelhe akngelhemele re apmere arrpenheme atakerlenge. Kenhe Ngkartele anteme akenhe itelareke tyerrtye atningke apmere Babylon-arenye-arle akwetethe akurne mpwarerlte-anetyartenge, kele Re anteme itneke ahele-anthurre-irreke imerte itnenhe ingkirreke anthurre irrerlkng e atwemele.

²⁰ Kenhe apmere ahelhe akweke areye kwatye alaye le-arle utepe-akerrirremeke imerte uyerremele, anetyakenhe aneke, apwerte antherrtye areye-arlke atnyemele uyerreke.

²¹ Kwatye apweteke akngerre alkere-ngentye le atnyerrirreke iparrpe anthurre. Itne kwenhe ulthentye akngerre anthurre, nhenge itne-arle iron-ngentye le mpwareke-arteke. Itne artwe uthene arelhe uthene ingkirreke atwetyame, itne uyarne anthurre itirreme. Itne ap-

atemele anthurre aneke, itne Ngkarte akwetethe ilterlte-anemele Ikwere akengentye angkemele Rarle itnenhe alakenhe atwetyamenge.

17

Arelhe apmere akurne akngerre Babylon-arteke-arle aneme

¹ Alkere-arenye 7 yanhe areye ikwerele tnerirretyame apante arltwe areye-akerte. Kele anyente itneke-gentyele apetyemele atyenge angkeke, “Nhenhe-terne apetyaye the ngkwenge arelhe akurne imernetyehenge artwe atningkenge-arle apwerte maneke interle-anemeke, Ngkartele-arle renhe irrerlknge atwetyehenge lyete. Arelhe nhenhe-akerte arrpenhe itirraye, re kwenhe apmere akngerre Babylon-arteke aneme, nthenhele-arle artwe ingkirreke arelhe arrpenhe areyenge akwetethe interlte-apemenge. Apmere akngerre yanhe kwenhe lhere atningke itwele.

² Kenhe alartetye areye akenhe apmere arrpe-anenhe-gentyele apetyemele apmere akngerre yanhe ikwenge apurte-irrerlte-aneme itne ingkirreke anthurre anteme akurne-irremele re-arteke, arelhe arrpenhe areyenge interlte-apemele, akngwelye areye-arteke akwele. Alakenhe-anteye tyerrtye areye ahelhe anteke-gentyele apetyemele akurne-irreremele tyerrtye apmere yanhe-arenye areyele-arle itnenhe uternerlengge akurne mpwaretyeke. Itne itnenhe ngkwarle antywetyeke antheme, antyweke-arle-iperre itne arerte-irremele akurne anteme mpwareme, angwenhe apeke ikwenge intemele, re-arteke.” Nhenhe kwenhe alkere-arenye ele atyenge imerneke, atyenge ilemele.

³ Yanhe ikwere-iperrele anteme Utnenge Akngerre Ngkarte-kenhe atyenge-arleke irrerlengge, alkere-arenye anteme apetyemele ayenge apmere arrangethe-terne

akngeke. Apmere yanhe ikwerele the arelhe areke, arrentye athetheke anthurre ulkereke arrernelherlenge. Arrentye yanhe akaperte 7-akerte rulye-rulye 10-akerte aneke. Angkentye akurne-ante anthurre arrentye nhenhe aneke arrpenhele-arle intelhe-ilekeke, Ngkarteke-arle anyurre-irremeke. ⁴ Kenhe arelhe akenhe mantere athetheke mwerre akngerreke irrpeme, re arne mwerre akngerre arrpenhe areyeke irrpeke gold-engentyele-arle mpwarekeke apwerte tyeperre areye-ngentyele-arlke, iltye-kenhe areye, ingke-kenhe areye, untye-kenhe areye, atype-kenhe areye-arlke. Iltyele re tyampite arntwirrkeke gold-engentyele-arle mpwarekeke arne akurne anthurre areye-akerte rarle mpwareke. Arrantherre itelareme, re artwe atningke anthurunge inteke, arne akurne arrpenhe areye mpwaretyarte. Arne akurne akngerre yanhe areye rarle mpwareke-arle tyampitele-arlenge arrernerlenge-arle mpwanke anthurre. ⁵ Arrpenhele arelhe urleke-arleke arritnye anyente intelhe-ileke-arle. Arritnye yanhe re aneke انگکنتیة الینگکیونتیة-اکرتة اررپنه اریة الیة لاریتیاکنهنه انیتیا، کنه لیة انتمه تیئرتیة ینگیررکة الیة لاریة ایوننه اپکة رنه ارریتنیة ایلمنجه. نهنجه intelhe-ilentyele alakenhe ileme, “Ayenge kwenhe apmere akngerre anthurre Babylon aneme, mikwe ingkirrekeke arrpenhe areyenge-arle apwerte ngkweltyeke interlte-anemeke. Arne akurne ingkirreke anthurre-arle atyenge-ngentyele arrateme.” ⁶ The areke arelhe yanhe arerte-irrerlenge nhenge Ngkarte-kenhe areye irrerlknge atweke-iperrele kele imerte alhwe itnekenhe anteme antywemele, tyerrtye yanhe areyele-arle akwetethe anthurre Jesus arratyة الیة لاریلته-انککة.

Nhenge the arelhe nhenhe aremele ayenge apateke

anthurre. ⁷ Kenhe alkere-arenye anteme atyenge angkeke, “Iwenhenge-arle-ame unte apateme anthurre? The kwenhe lyete ngkwenge iletynhe imernemele nhenge iwenhe unte lyete arernenge, arelhe yanhe, arrentye-arlke renhe-arle akngernerle-apemeke, yanhe-arle thewe akaperte 7-akerte rulye-rulye 10-akerte. ⁸ Arrentye yanhe re unte-arle lyete ware arerle-iwerneke kwenhe itetheke-amparre aneke ilweke anteme re, arpenhele renhe iperte akngerre anthurreke akwerneke. Kele lyete anteme re iperte akngerre ikwenge-ntyele arrateme. Nhenge tyerrtye akurne areyele aremele arrentye renhe iperte akngerrenge-ntyele arraterlenghe itne apatetyenhenge anthurre. Tyerrtye nhenhe areye kwenhe aneme arritnye-arle Ngkartele pipe-ke intelhe-iletynhe anekenge, yanhe areye itethe-arle akwete-ante anetyakenhe anetyenhe. Kenhe arrentye yanhe re kwenhe arrekwele-arle itetheke-amparre anekeke re anteme ilweke, awethe anetyakenhe anteme aneke, re kwenhe awethe arratetyenhe Ngkartele anteme renhe uyerrelhe-iletynhe anthurre, renhe irrerlknghe atwetyenhe anthurre.”

⁹ Kele alkere-arenye anteme atyenge arrentye yanhe ikwere-akerte awethe ileke. “Unte apeke ilyernpenye anthurre aneme, unte ayeye nhenhe renhe itelaretyenhe nhenge akaperte-werne ilemele. Kenhe akaperte 7-ele apwente antherrtye 7-akerte arratye-ileme nthenhele-arle arelhe yanhe anemeke. ¹⁰ Akaperte areyele, itne ileme-anteyele alartetye 7-akerte. Kenhe alartetye 5-pele interteke-interte kele aneke uyerreke anteme, lyete anteme aneme anyente akwete aneme apmere ikwengerheke alartetye antime, kenhe arpenhe akenhe alartetye irretynhe anetyakenhe akwete-arle. Nhenge re alartetye irreke-arle iperre, re arlte arlenghe-arlentye anetyakenhele,

arrangkwe-arle. Akweke ware re anetyenhe imerte uyer-retyenhenge anteme. ¹¹ Kenhe arrentye yanhe re itethe-arle anekeke ilweke-arle anteme, re kwenhe alartetye arrpenhe aneme nhenge eight-ngare. Re kwenhe arratye akurne anthurre anetyenhe nhenge alartetye arrpenhe 7 areye-arteke. Kenhe Ngkartele kwenhe renhe ure kweneke-arleke iwetyenhe renhe uyerrelhe-iletienhe anthurre.”

¹² Kenhe alkere-arenyele atyenge arrentye yanhe ikwere-akerte akwete anthurre iletienhe. Re angkeke, “Rulye-rulye yanhe 10-pele unte-arle areke, itne kwenhe alartetye 10-pele aneme, kenhe itne akenhe alartetye irretyakenhe akwete-arle. Itne akenhe arrentye yanhe ikwenge apurte-arle-irretienhe nhenge re alartetye irrerlenghe, itne ikwenge apurtele tyerrtye ingkirrekeke alartetye anerlte-anetyenhenge. Itne kwenhe itneke alartetye arlte arlenghe-arlentye anetyakenhe anetyenhe, arlte urteke ware itne anetyenhe, nhenge hour anyenteke ware-arteke, kele itne anteme uyerretienhe, itneke alartetye akwele aneke akweke ware. ¹³ Kenhe nhenhe 10-pele itne ingkirreke itirreke arne renhe-anteye mpwaretyeke, itne arrentye yanhe ikwere angkeke, ‘Unte anyente-arenye kwenhe arne ingkirrekeke alartetye akwete anetyenhe, anwerne kwenhe ngenhe-ante ware awetyenhe mpwaremele iwenhe apeke renhe unte anwernenhe mpwaretyeke ileme.’ ¹⁴ Alartetye 10-pele uthene arrentye uthene kwenhe Yepe-Yepe Akwerrkenghe atwerretienhe. Re akenhe itnenhe irrerlknghe atwetyenhe itnenhe uyerrelhe-iletienhe, Rarle kwenhe Atyeperre anthurre aneme alartetye arrpenhe ingkirrekeke alartetye-arle anemeke. Re King aneme, King arrpenhe ingkirrekeke alartetye-arle anemeke. Tyerrtye yanhe areye ikwenge-arle anemeke itne kwenhe aneme

Revelation 17:15 75 Revelation 17:18

Ngkartele-arle akngakeke, renhe-arle arratyte itelarerlthe-anemeke.” Alakenhe nhenhe re-arteke kwenhe alkere-arenyele atyenge ileke.

¹⁵ Kele alkere-arenye re atyenge awethe angkeke, re atyenge arelthe akurne yanhe-akerte ileke alakenhe angkemele, “Awaye, the ngkwenge arratyte-iletyenhenge iwenhe-arle unte arekeke. Itelareme, nhenge unte arelthe akurne yanhe areke apmere akngerre yanhe-arteke-arle anemeke, nhenge lhere akngerre areye itwele. Lhere akngerre yanhe areye kwenhe tyerrtye areye aneme apmere arrpe-anenhe-ngentyele, tyerrtye yenpe arkenye arrpenhe areye-akerte, tyerrtye areye-arlke angkentye arrpenheke-arrpenhe-arle angkeme. ¹⁶ Itelaraye, unte rulye-rulye 10 areye areke, itne alartetye 10 areye-akerte, arrentye akngerre-akerte-arlke ileme. Itne apurte-irretyenhe ingkirreke anteme arelthe yanheke ahentye-anetyakenhe anetyenhe artwe atningkenge-arle interle-apemeke. Itne arne mwerre akngerre ingkirreke ikwerenge-ntyete rakemele akngetyenhe rarle atnyenemeke, itne mantere ikwerenge irlwetyenhe, renhe akethe-iletyenhenge. Itne tyelke ikwerenhe arlkwe-tyenhe renhe ureke-arleke iwemele renhe irrerlkngge atwemele. ¹⁷ Ngkartele kwenhe alartetye 10-pele nhenhe areye apurtelhe-ileke itne anyente-arteke itirremele anetye nhenge yanhe-ngentyele itne arrentye yanheke iletyenhenge alartetye itnekenhe anetyeke. Kele arrentye yanhe re anteme arne ingkirreke anthurreke alartetye anetyenhe nhenge iwenhe-arle Ngkarte angkeke arratyte irretyeke-atwetye.

¹⁸ “Arelhe akurne yanhe unte areke, re kwenhe apmere akngerre-arteke aneme. Kenhe alartetye apmere yanhe ikwere-arenye anteme alartetye arrpenhe ingkirrekeke alartetye irretyenhe apmere ahelhe anteke nhenhele-arle

anemeke.” Alakenhe renhe alkere-arenyele atyenge ileke.

18

Ngkartele apmere akngerre Babylon atakeme

¹ Nhenhe ikwere-iperrele the areke alkere-arenye arrpenhe alkere-ngentyele apetyerlenghe. Alkere-arenye nhenhe re kwenhe alartetye impene aneke rlterrke anthurre-arle anemeke. Kenhe ahelhe anteke nhenhe anthurre alkngenthe-irreme rarle kwenhe imparkemele anthurre anekenge. ² Nhenge re apetyemele arteke arnterre anthurre arlkemele angkeke, “Ngkartele kwenhe apmere akngerre Babylon ataketyeke aneme tyerrtye ingkirreke anthurre apmere ikwerele kwenhe ilwetyenhe. Alakenhe ikweringe anteme arrenkwelthe arrpe-anenhe apmere yanhe ikwerele anetyenhe, thiye akurne areye-arlke yanhe ikwerele anetyenhe. ³ Tyerrtye apmere yanhe-arenye areyele kwenhe arne akurne areye akwetethe mpwarerlte-anetyarte. Itne mpwenye akngerre areye anetyarte. Kenhe tyerrtye apmere arrpe-anenhe-ngentyele apmere yanhe-werne alherlte-iwetyarte itnenhe arrkernemele, iwerre akurne itnekenhe apentemele. Alartetye areye apmere arrpe-anenhe-ngentyele apmere ikwere-werne alhetyarte, arne akurne areye mpwarerlte-anetyeke alakenhe re-anteye. Kenhe arrpenhe areyele arne areye-arle apwerte ngkweltyeke antherretyarte, apmere yanhe ikwere-werne alhetyarte. Itne arne mwerre akngerre areye akngetyetyarte tyerrtye ankeyalthe areyeke sell-eme-ilettyeke, apwerte ngkweltye akngerre inirtneleme. Tyerrtye ingkirreke arerte-irreke ngkwarle-arle antyweke-iperre-arteke.” Alakenhe renhe alkere-arenye yanhele atyenge ileke.

⁴ Awethe-anteye the Ngkarte aweke alkere-ngentyele angkerlenge. Re kwenhe alakenhe angkeke,

“Tyerrtye Atyinhe areyaye, apmere akngerre yanhe impemele alhaye ikwerenge-ntyete arratemele.

Nhenge arrantherre apeke itnekenge apurte akwete aneme, arrantherre-inpe itne-arteke-anteye akurne-irretyenhe.

The kwenhe itnenhe arlkarentye-akngerre-iletaye aneme itnenhe arrilemele, itne-arle arne akurne areye ingkirreke mpwaryartenge.

Kele iwerre akurne itnekenhe arrkernetyale anaye, The apeke arrenhantherrenhe arrileme-ketyenge.

⁵ Itne kwenhe arne akurne areye akwetethe mpwarerlteneme,

itne arne akenge arrpe-anenhe aharle-iweme-arteke alkere-akertneke-atwetye.

Kenhe Ayenge kwenhe itneke ingkirrekeke akaltye anthurre aneme,

nthakenhe-arle itne akwetethe arne akurne areye mpwarerltenemenge,

Ayenge arne akurne yanhe areyeke alkngwirretyakenhe aneme.”

⁶ Kele Ngkarte anteme alkere-arenye yanhe areyeke angkeke, yanhe areye-arle Re ilekeke itnenhe arriletayeke,

“Arne akurne iwenhe apeke renhe-arle tyerrtye areyele apmere ahelhe nhenhe-arenye arrpenhe areyeke mpwareke,

arrantherre kwenhe itneke alakenhe-anteye mpwarirtnetyeke.

Itne kwenhe Atyinhe areye akwetethe arnterre anthurre atwetyarte.

Kele arrantherre kwenhe itnenhe atwirtnetyeke-anteye lyete, arnterre anthurre nhenge ulkere.

Akurne yanhe areye arratyete-anteye arrilaye.

⁷ Tyerrtye yanhe areye apmere akngerre yanhele-arle anetyarte ayeyele ilelherlte-anetyarte.

Itne kwenhe mantere akngerre atnyeneke arne mw-erre akngerre arrpenhe areye-arlke apwerte ngk-weltye akngerre-akerte-arlke.

Itnenhe arlkarentye-akngerre-ilaye itne uyarne anthurre itirremele anetyeke.

Tyerrtye areye apmere yanhele-arle anekeke itneke-arrpe alakenhe angkeme,

‘Anwerne kwenhe arelhe impene-arteke aneme, tyerrtye ingkirrekeke alartetye-arteke.

Anwerne kwenhe warlekwerte-irretyakenhe anetyenhe, nhenhele anemele akayale artnemele, alhwarrpe anerlte-anemele,

anwerne akangkemele anthurre-tetye anetyenhe.’

Alakenhe-arteke kwenhe itne ayeyele ilelheme.

⁸ Itne-arle alakenhe tnakelherlenghe, lyete ware The anteme itnenhe atwetyenhe, itne uyarne anthurre itirretyenhenge.

Itne rilkerte anthurre irretyenhe anteme, tyerrtye atningke ilwetyenhe, itne alhwarrpe anthurre atnerte awelhetyenhe. Nhenhe ikwerele ureke, apmere arlenye ararrtye anthurre irreme merneke arrangkwe-arlke.

The apmere akngerre yanhe urele itetyenhe, re apetyenhe uyerretyeke-atwetye.

Ayenge kwenhe Alartetye arratyete anthurre aneme, Ayenge kwenhe aneme itirremele-arle nthakenhe-arle itnenhe arrilettyeke.”

⁹ Nhenge apmere akngerre yanhe re amperlenge, ure akwerte antyure akngerre akeme-irretyenhe, alartetye areye apmere arrpe-anenhe-arenyele aretyenhe imerte arnterre anthurre arrangemele. Alartetye areye apmere arrpe-anenhe-ngentyele itne kwenhe yanhe ikwere-werne alhetyarte, mpwenye ikngwetyarte, arne akurne areye mpwaremele, iwenhe apeke ikwere itne akangkemele anetyeke. Itne anteme kwerte antyure yanhe renhe apmere arlenge-ngentyele aretyenhe, itne apmere yanhe ikwere arnterre anthurre artnetyenhe, Ngkartele-arle kwenhe renhe urele iterlenge renhe akethe-ante arrernemele. ¹⁰ Apmere arlenge-ngentyele itne tnemele aretyenhe atere-irremele nhenge Ngkartele itnenhe-arlke urele iteme-aketye. Yanhe ikwerele tnemele anteme itne itirretyenhe nhenge nthakenhe-arle arne areye anetyarte-akerte. Itne angketyenhe, “Ayekaye, akunye areye. Yanhe areye apmere akngerre yanhele-arle aneme uyerreke anthurre. Apmere akngerre yanhe kwenhe mwerre akngerre anthurre anetyarte, tyerrtye areyele renhe tnaketyarte. Kenhe Ngkartele akenhe renhe urele iteke imerte renhe iparrpe-iparrpe anthurre atakemele.”

¹¹ Kenhe tyerrtye areye, arne areye-arle apwerte ngkweltyeke antherrentye akngerre, apmere yanhe ikwere irnterre anthurre arrangketyenhe, tyerrtye areye arne areye-arle itneke-ngentyele apwerte ngkweltyele inet-yarte, itne-arlke apeke kwenhe ilweke. Itne kwenhe itneke-ngentyele apwerte ngkweltye awethe uyarne in-eme. ¹² Itne apatemele anthurre uyarne itelaretyenhe iwenhe apeke renhe mpwaretyeke. Itne apayuthnerremele anetyenhe, “Angwenhele-ame gold uthene silver uthene anwerne-kenhe inetyenhe, apwerte mwerre akngerre arrpenhe areye-arlke? Angwenhele-

ame mantere arlkenye arrpenhe mwerre akngerre areye anwerne-kenhe inetyenhe, antere unpe mwerre-angkere ntyeme-arlke? Angwenhele-ame arne arrpenhe mwerre akngerre areye inetyenhe anwerne-arle apwertengentyele metal-ngentyele mpwarekeke? Uyerreke kwenhe, tyerrtye areye arne mwerre akngerre areye-arle anwerneke-ngentyele inetyarte kwenhe ingkirreke anthurre ilwerrirreke. ¹³ Kele angwenhele-ame arne ntyentye mwerre akngerre nhenhe areye anwerne-kenhe inetyenhe, ngkwarle, antere, merne ulpmenthe, annge wheat, pweleke, yepe-yepe, nanthe areye, wagon areye-arlke, arne arrpenhe ingkirreke-arlke anwerne-arle atnyenemeke? Angwenhele-ame warrkene nhenhe areye anwerne-kenhe inetyenhe? Uyerreke kwenhe, tyerrtye areye arne mwerre akngerre areye-arle anwerneke-ngentyele inetyarte kwenhe ingkirreke anthurre ilwerrirreke. ¹⁴ Arne mwerre akngerre ingkirreke itne-arle atnyenetyarte uyerreke, apwerte ngkweltye ingkirreke, arne mwerre akngerre arrpenhe areye kwenhe arrangkwe aneme. Itne kwenhe arne yanhe areyarteke awethe atnyenetyakenhe anetyenhe, arrangkwe anthurre-arle.”

¹⁵ Itne alakenhe angketyenhe, itne-arle kwenhe apmere akngerre yanhe ikwere-werne alhetyarte arne arrpenheke-arrpenhe areye antherretyeke apwerte ngkweltye akngerre inemele. Artwe yanhe areye kwenhe arlengele atere tnetyenhe Ngkartele itnenhe anteme apeke urele iteme-ketye anteye. Ikwere iperre anteme itne irnterre anthurre arrangkemele alknultye theleheke. ¹⁶ Itne anteme angketyenhe, “Ayekaye akunyeapenhe areye. Akurne akngerre anthurre itneke irreke-arle. Yanhe areye apmere akngerre yanhe ikwerele-arle anemeke kwenhe uyerreke. Yanhe areye mantere

mwerre arlkenye arrpenhe anthurreke-arle irrpetyarte. Itne ite-kenhe areyeke irrpetyarte iltje-kenhe areye-arlke gold-engentyele-arle apwerte tyeperre anthurrengentyele-arlke-arle mpwarekeke. ¹⁷ Kenhe iparrpe anthurre Ngkartele arne mwerre akngerre ingkirreke anthurre atakeke.”

Kenhe tyerrtye atningke akenhe boat areyenge kwatye alayele tyanenheme arne areye apwerte ngkweltyeke antherretyeke apmere arrpe-anenhe ikwerele. Nhenge boat-eke-artweye yanhe areyele, warrkene itnekenhe areyele-arlke arlengengentyele arerlte-anetyenhe, itne aretyenhe ure amperleng. ¹⁸ Itne mwantyele aretyenhe ure kwerte antyure akngerre akeme-irrerleng arleng nhakwe. Itne anteme angkerretyenhe, “Apmere akngerre arrpenhe ingkirreke kwenhe nhenhe-arteke anetyakenhe aneke. Apmere yanhe kwenhe arrpenhe ingkirrekeng akngerre anthurre ulkere.” ¹⁹ Nhenge itne renhe aremele, atnerte akngarte-anthurre-iwelhemele irretyenhe, arlpmenyele mperlkere anthurre ilelhemele. Itne irnterre anthurre arrangkemele angketyenhe, “Akunye-apenhe areye, akurne anthurre irreke tyerrtye areyeke apmere akngerre yanhele-arle anemeke, itne kwenhe iparrpe-iparrpe anthurre ilwerrirreke. Tyerrtye ingkirrekele apmere arrpe-anenhe-ngentyele kwenhe itnenhene akertne utyernetyarte. Yanhe areye boat akngerre-akerte areye arne arrpe-anenhe itneke-werne akngetyemele apwerte ngkweltye akngerre inetyarte. Lyete anteme akenhe Ngkartele-arle apmere Babylon iparrpe atakeke arne mwerre akngerre ingkirreke-arlke yanhe ikwere-arle anekeke.”

²⁰ Kele anteme arrpenhe alkere akertne-ngentyele angkeke, “Arrantherre alkere akertnele-arle anemeke, akangkemele anaye, apmere Babylon-eke nthakenhe-

arle-irretyenhe! Arrantherre kwenhe Ngkarte-kenhe areye aneme, arrantherre angkentye Ngkarte-kenhe-arle ilerle-apetyeke yernekeke, nhenge yanhe ayeye-arlike Ngkarteke-arle angkekeke, akangkemele anerrirraye, Ngkartele-arle kwenhe arraty mpwaretyenhe nhenge Re tyerrtye Babylon-arenye areye arrilemele itne-arle kwenhe arrekantherre arne akurne anthurre mpwarekenge!”

²¹ Kele alkere-arenye lterrke akngerre anthurrele anteme apwerte akngerre anthurre, athere akngerre-apenhe-arteke, akertne-ileke imerte kwatye alayeke-arleke iwemele. Re anteme alakenhe angkeke, “The kwenhe apwerte yanhe kwatye alayeke-arleke iweke, re uyerreke anteme. Kele, alakenhe renhe-arteke Ngkartele apmere akngerre yanhe Babylon ataketyenhe renhe akethe-ante arrernemele athirnte-iletienhe, arrantherre anteme renhe uyarne aretyenhe. ²² Arrpenhe anyente-ante-arle anetyakenhe alyelhentye-arle mwerre alyelhetyeke anemeke apmere yanhe ikwerele, arrpenhe-arle anetyakenhe guitar akangkemele arrkene-irremele anetyenhe. Arrangkwe anteme kwenhe lyete anetyenhe, nterte anthurre anteme anetyenhe. Arrpenhe anyente anetyakenhe merne ntange athetyeke, awetheke arrangkwe tyerrtye nhenhe ingkirreke-arle kwenhe ilwetyenhenge. ²³ Apmere akngerre yanhe ikweringe, arrpenhe anyenteke arrangkwe anetyenhe alkngenthe iletie. Artwe uthene arelthe uthene awethe anewe-aketyakenhe anetyenhe. Tyerrtye yanhe areye apmere yanhe ikweringe-ntyete-arle arne areye apwerte ngkweltyeke antherretyarteke kwenhe ilyernpenye anthurre aneke. Tyerrtye apmere arrpe-anenhe-ngentyete kwenhe itnenhe akertne utyernetyarte. Ngangkere areye akenhe urrtye akwetethe angkentye akngerre, kenhe tyerrtye ap-

mere arrpenhe areye-ngentyele itnenhe arratyete akwete itelaretyarte. Kenhe arne ingkirreke anthurre apmere akngerre ikwerele atakelhemele uyerretyenhe.

²⁴ “Tyerrtye Babylon-arenye areyele kwenhe irrerlknge atwetyarte nhenge yanhe areye angkentye Ngkarte-kenhe ilerlte-apetyeke-arle yerneke, nhenge yanhe areye-arlike Ngkarteke-arle angketyeke. Itne Ngkarte-kenhe areye ingkirreke irrerlknge atwetyarte. Alakenhe ikwerenge anteme Ngkarteke apmere akngerre Babylon akethe-ante arrerneke tyerrtye ingkirreke yanhe-arenye areye-arlike uyerrelhe-ilemele.”

19

Ngkarteke apmere Babylon atakeke-iperre, tyerrtye ingkirreke akertnele-arle anemeke Renhe tnaketyenhe

¹ Ikwere-iperrele, alkere-arenye lterrke akngerre angkentye uyerreke-iperrele the aywerre aweke tyerrtye atningke-arteke alkere akertnenge apurte alyelhewarrerlenge. Alakenhe nhenhe kwenhe itne arlkemele, “Hallelujah, anwerne Ngkarte akertne utyernemele tnakewarreye Rarle kwenhe anwernenhe itetheke mpwarerlenge ilweme-ketye. Re kwenhe mwerre akngerre anthurre aneme arrpenhe areye-arteke anetyakenhe! Re-ante ware kwenhe ilyernpenye anthurre! ² Re kwenhe arne mwerre areye mpwarentyete akngerre, akwetethe kwenhe Re arne areye arratyete mpwarerle-aneme. Re arelthe akurne yanhe renhe areke, arrpenhe atningke-arle uternetyarteke, mpwenye ikngwemele apmere arrpe-anenhele. Arelhe re Ngkarte-kenhe areye irrerlknge atweke anteye. Kenhe lyete Ngkarteke anteme renhe arrileke.”

³ Akertnenye-arenye areyele arnterre alakenhe awethe arlkeke, “Hallelujah, anwerne Ngkarte akertne utyernemele tnakewarreye, Rarle kwenhe apmere akngerre yanhe renhe alkngenthe-ilemele itekenge, ure kwerte antyure akngerre akwete-ante akeme-irrerleng.”

⁴ Artwe akngerrepate 24 yanhe areye uthene atnunthe 4-pele uthene Ngkarte Alartetyeke artepe-anemele kwene-irreke Renhe tnakewarremele. Rarle thewe, chair mwerre akngerrele-arle anerle-anemeke. Itne angkeke, “Yewe, anwerne ingkirrekele Ngkarte utyernerlthe-anemele tnakewarreye.”

Rarle, Yepe-Yepe Akwerrke-arteke-arle anemeke anewe akeme

⁵ Yanhe ikwere-iperrele the aweke arrpenhe angkerleng, angkentye chair mwerre akngerre yanhengentye-arteke. Re kwenhe alakenhe arlkeke,

“Anwerne ingkirrekele Ngkarte akertne utyernemele tnakewarreye! Warrkene ingkirreke Ikwerenhe areyele-arlke renhe akertne utyernemele tnaketyeke-anteye, lterrke areyele-arlke, alyepe-alyepe areyele-arlke; Tyerrtye ingkirreke Ikwerenhe areyele-arlke Renhe akertne utyernemele tnaketyeke yanhe Ikwere-ketye ateralthe areye-arlke.”

⁶ The anteme aweke angkentye aywerre akngerre tyerrtye atningke-arle arlketyame-arteke. Angkentye kwenhe aneke kwatye-arle arnwangkeme-arteke, kwatye aywerre angkeme-arteke nhenge apwarte akertnenge thelelhomele. Itne alakenhe angketyame, “Hallelujah, anwerne Ngkarte akertne utyernemele tnakewarreye Rarle kwenhe alartetye anthurre anwerne-kenhe

anerlenge. Re kwenhe tyerrtye ingkirrekeke alartetye anthurre aneme apmere ahelhe nhenhele-arle anemeke. ⁷ Kele anwerne Renhe akangkemele tnakewarreye, Ikwere alyelhetyeke Rarle kwenhe mwerre anthurre anerlenge ingkirreke mpwaretyeke ilyernpenye anthurre. Lyete anteme aneme nhenge Yepe-Yepe Akwerrke-artekele-arle anewe aketyeke aneme, anewe ikwerenhe akwete-ante mpwarelheke lyete anteme re ikwere akarelhemele. ⁸ Ngkartele kwenhe renhe antheke mantere mperlkere mwerre akngerre imparrkeyeke irpetyeke.” Anwerne itelareme, mantere nhenhe areyele-arle anwerneke arraty-ileme warrke mwerre anthurre Ngkarte-kenhe areyele-arle Ikwere mpwarekeke.

⁹ Kenhe alkere-arenye re-anteye atyenge angkeke, “Nhenhe intelhe-ilaye: Nhenge rarle thewe Yepe-Yepe Akwerrke arteke-arle anemeke anewe akerlenge, tyerrtye atningke kwenhe apetyetyenhe apurte-irremele merne akngerre akangkemele arlkwetyeke. Ngkartele tyerrtye ikwerenhe areye anyente-irretyeke ileke-arle. Nhenge itne apurte-irremele itne akangkentye anthurre anetyenhe.” Alkere-arenye anteme atyenge awethe angkeke, “Angkentye nhenhe areye itne kwenhe arraty aneme, itne Ngkarte-ngentyele.”

¹⁰ Nhenge the renhe awemele ayenge ikwerenge arrekwele iparrpe anthurre ulperre intemele renhe tnaketyeke. Re akenhe atyenge angkeke, “Ayenge tnaketyale anaye! Ayenge kwenhe warrkene Ngkarte-kenhe ware aneme nhenge unte-arteke-anteye warrkene arrpenhe areye-arteke tyerrtye areyeke-arle Jesus-akerte ilerle-apemeke. Ngkarte-tetye akertne utyernemele tnakaye tyerrtye areyele-arle arrpenhe areyeke-arle Jesus-akerte ilerlte-apemeke, itne angkentye arratyale angkeme Utmenge Akngerrele-arle itnenhe anthekeke.”

Ayeye artwe nanthe mperlkere artepele akerte

¹¹ Kele the anteme areke alkere akertne altywere-irrerlenghe, ayenge apateke nhenge nanthe mperlkere arratekenge. Artwe anyente nanthe yanhe artepele anetyame; artwe yanhe re arritnye alakenhe-akerte “Anyente Arratyte Itirrentye Akngerre, Arne Areye Arratyte Mpwarentyte Akngerre.” Re-ante kwenhe aneme arratyte mwerre mpwarentyte akngerre-arle, tyerrtye ingkirreke court-eke ngkerneke-arle iperre aretyeke anteme itne apeke arratyte mwerre anetyartenge ithwenge apeke. Nhenge re arrpenhe areyenge atwerretyeke alhemele, re tyerrtye akurne areye-ante irrerlknghe atweme. ¹² Alknghe ikwerenhe kwenhe ure alkngenthe-arteke ampeke, re mwekarte atningke alartetye-kenhe areye akaperteke irrpeke. Tyerrtye ikwerenheke-arleke arrpenhele arritnye alengke-iwentye intelhe-ileke. Arrpenhe areyele arritnye yanhe uye itelarerlenghe, re-ante ware renhe itelareke. ¹³ Mantere rarle irrpeke-arle kwenhe alhwe-ante anthurre. Itne angkeme arritnye ikwerenhe-arle alakenhe akwele aneme, “Angkentye Ngkarte-kenhe.” ¹⁴ Atwerrentye akngerre areye alkere akertnenye-arenye atwerretyeke apurte-irreke renhe apenteke ingkirrekele nanthe mperlkereke-arle antyete, mantere mperlkereke irrpeleme anteye. ¹⁵ Kenhe artwe yanhe itnekenge arrwekele-irretyame, arrakertele re alyweke arrirrlpe akngerre anthurre arntwirrkemele re tyerrtye areye apmere ingkirreke anthurre-ngentyele atwerretyeke impetyenhenge. Kenhe itne akenhe renhe uyarne atwirtneme renhe akwele uyarne irrerlknghe atwemele. Kele re anteme tyerrtye ingkirrekeke alartetye anetyenhe, itnenhe arne areye mpwarentyte uternetyenhe rarle ilemele. Ngkarte kwenhe itneke ahele

anthurre aneme renhe-arle awetyakenhe anetyenheke. Itelaraye, nhenge artwe anyentele kripethe areye ultheme akarrwe rputnemele-arteke, re alakenhe-arteke-anteye-arle itneke mpwaretyenhe, itneke imernetyeke Ngkarte-arle itneke ahele anthurre aneme.

¹⁶ Kenhe mantereke-arleke aneke ulyepereke-arleke anteye aneke arritnye arrpenhele-arle ilemeke, “Re kwenhe King aneme, King arrpenhe ingkirrekenge tyeperre ulkere, Re kwenhe Alartetye aneme Alartetye arrpenhe ingkirrekenge tyeperre ulkere.”

¹⁷ Kele the anteme alkere-arenye anyente areke alernngele-arle tnetyameke. Re thipe kere arlkwentye akngerre ingkirrekeke arnterre anthurre arlekeke alkerele-arle alkereke-irretyameke, “Apurtelhe-iletaye apetyewarraye nhenge arrantherre kere ingkirreke arlkwetyenhenge Ngkartele-arle arrenhantherrenhe anthemekel ¹⁸ Apetyewarraye, tyelke nhenhe tyerrtye ilweke-arle areye-kenhe arlkwetyeke nhenhele-arle interle-anemeke, nanthe areye-arle arlkwaye. Nhenhele itne ingkirreke interirreme, alartetye anthurre areye, atwerrentye akngerre areye, alartetye itnekenhe anteye, nanthe itnekenhe areye, yanhe areye nanthenge-arle apetyekeke, warrkene areye, arrpenhe areye itneke-arrpe-arle warrke-irremeke. Yanhe kwenhe tyerrtye atningke anthurre inteme arrantherre arlkwetyeke atyeperre akngerre areye apeke, tyerrtye alhengkeye areye apeke, tyerrtye apwerte ngkweltye akweke ware-akerte apeke, arrpenhe areye apwerte ngkweltye akngerre-akerte apeke. Ingkerreke anthurre arlkwaye impetyale itnenhe.” Alakenhe renhe kwenhe re thipe areyeke angkeke.

¹⁹ The anteme arrentye renhe awethe areke. Re kwenhe alartetye apmere ahelhe nhenhe-arenye ingkirrekenge

apurte tnetyame atwerrentye akngerre itnekenhe areye-akerte-arlike apurte-anteye-arle-irrekeke. Itne kwenhe renhe angkarre atwerretyeke tnerrireke nanthe artepele-arle aneme nhengenge ikwerenhe areyenge anteye. ²⁰ Kenhe nanthe mperlkerenge rarle arrentye renhe arntwirrkemele renhe ayerneke akngemele. Re-inpe arrpenhe renhe arntwirrkeke anteye, yanhe re urrtye akwetethe angkentye akngerre. Re kwenhe aneme ilyernpenye anthurre-arle arne areye mpwarekeke nhenge arrentye yanhele aretyamenge. Nhenge re arne yanhe areye ilyernpenye anthurrele mpwaretyame re tyerrtye areye urrtyekelhe-ilemele imperre-arle urleke-arleke-akerte anemeke, itnenhe uterneke artepe anemele kwene-irretyeke tnaketyeke arne yanhe apwertengentyele-arle mpwarekeke re-arteke-arle anekeke. Kele alartetyele nanthe mperlkerenge-arle arrentye yanhe iweke, artwe urrtye akwetethe angkentye akngerre-arlike, ure alkngenthe akngerreke-arleke kwerte unpe akurne anthurre re ntyeme. ²¹ Kele rarle nanthe mperlkere-akertele atwerrentye akngerre arrentyekenhe areye irrerlknge atweke alyweke-arle arrakertele-arle arntwirrkekeke. Tyerrtye ilweke-arle apanpele interlte-aneke. Kele anteme thiye areye apetyemele ingkirreke ankeye akngerrele arlkweke anhelke anteme itne aneke.

20

Itne arrentye Satan ayerneke uterne 1000-eke-atwetye

¹ Yanhe ikwere-iperrele the areke alkere-arenye alkere akertne-ngentyele kwene-akerle apetyerlunge iltye akwe-arratyete re chain arlpentye lterrke akngerre arntwirrkeke, iwenhe-akweye ikwere-arlike-akerte iperte akngerre renhe altywere-iletetyeke. ² Re apetyeke apmwe

kwatye-arenye renhe arntwirrkemele re renhe chain lterrke akngerrele ayernemele renhe ipmentye impeke anetyeke uterne 1,000-eke-atwetye. Apmwe kwatye-arenye yanhe re kwenhe apmwe arrekwele anthurrenge-arle anetyarte, apmwe nhenge arrentye Satan arritnye. ³ Alkere-arenye re-anteme arriwe altywere-ileke, re apmwe renhe iperte akngerreke-arleke iwemele, arriwe key ikwerele martemele metyileme. Ikwere-iperrele aneke martelhentye akwete, arrpenhele renhe uyarne altywere-ileme uterne 1,000-eke-atwetye, apmwe yanhe apeke arrateme-ketye, tyerrtye areyeke awethe-ame-awethe urrtiyirreme-ketye. Renhe-arle iperte akngerrele uterne 1,000-eke-atwetye atnyeneke-iperrele, kele alkere-arenyele anteme renhe arratelle-ileke imerte renhe ipmentye impemele akweke wareke.

⁴ Ikwere-iperrele anteme the areke tyerrtye atningke anthurre chair mwerre akngerre ikwere areyele anerlenge. Ngkartele itnenhe alartetye anetyeke arrerneke imerte itnenhe ilemele tyerrtye areye court-eke ngkernetyeke itneke itirremele anetyeke. The tyerrtye areye areke, arrpenhe areyele akaperte itnekenhe akeke-arle itne-arle kwenhe tyerrtye areyeke Jesus-akerte iletartyenge, iwenhe angkentye Ngkartekenhe angkemele anteye. Itne kwenhe arrentye renhe tnaketyakenhe anetyarte, itne artepe anemele kwene-irretyakenhe aneke, itne tnaketyakenhe arne yanhe renhe arrentye-arteke-arle anekeke tyerrtye areyele-arle mpwarekeke. Itne kwenhe imperre arrentye-kenhe atnyenetyakenhe aneke, arrangwe anthurre-arle, nhenge urlele apeke, ilyele apeke, arrangwe-arle. Irrerlkngte inteke-arle nhenhe areye awethe anteye itethe-irritnemele, itne Jesus-nge apurte-irremele ikwerenge alartetye areye irreke

uterne 1,000-eke-atwetye. ⁵ Nhenhe areye kwenhe arrekwelenye areye aneme ilweke-arle awethe-anteye itethe-irritneke. Kenhe arrpenhe areye itethe-irritnetyakenhe akwete irrerlknge itnekenhe ware interirreke akarelhemele uterne 1,000 uyerretyeke. Itne kwenhe Ngkarteke akarelhetyame itnenhe awethe itethe-ilirtnetyeke. ⁶ Ngkarte arrwekelenye nhenhe areyeke atnerte akangkentye anthurre awelhetyenhe itethe-arle-irritnekenge. Re itneke itirretyenhe atyewe arratyke ikwerenhe-arle aneme-arteke nhenge itnenhe akalkelhe-ileke-arle-iperrele, Re itnenhe ureke-arleke iwetyakenhe atherre-ngare ilwetyeke, arrangwe-arle. Itne Ngkarte uthene Christ utheneke-tetye tyatyke ikwere-atherrenhele warrke-irretyenhe, itne kwenhe kwertengerle tyatyke-kenhe anteye anetyenhe Christ-nge uterne 1,000 ikwerele-ureke.

Urele arrentye Satan akurne-ilemele ampeme

⁷ Nhenge uterne 1,000 anpere-irreke-arle alkere-arenye Ngkarte-kenhele arrentye Satan iperte akngerre ikwenge-ntyete arratelhe-iletienhe renhe irlwemele aywepetyenhe. ⁸ Re iperte akngerre yanhe ikwenge-ntyete arratetyenhe tyerrtye akurne areyeke apmere arrpe-anenhe-werne alhetyeke anteme itneke urrtirremele angketyeke. Apmere yanhe areye arritnye arrpenhe atherre-akerte, Gog uthene Magog uthene. Arrentye Satan-ele tyerrtye akurne areye apurtelhe-iletienhe tyerrtye Ngkarte-kenhe areyenge atwerretyeke. Atningke akngerre anthurre kwenhe itne anetyenhe yerre akweke areye-arteke. ⁹ Itne apmere arrpe-anenhe-ngentyete apetyetyenhe apmere ingkirreke ahelhe anteke-ngentyete, irraweye tnetyenhe angkarre atwerremele nhenge Ngkarte-kenhe areye

apmere itnekenhenge utepe-akerrirremele apmere yanhe Ngkarte-arle ahentye anthurre anemeke. Kenhe ure alkngethe akngerre anthurre alkere-ngentyele kwene-akerle apetyetyenhe itnenhe ampetyeke akethe-ante arrernemele. ¹⁰ Kenhe alkere-arenye alartetye yanhele anteme arrentye Satan iwetyenhe, nhenge tyerrtye ingkirreke-arle urrtirremele iletartyeke, apmere yanheke-arleke akwetethe-arle amperle-anemeke kwerte ntyenge irntirte-akerte, nthenhele-arle itne kwenhe arrentye renhe kele iweke-arle angkentye ilentye akngerre-arlike urrtye akwetethe-arle angkentye akngerre. Urele itnenhe ampetyenhe rlkerte-anthurre-ilemele, itne anteme uyarne anthurre itirretyenhe, arltele-akake ingwele-akake, akwete-ante-arle.

Ngkartele tyerrtye ingkirreke court-eke ngkerneke

¹¹ Ikwere-iperrele the Ngkarte areke chair mperlkere akngerre-apenhele anerle-anerlenge. Nhenge re arratemele, apmere ahelhe nhenhe uthene alkere uthene uyerrerenge tyerrtyele renhe-atherrenhe awethe aretyakenhe aneke. ¹²⁻¹³ The areke tyerrtye ingkirreke anthurre apmere ahelhe nhenhe-arle arrekwele ilwekeke kenhe lyete anteme-arle itne awethe itethe-irritneke, itne kwenhe chair mperlkere akngerrenge arrekwele tnerrireke: tyerrtye akngerre areye arpenhe akweke areye, alartetye areye, warrkene areye. Arrpenheme kwatye alayeke alhekwarle-irreke, arrpenheme ahelhe iperte irrarele inteke, arpenhe areye akenhe anetyame apmere ilweke-arle areye-arle aneme ikwerele. Itne ingkirreke kwenhe chair akngerre yanhe ikwerenge arrekwele tnerriretyame. Pipe atningke anthurre yanhe ikwerele aneke, Ngkartele anteme itnenhe altywere-ileke ingkirreke anthurre aremele. Pipe

arrpenhe areye ileke nhenge nthakenhe-arle tyerrtye areye apmere ahelhe nhenhele anerrirretyarte. Kenhe arrpenhe areye arritnye atningke anthurre-akerte-arle aneke. Nhenge yanhe areye, iwerre akurnele-arle anetyarte apmere ahelhe nhenhe ikwerele, arritnye itnekenhe pipe yanhe areyele aneke. Kele imerte re pipe arrpenhe altywere-ilemele, pipe tyeperre anthurre Ikwerenhe, pipe yanhe nhenge arritnye Ikwerenhe areye-akerte-ante ware-arle. Pipe ingkirreke anthurre areke-arle iperre Ngkartele tyerrtye ingkirreke court-eke ngkerneke. Anyenteke-anyente itne ingkirreke alhemele chair mperlkere akngerre-apenhe ikweringe arrekwele tneke. Ngkartele anteme itnenhe arrpenenhe apayuthneke, nhenge nthakenhe-arle itne apmere ahelhe nhenhele anetyarte, iwenhe-arle itne mpwaretyarte ahelhe nhenhele. ¹⁴ Ngkarte angkeke, tyerrtye areye ilwetyakenhe anetyenhe awethe, itne ahelhe ipertele intetyakenhe anetyenhe awethe. Re ure alkngenthe akngerre kweneke-arleke iweke yanhe areye Renhe-arle arratye itelaretyakenhe aneke, arrpenhe nhenge-arle tyerrtye areye tnyante irrerlkngeke atwenhe-atwenhe. Ure alkngenthe akngerre yanhe re kwenhe apmere tyerrtye akurne areye-arle awethe atherre-ngare ilwetyenhe. ¹⁵ Tyerrtye nhenge yanhe areye arritnye pipe-nge-arle anetyakenhe aneke, nhenge Ngkartele-arle arritnye tyerrtye areye-kenhe intelhe-ileke akwete-ante-arle anetyenheke, Ngkartele itnenhe ure alkngenthe akngerreke-arleke iweke.

21

Ayeye alkere alkarle uthene ahelhe alkarle uthene-akerte

¹ Ikwere-iperrele the ahelhe arrpenhe uthene alkere arrpenhe uthene areke, alkarle-arle arrpenhe. The

ahelhe arrekwelenye, alkere arrekwelenye uyarne areme, kwatye alaye anteye the uyarne aremele. ² Kele the anteme apmere akngerre Ngkarte-kenhe areke, apmere yanhe Jerusalem, arrekwelenye anetyakenhe, alkarle kwenhe yanhe aneme. Re kwenhe alkere akertne-ngentyele atyenge-werne-atheke kwene-akerle apetyetyame. Apmere yanhe re kwenhe mwerre akngerre anthurre aneke. Nhenge marle-arle mantere mwerre akngerreke irrpeme-arteke nhenge re mpwarelherlenge anewe inetyeke, alakenhe re-arteke apmere akngerre yanhe re mwerre akngerre anthurre aneke. ³ The anteme arrpenhe aweke chair mwerre akngerre yanhe ikweringe-ntyale arlkerlenge alakenhe angkemele, “Ngkarte kwenhe tyerrtye areyenge anetyenhe. Re kwenhe itnekenge anetyenhe. Itne kwenhe ikwerenhe areye anetyenhe. Ngkarte kwenhe Re-arrpe itnekenge anetyenhe, Re Ngkarte itnekenhe anetyenhe. Re itnenhe mwantyele arntarnte-aretyenhe nhenge alartetye itnekenhe anthurre anemele. ⁴ Re alknultye alknge itnekenhe-ngentyele arlkngetyenhe nhenge yanhe-ngentyele itne awethe alhwarrpe anetyakenhe anetyenhenge. Itne-arle awethe ilwetyakenhele anetyenhe nhenge akayale artnetyakenhe-arle anetyenhe, arrangketyakenhe anetyenhe, arnteme-arle awelhetyakenhe anetyenhe, arne areyele-arle tyerrtye areye alhwarrpele-anthetyartenge kele uyerreke.”

⁵ Ngkarte anteme, chair mwerre akngerre yanhe ikwerele-arle anetyameke, atyenge angkemele, “Araye! The kwenhe lyete arne ingkirreke alkarle-ileme!” Re atyenge angkeke: “Nhenhe areye pipe-ke intelhe-ilaye The ngkwenge ileke, unte-arle Ayenge-ante thenterlenge re akenhe aneme-arle. The kwenhe arne ingkirreke mpwareme nhenge ayenge-arle

mpwaretyeke angkeke.” ⁶ Re atyenge awethe angkeke, “The arne ingkirreke anthurre mpwareke Ayenge-arle angkeke-iperre. Ayenge kwenhe arrwekele anthurre aneme, arne anetyakenhenge-urrke, Ayenge itethe akwete aneke, Ayenge akwete anetyenhe nhenge arne ingkirreke uyerrrlenge. Ayenge-arle itethe akwete-ante anetyenhe. Awerrirraye, nhenge angwenhe apeke kwatyeke angkethakwe-irrerleng, kwatye nhenge itethe-arle anthemeke, kele anteme The mwantyele-arle kwatye antheme nhenge kwatye pintye-ngentyele itethewerne akngetyerleng, itne antywetyenhenge akwete-ante anteme anemele. ⁷ Arrantherre apeke lterrke akwete arrentye-ketye aneme Atyenge-ketye artepe untyeme-irretyale anetyeke kele The arrenhantherrenhe akwete mwantyele arntarnte-arerle-aneme. Ayenge Ngkarte arrekatherrenhe anetyenhe arrantherre kwenhe Atyenge-artweye areye arratyeh anthurre anetyenhe. ⁸ Kenhe tyerrtye areye nhenge ateralthe-arle aneme, nhenge tyerrtye areye Ayenge-arle arratyeh itelaretyakenhe anekeke, tyerrtye areye nhenge arne akurne-arle akwetethe mpwarerlte-anemeke, tyerrtye areye apure anetyakenhe nhenge tyerrtye arpenhe areyenge-arle interremeke, tyerrtye areyele-arle arrwengkwelthele uthnemeke, tyerrtye areye nhenge ngkarte urrtiyirrentye-arle tnakemeke, tyerrtye areye urrtiyirreme-arle ilerle-apeme. Tyerrtye nhenhe ingkirreke kwenhe atherre-ngare ilwetyenhe; itne apmere ahelhe nhenheleke-amparre ilwetyenhe, urreke itne awethe ilwetyenhe, ure alkngenteh akngerrenge ure kwerte arntirte-arle ntyerle-anemeke.”

Ayeye apmere alkarle Jerusalem-akerte

⁹ Itelareme alkere-arenye 7-pele apanthe 7-akerte, yanhe areyele kwenhe arne akurne ingkirreke-arle ahelhe-werne-atheke thelekeke. Alkere-arenye anyente yanhe areye-ngentyele apetyemele atyenge angkeke, “Mpe. The ngkwenge arelhe yanhe renhe imernetyenhenge * anewe-arle-aketyenheke Yepe-yepe Akwerrke Ngkarte-kenheke.” ¹⁰ Kele Utmenge Ngkarte-kenhe atyenge-arleke irrpeke, alkere-arenyele anteme ayenge apwerte akertne anthurre-werne akngeke. Re atyenge apmere Ngkarte-kenhe-arrpe Jerusalem imerneke, alkere-ngentyele-arle apetyeke Ngkarte-ngentyele. ¹¹ Apmere yanhe re kwenhe imparrkeye anthurre nhenge alkngenthe imparrkeye Ngkarte-kenhele, kelathe-arteke apeke arne iwenhe apeke atyeperre anthurre-arle apeke imparrkemeke alkngenthe atherrke-atherrke mwerre akngerre-akerte-arteke. ¹² Kenhe arrkngerte akngerrele apmere yanhe utepe-akeke. Arrkngerte yanhe ikwerenge arriwe 12-akerte aneke, arriwe-arrpeke itweke alkere-arenye tnetyame renhe ilpemele. Kenhe arriwe arrpe-anenheke arrpenhele intelhe-ileke-arle arritnye areye alere artwe Israel-kenhe areyeke. Alere 12-pele nhenhe areye-ngentyele Israel-kenheke-artweye areye-arle atningke-ame-atningke-irreke-arle, akwetethe anthurre-arle. ¹³ Arriwe 12-pele akenhe arrkngertenge alakenhe tnerrirreke: urrpetye Ikngerrele tneke, urrpetye arrpenheme Antekerrele tneke, urrpetye arrpenheme Ayerrerele tneke, urrpetye arrpenhe Alturlele tneke. ¹⁴ Arrkngerte yanhe re apwerte athirnte 12 akertnele

* 21:9 Arelhe yanhe re kwenhe tyerrtye areye-arteke aneme Christ-nge-arle akwete-ante anyente-irrekeke, yanhe thewe Yepe-yepe Akwerrke-arteke-arle anemeke. Itne kwenhe kwerrkipenhe ikwerenhe-arteke anetyenhe, ratherre anteme anewe-akerretyenhe

tneke. Kenhe arritnye artwe areye-kenhe apwerte athirnte yanhe areyeke aneke. Arrantherre itelareme, artwe twelve-pele Yepe-Yepe Akwerrkele-arle yernekeke angkentye ilerle-apetyeke, arritnye itnekenhe yanhe ikwerele aneke.

¹⁵ Alkere-arenye atyenge-arle angketyameke arne arratyentye arntwirrkeke gold-engentyele-arle mpwarekeke, re arne yanhele apmere akngerre yanhe arrkernetyeke, arrkngerte iwenhe-atheke, arriwe iwenhe atheke, arlpentye apeke, arlenge apeke irremeke. ¹⁶ Apmere yanhe re square-arteke aneke, nhenge yarte akngerre-arteke arrkngertele utepe-akeke. Re arne arlpentye yanhe atningke-ngare ahelheke-arleke arrerneke apmere yanhe arrkernetyeke. Ikngerre-ampinyele arlpentye anthurre aneke, kilometre 2,400-eke-atwetye. Alakenhe re-anteye re arrkngerte-arrpe arrkerneke. Kenhe antekerre-ampinyele arlpentye anthurre aneke, kilometre 2,400-eke-atwetye. Kenhe ayerrere-ampinyele arlpentye anthurre aneke, kilometre 2,400-eke-atwetye. Kenhe alturle-ampinyele arlpentye anthurre aneke anteye, kilometre 2,400-eke-atwetye. Ahelhe-ngentyele akertne-werne atheke apmere yanhe kilometre 2,400-eke-atwetye anteye tneke. ¹⁷ Alakenhe re-anteye re arrkngerte-arrpe arrkerneke, apmere yanhele-arle utepe-akemeke, itne anteke anthurre. Arrkngerte-arrpe, re metre 66-eke-atwetye anteke aneke. ¹⁸ The areke arrkngerte yanhe renhe mwerre akngerre anthurre-arle. Arrkngerte apele nhenge apwerte atherrke-atherrke-ntyeye mpwareke-arle. Apmere re mwerre akngerre anthurre anteye aneke, re apele gold-engentyele mpwareke-arle, re alkngge pwarrtyeme kelathele-arteke. ¹⁹⁻²⁰ The apwerte athirnte 12 areke arrkngerte kwene ikwerele anerlenge arlkenye arrpenhe-

akerte-arle. Apwerte athirnte 12-ke apwerte atyeperre areye aneke arlkenye arrpenhe areye mwerre-akerte, arrpenheme atherrke-atherrke, arrpenhe areye alkere-alkere-arteke, arrpenhe areye mperlkere, arrpenheme athetheke, arrpenheme arrerlkere, arrpenheme urrperle anthurre aneke. Itne kwenhe ingkirreke arlkenye mwerre akngerre anthurre aneke apwerte athirnte 12-ek-arlenge. ²¹ The areke arriwe 12-pele mwerre akngerre anthurre anteye aneke. Arrpenhele itnenhe apwerte mperlkere mwerre akngerrenge-ntyale mpwareke-arle apwerte nhenge pearl arritnye-arle. The areke anteye iwerre arlpentye apmere kwene yanhele mwerre akngerre anthurre interlenge nhenge gold-engentyele-arle mpwarekeke, re akenhe arrpenhe anthurre aneke, arrerlkere anthurre re aneke kelathe-arteke renhe akethe anthurre-arle areme nhenge ulkere.

²² The akenhe tyatye akngerre apmere yanhe ikwerele aretyakenhe aneke tyerrtye areye-arle irrperlenge Ngkarte tnakewarreyeke Ngkarte-arle kwenhe Yepe-Yepe Akwerrke uthene yanhe ikwerele-arle anerle-anerreke. Tyerrtye ingkirrekele Renhe-atherrenhe akethe anthurre akwetethe arerlte-aneke. ²³ Apmere yanhe rarle atnyentye apeke arlenge apeke pwarartyeke ahentye anetyakenhe apmere yanhe ikweringe, Ngkarte Re-arrpe apmere yanheke alkngenthe anetyenhe, Jesus-inpe, Yepe-yepe Akwerrke-arle anemeke, re kwenhe alkngenthe itnekenhe anetyenhe anteye. ²⁴ Kenhe tyerrtye ingkirrekele mwerre anteme untherlte-anetyenhe nhenge arltele-arteke anerlenge alkngenthe-arle Ngkarte-ngentyele-arle Yepe-yepe Akwerrke-ngentyele-arle itneke arrtyernerlenge. Kenhe alartetye areye apmere arrpe-anenhe-ngentyele kwenhe apwerte ngkweltye-arlke, mantere-arlke,

arne mwerre akngerre arrpenhe areye-arlke, apmere yanhe ikwere-werne akngetyetyenhe Ngkarte akertne utyernemele tnaketyeke. ²⁵ Yanhe ikwerele kwenhe arlke akwetethe anerle-anetyenhe. Kenhe arriwe 12-pele kwenhe akwetethe altywere anerlte-anetyenhe. Arrpenhe areyele arriwe itnenhe altywere-ileme-ketye, rarle kwenhe ingwe-irretyakenhenge anetyenhe awethe. ²⁶ Kenhe tyerrtye areye apmere arrpe-anenhe-ngentyele kwenhe apwete ngkweltye-arlke, mantere-arlke, arne mwerre akngerre arrpenhe areye-arlke, apmere yanhe ikwere-werne Ngkarteke akngetyetyenhe Ngkarte-arle impene akngerre anthurre anerlenge. ²⁷ Itne kwenhe arne akurne areye akngetyetyakenhe anetyenhe arne mwerre akngerre areye-ante ware. Kenhe yanhe areyele arne akurne-arle mpwarerlte-anemeke, yanhe areye-arle urrtiyirremeke, apmere yanheke irrptyakenhe anetyenhe. Kenhe Ngkarte-kenhe areye-ante ware irrptyenhe, yanhe areye Ngkartenge-arle akwete-ante anetyenheke Yepe-yepe Akwerrkele-arle arritnye itnekenhe pipe-nge intelhe-ilekenge.

22

¹ Yanhe ikwere-iperrele anteme alkere-arenyele atyenge imerneke apmere alkarle yanhe Jerusalem renhe, re atyenge imerneke lhere kwatye unterlenge re kwenhe tyerrtye areye itethe akwete-ante anentye akngerre-ilettyeke anetyenhe. Kwatye yanhe re alkngrlpe-alkngrlpe-irreke nhenge chair yanhe ikweringentyele thelelhomele nhenge Ngkarte uthene Yepe-Yepe Akwerrke uthene anerle-anerretyamenge. ² Yanhe ikwerele aneke iwerre arlpentye akngerre anthurre nhenge anteke akngerre-arle apmere mpwepe yanhe ikwerele inteke. Kwatye yanhe re iwerre mpwepele

unteke. Kenhe kwatye lhere iterele-ante atherrele akenhe arne atherre lyapeke, ratherre-arle kwenhe tyerrtye areye itethe akwete-ante anentye akngerre-ilettyeke anetyenhe. Arne yanhe atherre kwenhe merne arrpenheke-arrpenhe 12-akerte itne interteke-interte arrateme atnyentye arrpe-anenhele. Kenhe tyerrtye areye apmere arrpe-anenhe-ngentyele irlpelhe arne yanhe atherre-ngentyele ineme kele nhenge itnenhe arlkwemele ltterrke-irremele irlpelhe yanhe areyele rilkerte itnekenhe mwerre-ilemenge. ³ Kenhe tyerrtye akurne areye kwenhe apmere yanhele anetyakenhe anetyenhe, tyerrtye mwerre areye-ante apmere yanhe ikwerele Ngkartenge anetyenhenge.

Chair Ngkarte-kenhe, Yepe-Yepe Akwerrke-kenhe anteye apmere yanhe ikwerele anetyenhe, tyerrtye Ngkarte-kenhe areye, Ikwere-arle warrke-irrerlte-anemeke, itne Renhe tnaketyenhenge. ⁴ Itne kwenhe Renhe inngerre ularreke-ularre anthurre arerretyenhe, arritnye Ikwerenhe urlle itnekenhele intelhe-ileke-arle aneme. ⁵ Apmere yanhe ikwerele itne ure alknгентhe ahentye anetyakenhe anetyenhe ingwele-arle artintyetyakenhenge anetyenhe awethe. Alakenhe re-anteye itne kwenhe arlengeke itirretyakenhe itnenhe alknгентhe anthetyeke Ngkartele-arle itnenhene alknгентhe anthetyenhenge. Itne Ikwerenge alartetye-anteye anetyenhe akwete-ante re.

Jesus-arle apetye-alpetyenhe

⁶ Alkere-arenye anteme atyenge angkeke, “Awaye, angkentye nhenhe areye, Ngkartele-arle ngkwenge ilerneke, arratye aneme, Re kwenhe arratye mpwareme iwenhe-arle mpwaretyeke angkemele. Alakenhe re-anteye arrule anthurre Ngkartele yanhe areyeke ileke,

Renhe-arle awemele angkentye Ikwerenhe ilerlte-apetyarteke, iwenhe renhe angketyeke. Re alkere-arenye Ikwerenhe yerneke anteye tyerrtye areyeke imernetyeke Ikwere-arle warrke-irremeke arne ingkirreke urreke-ulkere irretyenhe.”

⁷ Kenhe Jesus tyerrtye ikwerenhe areye ingkirrekeke angkeke, “Ayenge mwantyele awerrirraye! Ayenge kwenhe lyete ware apetye-alpetyenhe; Ngkarte kwenhe ingkirreke mwantye-mwantye-iletienhe angkentye Ikwerenhe-arle awerlte-anemeke nhenge tharle arrekatherre pipe nhenhenge imernekeke.”

⁸ Ayenge kwenhe John aneme, the thewe arne nhenhe areye aweke-arle aremele anteye tharle pipe nhenhenge intelhe-ilekeke. Nhenge the arne nhenhe areye aweke-arle-iperrele itnenhe aremele anteye, ayenge iparrpe anthurre atnertenge-arlenge atnyeke alkere-arenye ingkele itwele intemele, arne nhenhe areye-arle atyenge imernetyameke the renhe tnaketyeke anteme. ⁹ Re akenhe atyenge angkerlenge, “Ayenge tnaketyale anaye, ayenge-arle warrkene Ngkarte-kenhe unte-arteke anteye! Ayenge kwenhe tyerrtye areye-arteke-anteye aneme angkentye Ngkarte-kenhe-arle awemele ilerle-apetyarteke, tyerrtye areye-arteke angkentye-arle pipe nhenhenge awerlte-anemeke. Unte Ngkarte-ante ware tnaketyeke!”

¹⁰ Alkere-arenye anteme atyenge angkeke, “Angkentye nhenhe pipe-nge aneme kwenhe Ngkarte-kenhe. Arrpenhe areye-ketye alengke-iwetyale anaye. Kele anteye-arle alherlte-iwaye arrpenhe areyeke ayeye renhe ilerle-apemele itne renhe akethele awetyenhenge arne areye pipe kwene nhenhele-arle aneme kwenhe lyete ware irretyenhe arlte anteme tyerrtye areyeke urteke-irritneme nhenge utepe-irritnetyeke. ¹¹ Arlte yanhe-

arle itwe-irremenge, tyerrtye areyele apeke arne akurne areye akwete mpwarerlte-anetyeke ahentye anemele, kele itnenhe ipmentye-iwe. Ngkartele lyete ware itnenhe arriletuyenhe. Kenhe tyerrtye yanhe areye apeke arrpenhe areyenge-arle akwetethe anyelkngele interremeke, kele itnenhe ipmentye-iwe! Ngkartele lyete ware itnenhe arriletuyenhe. Kenhe tyerrtye yanhe areye arne mwerre areye-arle akwetethe mpwarerlte-anemeke arratye mwerre-arle anerlte-anemeke itne kwenhe arratye mwerre akwete anerlte-anetyeke mwerre akwete mpwarerlte-anetyeke anteye. Tyerrtye yanhe areye itneke-arrpe-arle arne akurne areye-ketye akalkelhe-ilelhekeke, alakenhe re-arteke akwete anetyeke.”

¹² Jesus anteme angkeke, “Awerrirraye! Ayenge kwenhe lyete ware apetye-alpetyenhe. Nhenge ayenge apetye-ल्पemele the arrenhantherrenhe ingkirreke court-eke ngkernetyenhe arrenhantherrenhe akalkelhe-iletayeke. The arrenhantherrenhe mwantyele apayuthnetyenhe iwenhe apeke renhe arrantherre mpwareke-arle-akerte nhenge apmere ahelhe nhenhele anerlte-anemele. Nhenge the aweke-arle iperre iwenhe apeke renhe arrantherre mpwarekenge, mwerre apeke akurne apeke, ayenge anteme itirretyenhe arrekatherre nthakenhe-arle irretyeke. ¹³ Ayenge kwenhe arrekwele-ipenhe anthurre aneme, arne anetyakenhenge-urrke, ayenge-arle itethe akwete-arle aneme, ayenge ingkernenye anthurre aneme anteye, nhenge arne ingkirreke anthurre uyerrerlengye ayenge akenhe itethe akwete-arle anetyenhe alakenhe re akwete.

¹⁴ “Nhenge tyerrtyele mantere itnekenhe alheweme-arteke itne anteme mwerre alkarle-irrerlengye, alakenhe re-anteye nhenge itne utnenge alkarle atnyenemele akangkentye anetyenhenge, alakenhe ikwerenge

anteme itne merne ikwemeye arne yanhe-ngentyele arlk-wetyeke tyerrtye areye-arle itethe akwete-ante atnyentyeke, itne anteme arriwe yanhe ikwerenge irrpetyehenge apmere Jerusalem-enge yanhe ikwerele itethe akwete-ante anetyenhe. ¹⁵ Kenhe yanhe areye arne akurne-arle mpwarerlte-anemeke kwenhe irrpetyakenhele anetyenhe, itne-arle kwenhe arne akurne areye anthurre mpwarerlte-anemenge: Itne akngwelye areyarteke aneme, arrpenhe areye artenge-iweme itnenhe rlkerte-ilettyeke, itne arrpenhe areye mpwenye ikngwemele, itne arrpenhe areye irrerlkng atwetyarte, itne ngkarte urrtyrrentye areye tnakewarretyarte, itne ahentye anthurre aneme ingkirreke-arle akurne anemeke. Itne kwenhe akethele akwete-ante anetyenhe.”

¹⁶ Jesus atyewe ikwerenhe areyeye angkeke, “The kwenhe alkere-arenye atyinhe arrekanttherre-werne yerneke arrekanttherre angketyeke alhetyeke apmere arrpe-anenhe-werne arranttherre-arle anemeke. Arranttherre King David itelareme arrule anthurre-arle anetyarteke, kele ayenge kwenhe ikwerenheke-artweyengentyele. Ayenge kwenhe kwerralye ingwenthe-ingwenthe artyernemele.”

¹⁷ Kele Utmenge Akngerre uthene anewe Yepe-Yepe Akwerrke-kenhele uthene Jesus-eke angkeme, “Apetyaye!” Kenhe arrpenhe areyele apeke nhenhe renhe aweme itne kwenhe alakenhe-anteye angketyeke, “Apetyaye!”

Ye, nhenge angwenhe apeke kwatyeke angkethakwe-irrerlenghe, re apetyetyeke kwatye antywetyeke tyerrtye areye-arle itethe akwete-ante atnyenemeke, kwatye nhenge Ngkartele-arle mwantyele anthemke.

John-ele tyerrtye areye alkngarre-ileme pipe nhenhe-arle aremeke

¹⁸ Mwantyele awerrirraye! Ayeye nhenhe kwenhe Ngkarte-kenhe aneme. Alkere-arenye Ikwerenhele atyenge ileke nhenhe renhe alakenhe intelhe-iletyeke. Nhenhe kwenhe ayeye tyerrtye arrpenhe-kenhe anetyakenhele, arrangwe-arle. Impene anthurre kwenhe re aneme. Kele ayenge John-arle, the anteme arrenhantherrenhe ingkirreke alkngarre-ileme. Ayeye nhenhe akngarte-iwetyale anaye arrpenhe-atheke, ayeye arrpenhe ikwerenge apurtelhe-iletyale anaye, arrangwe-arle. Nhenge arrpenhele apeke ayeye nhenhe arrpenhe-werne akngarte-iweme, Ngkartele renhe rlkerte-akngerrele-antheme re uyarne anthurre itirretyenhenge, yanhe areye-arteke, the pipe-ke intelhe-ileke-akerte. ¹⁹ Awethe-anteye the arrenhantherre alkngarre-ileme arrantherre arne iwenhe apeke renhe pipe nhenhe-ngentyele akngeme-ketye. Arrantherre apeke angkentye arrpenheme ware angkeme-ketye arrpenhe areyeye ingkirreke iletakenhele renhe akethelhe-iletakenhe apeke. Kenhe arrantherre apeke alakenhe mpwarerlunge, kele Ngkartele anteme arrenhantherrenhe merne ikwemeye arne yanhe-ngentyele anthetyakenhe tyerrtye areye-arle itethe akwete-ante atnyenemeke, Re arrenhantherrenhe arrkngerte-ileme apmere mwerre akngerre yanheke irrpeme-ketye, apmere yanhe nhenge tharle pipe-nge intelhe-ilekeke-akerte. Angkentye nhenhele anwerneke ileme arne yanhe-akerte tyerrtye areye-arle itethe akwete-ante atnyenemeke. Apmere yanhe-akerte, arrantherre itelareme, apmere ameke-ameke yanhe-arle aneme. Kenhe arrantherre kwenhe apmere yanhe itelaretyakenhe anthurre aneme, arrantherre apeke

angkentye ingkirreke nhenhe ilerlte-apetyakenhe aneme.

²⁰ Jesus angkeke “Angkentye nhenhe kwenhe arratyeh anthurre aneme.” Re-anteme angkeke “Ye, Ayenge kwenhe arratyeh anthurre apetyeh-alpetyenhe, lyete ware.” Ayenge John, the nhenhe aweke-arle-iperrele imerte angkirtneke, “Yewe, iparrpe apetyaye, Unte-arle kwenhe alartetyeh anwerne-kenhe anerlenge.”

²¹ Ayenge Ngkarte-kenhe atningkeke angkeme: Jesus Alartetyeh kwenhe arrenhantherrenhe akwetethe mwantyele arntarnte-arerle-anetyenhe, arrenhantherrenhe akangkentyeh-ilemele.

Yewe, kele yanhe ware the angkentye ileme.

Angkentye Mwerre
Portions of the Holy Bible in the Central and Eastern Arrente
language of Australia

copyright © 2002-2014 Wycliffe Bible Translators

Language: Eastern Arrente (Arrente, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 12 Jun 2019 from source files dated 5 Mar 2019

26bd077a-984c-5596-a099-f37f2651f363